







সেকাল আর একাল।

দুঃস্বপ্ন


\* ৬৩২



শ্রীরাজনারায়ণ বসু

দুঃস্বপ্ন প্রণীত।

কলিকাতা



বাণ্মৌকি যন্ত্রে

শ্রীকালীকঙ্কর চক্রবর্তি কর্তৃক

মুদ্রিত।

শকাব্দ ১৭৯৬।



## বিজ্ঞাপন ।

প্রায় ছাব্বিশ বৎসর পূর্বে ব্রাহ্মসমাজ গৃহে শ্রীযুক্ত বাবু অক্ষয়কুমার দত্ত ও আমি আমরা দুইজনে তত্ত্ববোধিনী সভার কার্য্য করিতাম ইহা ১৭৯৪ শকের ফাল্গুনমাসে হঠাৎ একদিন মনে পড়িল। বোধ হইল আমরা যেন সেই প্রকাণ্ড ডেকের সম্মুখে এখনও দুই জনে কার্য্য করিতেছি। এইরূপ পূর্ব্বকার বন্ধুতার ব্যাপার হঠাৎ স্মৃতিপথে জাগরুক হওয়াতে অক্ষয়বাবুর সন্দর্শন জন্ম মন ব্যাকুল হইল। তৎপরে একদিন শ্রীযুক্ত বাবু দ্বিজেন্দ্রনাথ ঠাকুর মহাশয়ের সমভিব্যাহারে তাঁহার সহিত বালীতে সাক্ষাৎ করিতে গেলাম। সাক্ষাতের সময় নানা-বিধ প্রশঙ্গ উপস্থিত হইল। অক্ষয়বাবু প্রস্তাব করিলেন যে, সেকালের সঙ্গে একাল তুলনা করিয়া যদি কেহ একজন প্রবন্ধ লিখেন তাহা হইলে বড় ভাল হয়। আমি ঐ বিষয়ে প্রবন্ধ লিখিতে ইচ্ছা প্রকাশ করিলাম। ইংরাজী শিক্ষার ইচ্ছা বিষয়ে অনেক প্রবন্ধ লেখা হইয়াছে, তাহা হইতে যে সকল অনিষ্ট উৎপত্তি হইতেছে তদ্বিষয়ে কেহ প্রবন্ধ লেখেন নাই, আমি সে বিষয়ে একটি প্রবন্ধ লিখি, পূর্বে

আমার এইরূপ মানস ছিল। অক্ষয়বাবুর প্রস্তাবিত বিষয় আর এই বিষয়টী প্রায় সমান। পূর্বের মনে মনে এইরূপ ইচ্ছা থাকাতে সহসা অক্ষয়বাবুর প্রস্তাবে সন্মত হইলাম। তৎপরে জাতীয় সভায় ঐ শকের ১১ চৈত্র দিবসে সেকালের সন্ধ্যা একাল তুলনা করিয়া একটি বক্তৃতা করি। আমার প্রিয় বন্ধু ও ছাত্র শ্রীযুক্ত বাবু ঈশানচন্দ্র বসু ঐ বক্তৃতার নোট লিখিয়াছিলেন। সেই সকল নোট হইতেই বর্তমান প্রবন্ধের উৎপত্তি হয়। প্রবন্ধটি লিখিয়া অক্ষয়বাবুকে দেখান হইয়াছিল। তিনি যে সকল স্থান পরিবর্তন অথবা যে সকল স্থানে নূতন বিষয় সংযোগ করিয়া দিতে বলিয়াছিলেন তাহার অধিকাংশ স্থানে তাহা করিয়া দিয়াছি। এই প্রবন্ধ রচনাতে আমার বর্তমান অপটু শরীরে যতদূর পরিশ্রম কুরিতে পারি তাহা করিতে ত্রুটি করি নাই; এক্ষণে যাঁহার প্রস্তাব এই প্রবন্ধ রচিত হইয়াছে তিনি স্নেহের, এবং সাধারণবর্গ অনুগ্রহের, কোমল করপল্লবে ইহা গ্রহণ করিলে আমার পরিশ্রম সার্থক জ্ঞান করিব ইতি।

কলিকাতা, মেজাপুর,  
২২ আশ্বিন, ১৭৯৬ শক। }

শ্রীরাজনারায়ণ বসু



## সে কাল আর এ কাল

কিছু দিন হইল, আমি জাতীয় সভায় হিন্দুধর্মের শ্রেষ্ঠতা বিষয়ে বক্তৃতা করিয়াছিলাম। অদ্য “সে কাল আর এ কাল” এ বিষয়ে কিছু বলিবার মানস করি। “সে কাল আর এ কাল” এই নামটিই কোঁতুকজনক। বস্তুতঃ আমি আপনাদিগের সহিত কোঁতুক ও আমোদ করিব বলিয়াই অদ্য এখানে আগমন করিয়াছি। যেমন সমস্ত দিবস কঠিন পরিশ্রম করিয়া, লোকে সন্ধ্যার সময় প্রিয় বন্ধুদিগের সহিত বিশুদ্ধ আমোদ উপভোগ করিয়া শ্রান্তি দূর করে, তদ্রূপ আমি হিন্দুধর্মের শ্রেষ্ঠতা বিষয়ক বক্তৃতার নিমিত্ত বিবিধ শাস্ত্রান্বেষণ প্রভৃতি কঠিন পরিশ্রম করিয়া, আপনাদের সহিত বিশুদ্ধ আমোদ উপভোগ করিবার জন্য অদ্য এই প্রসঙ্গের উত্থাপন করিতেছি। কিন্তু ভরসা করি, অদ্যকার বক্তৃতা কেবল আমোদ জনক হইবে। এমন নহে, ইহাতে উপকারও লাভ হইতে পারিবে। কোঁতুকছলে কতকগুলি হিতকর বাক্য বলা আমার অদ্যকার বক্তৃতার প্রধান উদ্দেশ্য।

অদ্যকার বক্তৃতার বিষয় “সে কাল আর এ কাল”। ১৮১৬ খৃষ্টাব্দে হিন্দুকলেজ এই মহানগরে সংস্থাপিত হয়। ১৮৩০ সালে ঐ বিদ্যালয়ের প্রথম ফল ফলে। ঐ বৎসরে কতকগুলি যুবক ইংরাজীতে কৃতবিদ্য হইয়া বিদ্যালয় পরিত্যাগ করেন। তাঁহারা সেই সময়ে ইউরোপীয় বিদ্যার আলোক লাভ করিয়া

সমাজসংস্কার কার্যে প্রবৃত্ত হয়েন। সেই সময়ে একটী নূতন ভাব হিন্দুসমাজে প্রবিষ্ট হয়। ইংরাজী আমলের প্রথম হইতে হিন্দুকালেজ সংস্থাপন পর্য্যন্ত যে সময় তাহা সে কাল এবং তাহার পরের কাল এ কাল শব্দে নির্দ্ধারণ করিলাম।

প্রথমতঃ আমি নে কালের সংক্ষেপ বিবরণ করিব ও তৎপরে এ কালের সংক্ষেপ বিবরণ করিব। এ কালের বিবরণের সময় সে কালের সঙ্গে তুলনায় এ কালে কোন্ কোন্ বিষয়ে প্রকৃত উন্নতি হইতেছে আর কোন্ কোন্ বিষয়ে প্রকৃত অবনতি হইতেছে তাহা প্রদর্শন করিতে চেষ্টা করিব।

কোন কাল বর্ণনা করিতে হইলে প্রথমতঃ সেই কালের প্রধান প্রধান শ্রেণীর লোকের চিত্র প্রদর্শন করিয়া সেই কালের লোকের সাধারণতঃ দৈনিক জীবন কিরূপে যাপন করিতেন ও জীবনের প্রধান কার্য্য যথা, ধর্ম্মসাধন, বিষয়কার্য্য সম্পাদন ও আমোদ সন্তোগ কি প্রকারে নির্বাহ করিতেন তাহা বর্ণন করিলে সেই কালের প্রকৃত ছবি মনে প্রতিভাত হইতে পারে। আমি সে কালের এই রূপ বর্ণনা করিয়া পরে বর্ত্তমান কাল বর্ণনা করিব। যে সকল আচার ব্যবহার ইংরাজী শিক্ষার প্রভাবে ক্রমে তিরোহিত হইতেছে অথচ এখনও কিছু কিছু আছে তাহা সে কালের আচার ব্যবহার বলিয়া গণ্য করিব।

সে কালের বিষয় বলিতে হইলে সে কালের সাহেবদের বিষয় অগ্রে বলিতে হয়। আপনারা জিজ্ঞাসা করিতে পারেন, যে বাঙ্গালীদের বিষয় বলিতে গিয়া সাহেবদের কথা প্রথমে বলা হয় কেন? তাহার বিশিষ্ট কারণ আছে। সাহেবেরা আমাদের শাসনকর্ত্তা ও তাঁহাদের সহিত আমাদের ঘনিষ্ঠ সংস্ক।

সাহেবদের সহিত আমাদের ঘনিষ্ঠ সম্বন্ধ থাকা জন্য সে কালের সাহেবেরা কি প্রকৃতির লোক ছিলেন ও সে কালের বাঙ্গালিদের সঙ্গে কি রূপ ব্যবহার করিতেন তাহা না জানিলে সে কালের বাঙ্গালিদের অবস্থা ভাল জানা যাইতে পারে না, অতএব সে কালের সাহেবদিগকে বর্ণনা করা কর্তব্য। সে কালের সাহেবদিগকে সর্বপ্রায়ে বর্ণনা করা কর্তব্য। সাহেবেরা আমাদের রাজা! রাজার সম্মান অগ্রাে রক্ষা করা কর্তব্য। সে কালের সাহেবেরা অর্দ্ধেক হিন্দু ছিলেন। মুসলমানেরা এই ভারতবর্ষকে আপনাদের গৃহস্বরূপ জ্ঞান করিতেন। তাঁহাদের অনুরাগ এই খানেই বদ্ধ থাকিত। ইংরেজের আমলের প্রথমে সাহেবেরা অনেক পরিমাণে ঐ রূপ ছিলেন। তাহার এক কারণ এই, তখন বিলাতে যাতায়াতের এমন সুবিধা ছিল না। যাঁহারা এখানে আসিতেন তাঁহাদের সর্বদা বাটি যাওয়া ঘটিয়া উঠিত না। আর এক কারণ এই, তাঁহারা অতি অল্প লোকই এখানে থাকিতেন সুতরাং এখানকার লোকদিগের সহিত তাঁহারা আত্মীয়তা না করিয়া থাকিতে পারিতেন না। তাঁহারা অনেক পরিমাণে এ দেশীয়দের আচার ব্যবহার পালন করিতেন। তখন সকাল বিকাল কাছারী হইত, মধ্যাহ্ন কালে সকলে বিশ্রাম করিত। মধ্যাহ্ন কালে কলিকাতা দ্বিপ্রহর। রজনীর ন্যায় নিস্তব্ধ হইত। তখনকার সাহেবেরা পান খেতেন, আলবোলা ফুঁকতেন, বাইনাচ দিতেন, ও হুঁলি খেলতেন।\*

---

\* এখানে যে বর্ণনা করা গেল তাহা ইংরাজী আমলের প্রথম সময়ের প্রাপ্তি পাটে।

স্কয়ার্ট নামে এক জন প্রধান সৈনিক সাহেব ছিলেন, হিন্দুধর্মের প্রতি তাঁহার বিলক্ষণ শ্রদ্ধা ছিল। তজ্জন্য অন্যান্য সাহেবেরা তাঁহাকে হিন্দু স্কয়ার্ট বলিয়া ডাকিত। তাঁহার বাটীতে শালগ্রামশিলা ছিল। তিনি প্রত্যহ পূজারি ত্রাঙ্কণের দ্বারা তাহার পূজা করাইতেন। বাল্যকালে শুনিতাম, কালীঘাটের কালীর মন্দিরে প্রথম কোম্পানির পূজা হইয়া তৎপরে অন্যান্য লোকের পূজা হইত। ইহা সত্য না হইতে পারে, কিন্তু ইহা দ্বারা প্রতীত হইতেছে যে তৎকালের সাহেবেরা বাঙ্গালীদের সহিত এতদূর ঘনিষ্ঠতা করিতেন যে তাঁহাদিগের ধর্মের পর্য্যন্ত অনুমোদন করিতেন। এ কালেও গবর্নর জেনেরল লর্ড এলেনবরা সাহেব বাহাদুর আফগানিস্থানের যুদ্ধে জয়ী হইয়া ফিরিয়া আসিবার সময় বৃন্দাবন মথুরা প্রভৃতি স্থানের প্রধান দেবালয়ে দান করিয়া আসিয়াছিলেন। সে কালের সাহেবেরা আমলাদের উপর এমন সদয় ছিলেন যে, শুনা গিয়াছে, তাঁহারা তাঁহাদের দেওয়ানদের বাটীতে গিয়া তাঁহাদের ছেলেদিগকে হাঁঠুর উপর বসাইয়া আদর করিতেন ও চন্দ্রপুলি খাইতেন। তাঁহারা অন্যান্য আমলাদের বাসায়ও যাইয়া কে কেমন আছে জিজ্ঞাসা করিতেন। এখন সে কাল গিয়াছে। এখনকার সাহেবদিগকে দেখিলে, তাঁহাদিগকে সেই সকল সাহেবদের হইতে এক স্বতন্ত্র জাতি বলিয়া বোধ হয়। ইহাদের আর এ দেশীয়দের সহিত সেরূপ ব্যথার ব্যথিত্ব নাই, তাঁহাদের প্রতি তাঁহাদিগের সেরূপ স্নেহ নাই, সেরূপ মমতা নাই। অবশ্য অনেক সদাশয় ইংরাজ আছেন যাঁহারা এই কথার ব্যভিচারস্থল স্বরূপ। কিন্তু আমি যেসকল বর্ণনা করিলাম এরূপ সাহেবই অধিক। পূর্বে যে সকল ইংরাজ মহা-

পুষ্করেরা এখানে আসিয়া এদেশের যথেষ্ট উন্নতি করিয়া গিয়াছেন তাঁহাদের নাম এদেশীয়দের হৃদয়ে অঙ্কিত রহিয়াছে। কোন উদ্ভট কবিতাকার হিন্দুদিগের প্রাচীনস্মরণীয় স্ত্রীলোকদিগের নাম যে শ্লোকে উল্লেখিত আছে তাহার পরিবর্তে সে কালের কতিপয় ইংরাজ মহাত্মার নাম উল্লেখ করিয়া একটি শ্লোক প্রস্তুত করিয়াছিলেন। আদর্শ ও নকল দুইটি শ্লোকই নিম্নে লিখিত হইল।

আদর্শ।

অহল্যা দ্রৌপদী কুন্তী তারা মন্দোদরীতথা।

পঞ্চ কন্যা স্মরনিত্যং মহাপাতক নাশনং ॥

নকল।

হেয়ার কলিন্স পামরশৈব কেরি মার্শমেনস্তথা।

পঞ্চ গোরা স্মরনিত্যং মহাপাতক নাশনং ॥

এই সকল মহাপুঙ্কষদিগের বিষয় মহাশয়েরা অনেকেই অবগত আছেন। ডেবিড হেয়ার এই দেশে ঘড়ির ব্যবসায় দ্বারা লক্ষ টাকা উপার্জন করিয়াছিলেন; তিনি তাঁহার স্বদেশ স্কটলণ্ডে ফিরিয়া না গিয়া সেই সমস্ত অর্থ এতদেশীয় লোকের হিতসাধনে ব্যয় করিয়া পরিশেষে দরিদ্রদশায় উপনীত হইয়াছিলেন। তাঁহাকে এতদেশীয়দের ইংরাজী শিকার প্রথম সৃষ্টিকর্তা বলিলে অত্যুক্তি হয় না। তিনি হেয়ারস্কুল সংস্থাপন করেন ও হিন্দুকলেজ সংস্থাপনের এক জন প্রধান উদ্যোগী ছিলেন। আমি এক জন তাঁহার ছাত্র ছিলাম। আমি যেন দেখিতেছি তিনি ঔষধ হস্তে লইয়া পীড়িত বালকের শয্যার

পার্শ্বে দণ্ডায়মান রহিয়াছেন, অথবা যেখানে যাত্রা হইতেছে তথায় হঠাৎ আসিয়া অভিনেতা বালককে নীচ আমোদক্ষেত্র হইতে বল পূর্বক লইয়া যাইতেছেন! কলিন্স সাহেব এই কলিকাতা নগরের এক জন প্রধান সওদাগর ছিলেন। তিনি অত্যন্ত পরোপকারী ও সদাশয় ব্যক্তি ছিলেন। তাঁহার পুত্র উত্তর পশ্চিমাঞ্চলের লেফটেনেন্ট গবর্নর হইয়াছিলেন। তিনি সিপাইদের বিদ্রোহের সময় অনেক কষ্ট ভোগ করিয়া অকালে কালগ্রাসে পতিত হইয়াছিলেন। তিনিও একজন অতি দয়াশীল ও সদাশয় ব্যক্তি ছিলেন। এতদেশীয়দের প্রতি তাহার বিলক্ষণ স্নেহ ছিল। জন পামরকে লোকে “Prince of Merchants” অর্থাৎ সওদাগরদের রাজা বলিয়া ডাকিত। তাঁহার মৃত্যুর পর তাঁহার গোরের উপরে “Here lies John Palmer, friend of the poor,” “এখানে দরিদ্র বন্ধু জন পামর আছেন,” কেবল এই বাক্যটি লিখিত হইয়াছিল। কেরি ও মার্শমেন সাহেব খৃষ্টিয় ধর্ম প্রচারক ছিলেন। তাঁহারা শ্রীরামপুরে বাস করিতেন। তাঁহারা বাঙ্গালা অভিধান, বাঙ্গালা সংবাদ পত্র ও উন্নত প্রণালীতে বাঙ্গালা পাঠশালার সৃষ্টিকর্তা ছিলেন। তাঁহারা অনেক প্রকারে বঙ্গ দেশের মহোপকার সাধন করিয়া গিয়াছেন। সে কালের এই সকল সহদয়তা করণ সাহেবেরা চিরকাল বাঙ্গালীদিগের স্মৃতিক্ষেত্রে বিদ্যমান থাকিবেন তাহার সন্দেহ নাই।

অতঃপর সে কালের বাঙ্গালীদের বিষয় বলিতে প্রবৃত্ত হইতেছি। সে কালের বিশেষ বিশেষ শ্রেণীর লোকদিগকে

বর্ণনা করিতে গেলে আমাদের দৃষ্টি গুরু মহাশয়ের উপর প্রথম পতিত হয়। গুরু মহাশয়দিগের শিক্ষাপ্রণালী উন্নত ছিল না এবং তাঁহাদের অবলম্বিত ছাত্রদিগের দণ্ডের বিধানটা বড় কঠোর ছিল। নাড়ুগোপাল অর্থাৎ হাঁঠু গাড়িয়া বসাইয়া হাতে প্রকাণ্ড ইষ্টক অনেক ক্ষণ পর্য্যন্ত রাখানো, বিছুটি গায়ে দেওয়া ইত্যাদি অনেক প্রকার নিম্নদণ্ড প্রদানের রীতি প্রচলিত ছিল। পাঁচ বৎসর বয়স হইতে দশ বৎসর বয়স পর্য্যন্ত তাল পাতে ; তার পর পনের বৎসর বয়স পর্য্যন্ত কলীর পাতে ; তার পর কুড়ি বৎসর বয়স পর্য্যন্ত কাগজে লেখা হইত। সামান্য অঙ্ক কষিতে, সামান্য পত্র লিখিতে ও গুরু দক্ষিণা ও দাতা কর্ণ নামক পুস্তক পড়িতে সক্ষম করা গুরু মহাশয়দিগের শিক্ষার শেষ সীমা ছিল। গুরু মহাশয় অতি ভীষণ পদার্থ ছিলেন। আমার স্মরণ হয়, আমি যখন গুরু মহাশয়ের পাঠশালায় পাঠ করিতাম তখন রামনারায়ণ নামে আমার এক জন সহাধ্যায়ী ছিলেন। তিনি কোন দোষ করিলে, গুরু মহাশয় যখন রামনারায়ণ ! বলিয়া ডাকিতেন, তখন তাঁহার ভয়সূচক একটা শারীরিক ক্রিয়া হইত।

গুরু মহাশয়ের পর আখন্জীকে বর্ণনা করা কর্তব্য। আখন্জী অতি অদ্ভুত পদার্থ ছিলেন। মনে করুন হিন্দুর বাটীর একটা ঘরে মুসলমানের বাসা। তিনি তথায় বৃহদাকার বদনা ও স্তূপাকার পেঁয়াজ লইয়া বসিয়া আছেন। সাগরেদ্রা নিয়ত বশবর্তী। চাকর দ্বারা জল আনয়ন কার্য্য করিয়া লওয়া আখন্জীর মনঃপুত হইত না। তাঁহার সাগরেদ্রাদিগকে কলসী লইয়া জল আনিয়া দিতে হইত। তখন পারশী পড়ার বড় ধুম। তখন পারশী

পড়াই এতদেশীয়দিগের উচ্চতম শিক্ষা বলিয়া পরিগণিত হইত। এই পারশী ভাষা সকল আদালতে চলিত ছিল। ১৮৩৭ খৃষ্টাব্দে তাহার ব্যবহার আদালতে রহিত হয়। পন্দ নামা, গোলেস্তা, বোস্তা, জেলেখা, আল্লামী প্রভৃতি পুস্তক সাধারণ পাঠ্য পুস্তক ছিল। কেহ কেহ আরবি ব্যাকরণ একটু একটু পাঠ করিতেন। আখন্জীর পারশীর উচ্চারণ অতি বিকৃত করিয়া ফেলিয়াছিলেন।

[ এই খানে বক্তা হাফেজের একটা কবিতা আখন্জী-দিগের মত প্রথম উচ্চারণ করিয়া পরে তাহার প্রকৃত ইরাণী উচ্চারণ শ্রোতাদিগকে শুনাইলেন। সে কবিতার অর্থ এই “যদি সেই শিরাজের প্রণয়নী আমার উপহারদত্ত চিত্ত তাঁহার হস্তে গ্রহণ করেন তাহা হইলে তাঁহার সুখের একটি মাত্র কৃষ্ণবর্ণ তিলের জন্ত আমি সমরকন্দ ও বোধারা নগরদ্বয় প্রদান করিতে পারি”। ]

অতঃপর সে কালের ভট্টাচার্য্যগণ আমাদিগের বর্ণনাব বিষয় হইতেছেন। তখনকার ভট্টাচার্য্যগণ অতি সরলস্বভাব ছিলেন। এখনকার ভট্টাচার্য্যগণ যেমন বিষয় বুদ্ধিতে বিষয়ী লোকের ঘাড়ে যান সে কালের ভট্টাচার্য্যেরা সে রূপ ছিলেন না। তাঁহারা সংস্কৃত শাস্ত্র অতি প্রগাঢ় রূপে জানিতেন এবং অতি সরল ও সদাশয় ছিলেন। সে কালের রাজা কৃষ্ণচন্দ্রের সম-কালবর্ত্তী রামনাথ নামে এক জন পণ্ডিত ছিলেন। তিনি নবদ্বীপের নিকটস্থ একটা গ্রামে বাস করিতেন। তিনি রাজ-সভাবিচরণকারী চাটুকার ভট্টাচার্য্যদিগের ন্যায় সভ্যতার নিয়ম পরিজ্ঞাত ছিলেন না। এই জন্য লোকে তাঁহাকে যুনে রামনাথ বলিয়া ডাকিত। এক দিন রাজা কৃষ্ণচন্দ্র অমাত্য

সহিত তাঁহার সহিত সাক্ষাৎ করিতে গেলেন। রাজা তাঁহার অবস্থা দেখিয়া তাঁহাকে কিছু অর্থসাহায্য করিতে ইচ্ছুক হইলেন। কিন্তু তাঁহার কি প্রয়োজন তাহা জানিতে হইবে, এজন্য ইচ্ছিতে জিজ্ঞাসা করিলেন, “মহাশয়ের কিছু অনুপপত্তি আছে?” এখন, ন্যায়শাস্ত্রে অনুপপত্তির অর্থ যাহার কোন সিদ্ধান্ত হয় না। ভট্টাচার্য্য তাহাই বুঝিয়া লইলেন এবং বলিলেন, “তৈক না, আমার কিছুই অনুপপত্তি নাই।” রাজা তাহা বুঝিতে পারিয়া অপেক্ষাকৃত স্পর্শ করিয়া জিজ্ঞাসা করিলেন, “মহাশয়ের কিছু অসঙ্গতি আছে?” এখন অসঙ্গতি শব্দের ন্যায়শাস্ত্রোল্লিখিত অর্থ অসম্ময়। ভট্টাচার্য্য বলিলেন, “না, কিছুই অসঙ্গতি নাই, সকলই সম্ময় করিতে সমর্থ হইয়াছি।” রাজা দেখিলেন, মহা মুগ্ধ। তখন তিনি স্পর্শ করিয়া জিজ্ঞাসা করিলেন, “সাংসারিক বিষয়ে আপনার কোন অনটন আছে?” ব্রাহ্মণ উত্তর করিলেন, “না, কিছুই অনটন নাই; আমার কয়েক বিঘা ভূমি আছে তাহাতে যথেষ্ট ধান্য উৎপন্ন হয়, আর সম্মুখে এই তিস্তিড়ি বৃক্ষ দেখিতেছেন, ইহার পত্র আমার গৃহিণী দিব্য পাক করেন, অতি সুন্দর লাগে, আমি সচ্ছন্দে তাহা দিয়া অন্ন আহার করি।” আমি আশ্চর্য্য হই যে এমন সরল সাধু সম্ভ্রুতচিন্ত ব্যক্তিকে লোকে বুনো বলিত। ইনি যদি বুনো তবে সভ্য কে? আর এক ভট্টাচার্য্য ছিলেন, তাহার স্ত্রী ডাইল পাক করিতেছিলেন। তিনি স্বামীকে রন্ধনশালায় বসাইয়া পুষ্করিণীতে জল আনিতে গেলেন। এ দিকে ডাইল উখলিয়া উঠিল। ভট্টাচার্য্য দেখিলেন, বিষম বিপদ। ডাইল উখলিয়া পড়া কি প্রকারে নিবারণ করিবেন কিছুই স্থির করিতে না পারিয়া হাতে পইতা জড়াইয়া পতনোন্মুখ ডাইলের অব্যব-

হিত উপরিস্থ শূন্যে তাহা স্থাপন করিয়া চণ্ডীপাঠ করিতে লাগিলেন কিন্তু তাহাতেও তাহা নিবারিত হইল না। এমন সময় তাঁহার ব্রাহ্মণী পুষ্করিণী হইতে ফিরিয়া আইলেন। তিনি কহিলেন, “এ কি? ইহাতে একটু তেল ফেলিয়া দিতে পার নাই?” এই বলিয়া তিনি ডাইলে একটু তেল ফেলিয়া দিলেন। ডাইলের উথলিয়া পড়া নিবারিত হইল। এই ব্যাপার দেখিয়া ভট্টাচার্য্য গললগ্নীকৃতবাসা হইয়া করযোড়ে ব্রাহ্মণীকে বলিলেন, “তুমি কে আমার গৃহে অধিষ্ঠিতা বল; অবশ্য কোন দেবী হইবে, নতুবা এই অদ্ভুত ব্যাপার কি প্রকারে সাধন করিতে পারিলে?”। যদ্যপি এই গম্পে বাহুল্য বর্ণনার সুস্পষ্ট চিহ্ন লক্ষিত হইতেছে তথাপি উহা যে, সে কালের ভট্টাচার্য্যদিগের অসামান্য সারল্যের পরিচয় প্রদান করিতেছে তাহার আর সন্দেহ নাই।

অতঃপর সে কালের রাজকর্মচারীদিগের বর্ণনা করিতে প্রবৃত্ত হইতেছি। ইংরাজের আমলের প্রথমে আমলাদিগের বড় প্রাচুর্য্য ছিল। এক এক জন আমলার উপর অনেক কর্মের ভার থাকিত। তাঁহারা অনেক টাকা উপাভাজন করিতেন। এক এক জন দেওয়ান বিপুল অর্থ উপাভাজন করিয়া গিয়াছেন। টাকা নগরের এক জন দেওয়ানের কথা এই রূপ শুনা যায়, তিনি আহারের সময় একটি প্রকাণ্ড ঘণ্টা বাজাইয়া দিতেন, নগরের সমুদয় বাসাড়ে লোক সেই ঘণ্টার রব শুনিয়া তাঁহার বাসায় আসিয়া আহার করিত। তখন ঐ সকল পদ এক প্রকার বংশপরম্পরাগত ছিল। এক জন দেওয়ানের মৃত্যু হইলে প্রায়ই তাঁহার সম্মান অথবা অন্য কোন ঘনিষ্ঠ সম্পর্কীয়

লোক দেওয়ান হইত ! শুনা আছে, কলিকাতার নিকটবর্তী কোন গ্রামবাসী এক দেওয়ানের মৃত্যুর পর তাঁহার সপ্তদশ বৎসর বয়স্ক কনিষ্ঠ ভ্রাতা কানের মাকড়ি ও হাতের বালা খুলিয়া দেওয়ানী করিতে গেলেন। সাহেবেরা তাঁহাদিগের দেওয়ান দিগের প্রতি কি রূপ ব্যবহার করিতেন, তাহা পূর্বে বলিয়াছি। সে সময়ে উৎকোচ লইবার বাড়াবাড়ি ছিল। শুদ্ধ বান্দালীরা যে উৎকোচ লইতেন এমন নহে, বড় বড় সাহেবেরাও উৎকোচ লইতেন। এখন সে রূপ নাই। এ বিষয়ে অবশ্যই উন্নতি দেখিতেছি। এই বিষয়ে পরে আরো বলিব।

পরিশেষে সে কালের ধনী লোকদিগকে বর্ণনা করা হইতেছে। ইহঁরা অত্যন্ত বদান্য ছিলেন। পুস্করিণী খননাদি পূর্তকর্মে তাঁহারা বিশেষ মনোযোগী ছিলেন। তাঁহারা সম্ম্যাসী ও দরিদ্রদিগকে বিলক্ষণ দান করিতেন। তাঁহারা অতিথি-সেবায় তৎপর ছিলেন। তাঁহারা গুণী লোকদিগকে বিলক্ষণ রূপে পালন করিতেন। ব্রাহ্মণ পণ্ডিত ও প্রসিদ্ধ গায়কদিগকে বিশিষ্ট অর্থানুকূল্য করিতেন। কোন কোন স্থলে উপযুক্ত পাত্রে তাঁহাদিগের দানশীলতা প্রযোজিত হইত না বটে কিন্তু তাঁহারা যে অত্যন্ত বদান্য ছিলেন তাহার আর সন্দেহ নাই।

সে কালের ভিন্ন ভিন্ন শ্রেণীর লোকদিগকে সংক্ষেপে বর্ণনা করিলাম। এক্ষণে ইহঁরা সাধারণত দৈনিক জীবন কি প্রকারে যাপন করিতেন ও জীবনের প্রধান কার্য সকল অর্থাৎ ধর্ম্মানুষ্ঠান, বিষয় কর্ম্ম ও আমোদ সম্ভোগ কি রূপে করিতেন, তদ্বিষয়ে বলিলেই সে কালের চিত্র সম্পূর্ণ হয়।

সে কালের রাজকর্ম্মচারী ব্যতীত অপর সাধারণ লোকে কি

রূপে দৈনিক জীবনযাপন করিত তাহা বর্ণনা করা যাইতেছে। জীবনোপায়ের মূলভিত্তি প্রযুক্ত তাঁহারা দলাদলি, ক্রীড়া কৌতুক ও কথকতা শ্রবণে কাল যাপন করিতেন। কথকতা অতি শ্রবণযোগ্য ব্যাপার। ভাল কথকের আশ্চর্য ক্ষমতা দেখা গিয়াছে। বড় বড় তাঁত কাটা এজুকে\* রামধন ও শ্রীধর কথকের কথা শুনিয়া অশ্রুপাত করিতে দৃষ্ট হইয়াছে। ইওরোপে স্কুলে বাগ্মিতা বিষয়ে শিক্ষা দেওয়া হয়। আমাদিগের মধ্যে পূর্বে কথকতা শিখিলেই বাগ্মিতা শিখা হইত। কথকতা প্রকৃত বাগ্মিতার কার্য্য। চুংখের বিষয় এই যে এই কথকতার ক্রমে লোপ হইতেছে। কথকতা রীতি থাকিয়া বিষয় ও প্রণালীতে তাহার উৎকর্ষ সাধিত হয় ইহাই বাঞ্ছনীয়।

এক্ষণে সে কালের লোকেরা জীবনের প্রধান কার্য্য সকল অর্থাৎ ধর্ম্মানুষ্ঠান, বিষয়কর্ষ ও আমোদ সম্ভোগ কিরূপে করিতেন তাহা বর্ণিত হইতেছে।

সে কালের লোকদিগের ধর্ম্মের প্রতি বিশেষ আস্থা দৃষ্ট হইত। তাঁহারা যে রূপ বিশ্বাস করিতেন তদনুরূপ কার্য্য করিতেন। তাঁহারা হিন্দুধর্ম্মের নিয়ম সকল যত্নপূর্ব্বক পালন করিতেন—প্রাণপণে পালন করিতেন। হিন্দুধর্ম্মের নিয়ম না ভঙ্গ হয় এ বিষয়ে তাঁহারা বড় সাবধান ছিলেন। রাজা সর রাধাকান্ত দেব বাহাদুর পূজার সময় সাহেবদিগকে আহারের নিমন্ত্রণ করিতেন বলিয়া অন্যান্য হিন্দুগণ তাঁহার উপর বড় বিরক্ত হইয়াছিলেন। সে কালে ধর্ম্মবিষয়ে ভিতরে একখান বাহিরে একখান এরূপ ছিল না। এক্ষণে যেমন দালানে পূজা হইতেছে, বৈঠকখানায় মদ্যপান ও

\* “এজু” শব্দ ইংরাজী “Educated” শব্দের অপভ্রংশ।

উইলসনের দোকানের খানা চলিতেছে, অন্তরে দেব দেবীতে বিশ্বাস নাই, কিন্তু সম্ভ্রম রক্ষার জন্য বাহ্য ঠাট বজায় রাখিতে হইবে, সে কালে এমন্তৃত ব্যাপার দৃষ্ট হইত না।\*

সে কালের বিষয়ী লোকেরা কি রূপ বিষয় কৰ্ম সম্পাদন করিতেন তাহা সে কালের বিষয়ী লোকদিগের বর্ণনায় বর্ণিত হইয়াছে। এখানে আর তাহার পুনরুল্লেখ করিবার আবশ্যক করে না।

সে কালের আমোদ বর্ণনে আমি এক্ষণে প্রবৃত্ত হইতেছি। কবি, শত্রা, পাঁচালি প্রভৃতি সে কালের প্রধান আমোদ ছিল। তাহার মধ্যে কবি প্রধান। হরু ঠাকুর, নিতে বৈষ্ণব, রাসু নসিং, রাম বসু, ভবানী বেণে, ইহাঁদিগের কবিতা সৰ্বত্র বড় আদরের বস্তু ছিল। কবির ঈশ্বরচন্দ্র গুপ্ত মহাশয় বল্ল যত্রে ইহাঁদের অনেক গুলি কবিতা সংগ্রহ করিয়া প্রভাকরে প্রকাশ করিয়াছিলেন। তিনি নিতে বৈষ্ণব অর্থাৎ নিতাইদাস বৈরাগী সম্বন্ধে লিখিয়াছেন।

“ধনী লোক মাত্রেই কোন পর্সাহ উপলক্ষে কবিতা শুনিবার ইচ্ছা হইলে অগ্রেই নিতাই দাসকে বায়না দিতেন ; ইহার সহিত ভবানী বেণের সঙ্গীতযুদ্ধ ভাল হইত। যথা—প্রচলিত কথা—‘নিতে বৈষ্ণবের লড়াই’। এক দিবস ও দুই দিবসের পথ হইতেও লোক সকল নিতে ভবানের লড়াই শুনিতে আসিত। যাহার বাটীতে গাহনা হইত তাঁহার গৃহে লোকারণ্য

\* গত পূজার সময় ( এই বক্তৃতা করিবার সাত মাস পরে ) এই অদ্ভুত বিজ্ঞাপন একটি সম্বাদ পত্রে প্রকাশিত হইয়াছিল।

হইত, ভিড়ের মধ্য ভেদ করিয়া প্রবেশ করিতে হইলে প্রাণান্ত হইত, তৎকালে যদিও অন্যান্য দল ছিল কিন্তু হক ঠাকুর, নিতাই দাস, এবং ভবানী বণিক এই তিন জনের দল সর্বাধিক প্রধান রূপে গণ্য ছিল। এই নিত্যানন্দের গোড়া কত ছিল তাহার সংখ্যা করা যায় না। কুমারহট্ট, ভাটপাড়া, ত্রিবেণী, বালী, করাশডাঙ্গা, চুঁচুড়া প্রভৃতি নিকটস্থ ও দূরস্থ সমস্ত গ্রামের প্রায় সমস্ত ভদ্র ও অভদ্র লোক নিত্যায়ের নামে ও ভাবে গদ গদ হইতেন। নিতাই দাস জয়লাভ করিলে ইহঁরা যেন ইন্দ্রত্ব পাইতেন। পরাজয় হইলে পরিতাপের সীমা থাকিত না। যেন হতসর্কস্ব হইতেন এমনি জ্ঞান করিতেন। অনেকের আহাৰ নিদ্রা রহিত হইত। কত স্থানে কত বার গোঁড়ায় গোঁড়ায় লাঠালাঠি কাটাকাটি হইয়া গিয়াছে। অন্য পরে কা কথা, ভাটপাড়ার ঠাকুর মহাশয়েরা নিত্যানন্দকে ‘নিত্যানন্দ প্রভু’ বলিয়া সম্বোধন করিতেন। ইহঁার গাহনার প্রাক্কালে প্রভু উঠেছেন বলিয়াই গোঁড়ারা ঢল ঢল হইত। নিত্যায়ের এই এক প্রধান গুণ ছিল যে ভদ্রাভদ্র তাবল্লোককেই সমভাবে সম্বন্ধ করিতে পারিতেন।”

কবিওয়ালাদিগের এক একটী কবিতা এমন যে শুনিলে আশ্চর্য্য হইতে হয়। হক ঠাকুরের একটী কবিতাতে এই রূপ উক্তি দেখা যায়—

“নাম প্রেম তার, সাকার নহে, বস্তুটী সে নিরাকার,  
জীবন, ঘেঁ বন, ধন কিবা মন, প্রাণ বশীভূত তার।

সুখে লোক বলয়ে পিরিতি সুখের সার ;

প্রাণের বাহিরও হয় সে যখন জীবনে যেন মরে রই ॥”

কি চমৎকার ভাব! ইহা প্লেটো অথবা কোলরিজের উপ-  
যুক্ত! কোলরিজ এক স্থানে বলিয়াছেন—

“All thoughts, all passions, all delights,  
Whatever stirs this mortal frame  
Are all but ministers of love  
And feed his sacred flame.”

হক ঠাকুরের কবিতাটি ইহা অপেক্ষা নিরুপ-  
বস্তু এক স্থানে কোন সাক্ষী স্ত্রীর বিরহযন্ত্রণা বর্ণনা করিয়াছেন—

“মনে তৈল সহ মনের বেদনা।

প্রবাসে যখন যায় গো সে, তারে বলি বলি,

আর বলা হলো না।

সরমে মরমের কথা কওয়া গেল না।

যদি নারি হয়ে সাধিতাম তারে,

নির্লজ্জা রমণী বলে হাসিতো লোকে।

সখী ধিক্ ধিক্ আমারে, ধিক্ সে বিধাতারে,

নারী জন্ম যেন করে না।

একে আমার এই যৌবন কাল, তাহে কাল বসন্ত এলো,

এসময় প্রাণনাথ প্রবাসে গেলো।

যখন হাসি হাসি সে আসি বলে,

সে হাসি দেখিয়ে ভাসি নয়নজলে,

তারে পারি কি ছেড়ে দিতে, মন চায় ধরিতে,

লজ্জা বলে ছি ছি ধরো না” ॥

কি বিশুদ্ধ দাম্পত্য প্রেম! সাক্ষী কুলকামিনীদিগের লজ্জার  
কি অনোহর চিত্র! রাম বস্তু কোন স্ত্রীর উক্তিচ্ছলে বলিয়াছেন

“বসন্তে শুধাও সখি নাথের মঙ্গল কি ?

কাল আসিব বলে নাথ করেছে গমন,

ভাগ্যদোষে যদি সে হল মিথ্যাবাদী চারা কি এখন ?

পতি গতি মুক্তি অবলার, সুখ মোক্ষ সে গো আমার,

তাহার কুশল শুনে কুশলে কুল রাখি ।”

রাম বসু অন্য এক স্থানে লম্পট স্বামীর প্রতি স্ত্রীর উক্তি-  
চ্ছলে বলিয়াছেন,

“প্রাণ ! তুমি আপনার নহ, আমার কি হবে !”

এই সামান্য বাক্যে কি গভীর মানব-স্বভাব-তত্ত্ব নিহিত রাহি-  
য়াছে ! নিতাই দাস বৈরাগী এক স্থানে বলিয়াছেন—

“বিধি এক চিতে, ভাবিতে ভাবিতে,

এ তিন অক্ষর, করিল সংযোগ

রনিকের সুখ আশ্রয়” ।

সে তিন অক্ষর পি, রী, তি । যে ব্যক্তি এই কবিতাটি উক্ত  
করিয়াছেন, তিনি বিশুদ্ধ প্রেমের মহত্ত্ব ও দেবভাব অবশ্যই  
পরিজ্ঞাত ছিলেন । এ কবিতাটি ঈশ্বরচন্দ্র গুপ্তের সংগ্রহে  
নাই ; কোন লোকের মুখে পাইয়াছি । মধ্যে মধ্যে কবিতা-  
ওয়ালারা উচ্চ দার্শনিক ভাবেও আরোহণ করিতেন । গোঁজলা  
গুঁই নামে একজন কবিওয়ালার স্বামীর উক্তিচ্ছলে বলিয়াছেন,

“তোমাতে আমাতে একই অঙ্গ,

তুমি কমলিনী আমি সে ভৃঙ্গ,

অনুमानে বুঝি আমি সে ভুজঙ্গ,

তুমি আমার তায় রতনমণি ।

তোমাতে আমাতে একই কান্না,

আমি দেহ, প্রাণ! তুমি লো ছায়া,  
আমি মহাপ্রাণী, তুমি লো মায়া,  
মনে মনে ভেবে দেখ আপনি।”

কবিওয়ালারা কেবল আমোদজনক কবিতা গান করিতেন এমন নহে, কবি গাইবার সময় পরমার্থভাবপূরিত সঙ্গীতও গাইতেন। হক ঠাকুরের রচিত এইরূপ একটি গান আছে—

“হরিনাম লইতে অলস করো না রসনা, যা হবার তাই হবে।

ভবের তরঙ্গ বেড়েছে বলে কি চেউ দেখে লা ডুবাবে”

(পাঠান্তর) “ঐহিকের সুখ হলো না বলে কি চেউ দেখে লা ডুবাবে”

কবিবর ঈশ্বরচন্দ্র গুপ্ত এই গীত সম্বন্ধে বলিয়াছেন “কি মনো-  
হর! কি মোহহর! কি মোহকর! শ্রবণ অথবা কীর্তন মাত্রেই  
অশ্রুপতন ও রোমাঞ্চ হইতে থাকে। অতি মূঢ় পাষাণ ব্যক্তি-  
রও হৃদয় আর্দ্র হয়। আবালবৃদ্ধবনিতামাত্রেই মুগ্ধ হইতে  
থাকেন। সকলেরই অন্তঃকরণে প্রেমের উদয় হয়, সকলেই  
চমকিত হইয়া মরণ স্মরণ করে; মনের সমুদয় মোহ বিকার হরণ  
পূর্বক ভাব ভক্তি ও জ্ঞানের প্রভাবে মরণ-হরণ-চরণ-স্মরণ  
করিতে থাকে। যেখানে যে বাদ্যালী মহাশয় বিরাজ করিতে  
ছেন, তিনি সেই খানেই বিশেষ বিবেকের অবস্থায় ঐ নাম-  
সংকীর্তন কীর্তন করিয়া থাকেন। ঐ নাম কত ভিক্ষুকের উপ-  
জীব্য হইয়াছে, তাহার সংখ্যা হয় না। কি ইতর, কি ভদ্র,  
তাবতেই এতৎ গানে প্রেমিক হইয়া থাকেন। ইহার মধ্যে  
কি এক নিগূঢ় মধুরত্ব আছে, তাহা আমি বচনে ব্যক্ত করণে  
অশক্ত হইলাম”। ঈশ্বরচন্দ্র গুপ্তের এই কথা অতি যথার্থ।

এই সকল কবিওয়ালারা তখনকার বিশেষ প্রতিপন্ন ব্যক্তি

ছিলেন। ইহাদের মধ্যে এক জন অদ্ভুত ব্যক্তির কথা উল্লেখ করা হয় নাই। তাঁহার নাম আন্টুনি ফিরিস্কী। এক জন ফিরিস্কী হিন্দু-কবিওয়লাদিগের দলে প্রবিষ্ট হইয়া খ্যাতি লাভ করিয়াছিল এই আশ্চর্য্য! শুনা গিয়াছে, আন্টুনি ফরাসডাক্সার এক জন সম্ভ্রান্ত ফরাশিসের পুত্র। তিনি যৌবনের প্রারম্ভে ফরাসডাক্সার বিখ্যাত গাঁজিয়ালদিগের সংসর্গে পড়িয়া বয়ে গিয়াছিলেন। তৎপরে কবিওয়লাদিগের দলে প্রবিষ্ট হইয়া একজন বিখ্যাত কবিওয়লা হইয়া উঠিয়াছিলেন। তিনি দুর্গার প্রতি উক্তি করিয়া বলিয়াছিলেন—

“যদি দয়া করে তার মোরে এ ভবে, মাতঙ্গী!

ভজন সাধন জানি না, মা! জেতেতে ফিরিস্কী”

পুনরায়—

“আন্টুনি ফিরিস্কী বলে, নিদান কালে মা,

দিও চরণ দুখানি দিও চরণ দুখানি।”

যখন বঙ্গসমাজ এই রূপে চলিতেছিল, তখন ইহা পরিবর্তন করিতে এক ব্যক্তি বিশেষ চেষ্টাশ্রিত ছিলেন। তিনি কে, না, স্কুলমাস্টার। প্রথমে তাঁহার বেশ ভূষা অদ্ভুত, ইংরাজী উচ্চারণ কদাকার, শিক্ষাপ্রণালী অপকৃষ্ট ছিল। রাজা সর রাধাকান্ত দেব বাহাদুরকে একজন ইংরাজী পড়াইতেন। তিনি যখন পড়াইতে আসিতেন, তখন জরির জুতা ও মতির মালা পরিয়া আসিতেন। এখন একবার মনে করে দেখুন দেখি, প্রেসিডেন্সি কলেজের একজন বাঙ্গালী অধ্যাপক মতির মালা গলায় ও জরির জুতা পায় দিয়া বসিয়া পড়াইতেছেন, কি চমৎকার বোধ হয়! সর্বপ্রথমে লোকের ইংরাজী পড়িতে হইলে টাম্‌স্‌ ডিম্‌

প্রণীত স্পেলিং বুক, স্কুলমাস্টার, কামরূপা ও তুতিনামা এই সকল পুস্তক পাঠ করিতে হইত। “স্কুল মাস্টার” পুস্তকে সকলই ছিল, গ্রামার, স্পেলিং ও রীডার। কামরূপাতে এক রাজপুত্রের গম্পা লিখিত ছিল। তুতি নামা ঐ নামের পারসিক পুস্তকের ইংরাজী অনুবাদ। কেহ যদি অত্যন্ত অধিক পড়িতেন, তিনি আরবি নাইট পড়িতেন। যিনি রয়ল গ্রামার পড়িতেন, লোকে মনে করিত তাঁহার মত বিদ্বান আর কেহ নাই। Grammar, Logic ও Rhetoric অর্থাৎ ব্যাকরণ, ন্যায় ও অলঙ্কার এই তিন বিষয়ে তখন কতকগুলি উত্তম পুস্তক রচিত হইয়াছিল। তাহাদের নাম Port Royal Grammar, Port Royal Logic ইত্যাদি। লোকে বলিত “রয়েল গ্রামার ময়াল সাপ”; যেমন ময়াল সাপ বৃহৎ সাপ, তেমনি রয়ল গ্রামার পড়া অনেক বিচার কর্খ। তখন স্পেলিংএর প্রতি লোকের বড় মনোযোগ ছিল। বিবাহ সভায় এই বিষয়ে বড় পীড়াপীড়ি হইত। কেহ জিজ্ঞাসা করিতেন, How do you spell Nebuchadnezzar? কেহ জিজ্ঞাসা করিতেন, How do you spell Xerxes? ঐ সকল শব্দ ও Xenophon, Kamschatka প্রভৃতি শব্দের বানান জিজ্ঞাসা দ্বারা লোকের বিচার পরীক্ষা হইত। তখন ঐ রূপ সভায় ইংরাজীওয়ালারা পরস্পর এই বলিয়া নাম জিজ্ঞাসা করিতেন, “What denomination put your papa?”। তখন শব্দের অর্থ মুখস্থ করিবার বিবিধ প্রাণালী ছিল। যথা—(এক একটা শব্দের এক একটি অর্থ)।

গাড (God)

ঈশ্বর।

লাউ (Lord)

ঈশ্বর।

কম্ (Come)

আইস !

গো (Go)

যাও !

আই (I)

আমি !

ইউ (You)

তুমি !

ইত্যাদি ! এক একটা ইংরাজী শব্দের কতকগুলি অর্থও একেবারে সাধিতে হইত ! যথা ; Well—আচ্ছা-ভাল-পাতকো , Bear—সহ-বহ-ভল্লুক ! সে কালের লোকেরা বাহার উচ্চারণ সমান মনে করিতেন এমন কতকগুলি ইংরাজী শব্দের ভিন্ন ভিন্ন অর্থ একবারে অভ্যাস করিতেন । যথা—ফ্লোর (Flower) ফুল ; ফ্লোর (Flour) ময়দা, ফ্লোর (Floor) মেজে ! তাঁহারা “Flower” “Flour” ও “Floor” এই তিন শব্দ এক রকম উচ্চারণ করিতেন ! তখন লোকে ডিক্শনারি মুখস্থ করিত ! তাঁহারা এক এক জনে Walking Dictionary অর্থাৎ সচল অভিধান ছিলেন ! মনে করুন ডিক্শনারি মুখস্থ করা কি বিষম ব্যাপার ! তখন ঘোষাণোর রীতি ছিল । ঘোষাণোর অর্থ পয়ার ছন্দে গ্রথিত কোন দ্রব্য শ্রেণীর অন্তর্গত সমস্ত দ্রব্যের ইংরাজী নাম স্মরণ করিয়া মুখস্থ বলা ! আপনি এক স্কুল দেখিতে গেলেন ; স্কুলমাস্টার আপনাকে জিজ্ঞাসা করিলেন, “কি ঘোষাব ? গেডেন্ (Garden) ঘোষাব, না স্পাইস্ (Spice) ঘোষাব ?” ইহার অর্থ, উদ্যান-জাত সকল দ্রব্যের নাম মুখস্থ বলাব, না সকল মশলার নাম মুখস্থ বলাব ? যদি স্থির হইল গেডেন ঘোষাও তবে সর্দার পোড়ো চাঁচিয়ে বলিল ; “পম্পকিন্ (Pumpkin) লাউ কুম্ড়ো ;” অমনি আর সকলে বলিয়া উঠিল, “পম্পকিন্—লাউ কুম্ড়ো” !—সর্দার পোড়ো বলিল “কোকোম্বর (Cucumber) শসা” ; আর

সকলে অমনি বলিল “কোকোষর শস্য” । সর্দার পোড়ো বলিল “ব্রিঞ্জেল ( Brinjal ) বার্তাকু ; ” আর সকলে অমনি বলিল “ব্রিঞ্জেল বার্তাকু” । সর্দার পড়ো বলিল “প্লোমেন (Ploughman) চাষা ; ” আর সকলে অমনি বলিল “প্লোমেন চাষা” । এই সকল শব্দ গুলি একত্র করিলে একটি কবিতা উৎপন্ন হয় ।—

পম্বকিন্ লাউ কুহড়া, কোকোষর শস্য ।

ব্রিঞ্জেল বার্তাকু, প্লোমেন্ চাষা ॥

কখন কখন সঙ্গীত আকারে ইংরাজী শব্দের বাঙ্গালী অর্থ বসান হইত । যথা—

খাষাজ রাগিণী, তাল ঠুংরি ।

নাই (Nigh) কাছে, নিয়র (Near) কাছে, নিয়রেস্ট (Nearest) অতি কাছে ।

কট্ (Cut) কাট্, কট্ (Cot) খাট্, ফলোয়িং (Following) \_প্রাছে ।

এ ছাড়া আবার “আরবি নাইটের পালা” হইত, অর্থাৎ তবলা ঢোলক মন্দিরা লইয়া ইংরাজী পয়্যারে লিখিত আরবিয়ান্ নাইটের গম্প বাসায় বাসায় গান করিয়া বেড়ান হইত ।

“ The chronicles of the Sassanians

That extended their dominions.”

এই রূপ পয়্যারে উল্লিখিত আরবি নাইটের পালা রচিত হইত ।

ইংরাজদিগের যে সকল সরকার থাকিত তাহাদের ভাষা ও কথোপকথন আরো চমৎকার ছিল । এক জন সাহেব তাঁহার সরকারের উপর ক্রুদ্ধ হইয়াছেন । সরকার বলিল—মাফের

ক্যান্ লিভ্, মাস্টার ক্যান্ ডাই ! ( Master can live, master can die ) অর্থাৎ মনিব আমাকে বাঁচাইয়া রাখিতে পারেন, অথবা মারিয়া ফেলিতে পাবেন ! সাহেব “What, master can die ?” এই কথা বলিয়া সরকারকে মারিবার জন্য লাঠি উচাইলেন ! সরকারের তখন মনে পড়িল, “ডাই” শব্দের অন্য অর্থ আছে, তখন ‘স্টোপ দেয়ার’ “(Stop there)” অর্থাৎ প্রহার করিতে লাঠি উঠাইও না এই বলিয়া হাত উচু করিল, তৎপরে অঙ্গুলি দ্বারা আপনাকে দেখাইয়া বলিল, “ডাই মি” (Die me ) অর্থাৎ আমাকে মারিয়া ফেলিতে পারেন ! “ইফ্ মাস্টার ডাই দেন আই ডাই, মাই কো ডাই, মাই ব্লাক স্টোন ডাই, মাই ফোরটীন জেনেরেশন ডাই” ! “If master die then I die, my cow die, my blackstone die, my fourteen generation die !” “যত্খণি মনিব মরেন, তবে আমি মরিব, আমার কো অর্থাৎ গরু \* মরিবে, আমার ব্লাক স্টোন অর্থাৎ বাড়ীর শালগ্রাম ঠাকুর মরিবেন, আমার ফোরটিন জেনেরেশন অর্থাৎ চোদ্দ পুরুষ মরিবে” ! একবার রথের দিবস এক সরকার কানাই করে । পর দিন সে আইলে সাহেব জিজ্ঞাসা করিলেন, “কাল কেন আইস নাই” ? সরকার রথের ব্যাপার কিরূপে বুঝাইবে ভাবিয়া আকুল ! শেষে বলিয়া উঠিল, “চর্চ” (Church) ! রথের আকার গির্জার মত, তাই এই কথাটি বুঝাইবার পক্ষে বড় উপায় হইল ! কিন্তু চর্চ বলিলে ইটের গাথুনি বুঝায়, এজন্য পরক্ষণেই বলা হইল “উডেন চর্চ” অর্থাৎ কাষ্ঠের গিরজা । তাহা হইলেও

\* এই দেশে কাউ শব্দের ভাগ্য তিন বার পরিবর্তিত হয় । প্রথমে উহার উচ্চারণ কো ছিল পরে কৌ হয় তাহার পর এক্ষণে কাউ হইয়াছে ।

বুঝি গেল না ; তখন তাহাকে আরো ব্যাখ্যা করিতে হইল—  
 “থ্রি ষ্টোরিস্ হাই।” “Three stories high,” “গাড আলমাইটী  
 সিট্ অপন” (God Almighty sit upon) অর্থাৎ জগন্নাথ দেব  
 বসিয়া আছেন, “লাং লাং রোপ” (Long long rope) “থোজু  
 মেন ক্যাচ (Thousand men catch), “পুল পুল পুল) Pull,  
 pull, pull), “রনাওয়ে রনাওয়ে” (Run away run away),  
 “হরি হরি বোল—হরি হরি বোল” ।

ইংরাজি শিক্ষার এই দুর্দশা হিন্দুকলেজ সংস্থাপিত হইলে  
 বিমোচিত হইল । ১৮১৬ খৃষ্টাব্দে সর জন হাইড ইষ্ট (Sir John  
 Hyde East) এবং ডেবিড হেয়ার (David Hare) এই মহাত্মা-  
 দ্বয় প্রথমে ঐ কলেজ সংস্থাপিত করেন । উহার অন্য নাম মহা-  
 বিদ্যালয় । হিন্দুকলেজ বস্তুতঃ মহাবিদ্যালয় নামেরই উপযুক্ত  
 ছিল । সর জন হাইড ইষ্ট সুপ্রীম কোর্টের জজ ছিলেন । ডেবিড  
 হেয়ারের সংক্ষেপ বৃত্তান্ত পূর্বে বলিয়াছি । এই দুই লোক-  
 হিতৈষী উদারাময় মহাত্মা ব্যক্তির যত্নে হিন্দুকলেজ সংস্থাপিত  
 হয় । ঐ বিদ্যালয় এতদেশীয়দিগের টাকায় সংস্থাপিত হয় ।  
 প্রথমতঃ কেবল এতদেশীয়গণ তাহার অধ্যক্ষ ছিলেন । কেবল  
 তাঁহারাি উহার তত্ত্বাবধান করিতেন । তাঁহারা উপযুক্ত রূপে  
 উহার অধ্যক্ষতা কার্য্য নির্বাহ করিতেন । পরে গবর্নমেন্ট  
 তাঁহাদিগের হস্ত হইতে উহার কার্য্যভার বিশেষ ইংরাজী কোর্শল  
 প্রয়োগ দ্বারা কাড়িয়া লইয়া স্বহস্তে গ্রহণ করেন ।

এই সময় হইতে ইংরাজী শিক্ষার প্রভাবে নব ভাব হিন্দু  
 সমাজে প্রবিক্ত হয় ও সেই ভাব এখনও কার্য্য করিতেছে ।  
 কিন্তু হিন্দুসমাজের বর্তমান পরিবর্তনের মূল কারণ অনুসন্ধান

করিতে গেলে, কেবল ইংরাজী শিক্ষার প্রবর্তনা যে উহার একমাত্র কারণ বলিয়া নির্দেশ করা যাইতে পারে, এমত নহে। আর একটি ঘটনা উহার একটি প্রধান কারণ স্বরূপ গণ্য করা কর্তব্য অর্থাৎ রামমোহন রায় দ্বারা ব্রাহ্মসমাজ সংস্থাপন। সমুদায় হিন্দু শাস্ত্র হইতে প্রমাণ উদ্ধৃত করিয়া রামমোহন রায় এই সত্য প্রতিপাদন করিয়াছিলেন যে ঈশ্বর একমাত্র নিরাকার। তাহাতে অনেকে এইরূপ মনে করিলেন, ইহাতে হিন্দুধর্ম একেবারে নষ্ট হইবে। কিন্তু তাঁহারা বুঝিতে পারেন নাই যে ইহা দ্বারাই হিন্দুধর্ম প্রকৃত রূপে রক্ষিত হইবে।

একগণে ইংরাজী শিক্ষা হিন্দুসমাজে কিরূপ কার্য্য করিয়াছিল তাহার বিবরণ করা যাইতেছে।

হিন্দুকলেজ হইতে প্রথম যে যুবকদল বহির্গত হইলেন, তাঁহারা প্রাচীন হিন্দুধর্মে ও হিন্দু রীতি নীতিতে অনেক দোষ অনুভব করিতে সমর্থ হইয়াছিলেন। ইহার প্রধান কারণ হিন্দু কলেজের শিক্ষক ডিরোজিও সাহেবের উপদেশ। ডিরোজিও সাহেব একজন ফিরঙ্গী ছিলেন। তিনি কলেজের চতুর্থ শিক্ষক ছিলেন। কিন্তু ছাত্রেরা তাঁহাকেই অধিক চিনিত, প্রধান শিক্ষককে তত চিনিত না। তিনি প্রগাঢ় বিদ্যা ও অকিত্রিম স্বৈহ দ্বারা ছাত্রদিগকে এমন বশীভূত করিয়াছিলেন যে তাঁহাকে তাহারা ছাড়িতে চাহিত না। তিনি অতি প্রিয়-স্বদ ও সুকবি ছিলেন। হিন্দু কলেজের ভিতর এক বার একটি তামাসা হইতে ছিল। একটি বালক তাঁহার সম্মুখে তাঁহাকে আড়াল করিয়া তামাসা দেখিতেছিল। তিনি বলিলেন, “My boy ! you are not transparent” “প্রিয় বালক ! তুমি

স্বচ্ছ পদার্থ নহ !” তাঁহার এই দেশে জন্ম ছিল ! কিন্তু অন্যান্য ফিরিকী যেমন বলে, “মোদের বিলাত,” তিনি সেরূপ বলিতেন না ! এই দেশকে তিনি স্বদেশ জ্ঞান করিয়া ইহার প্রতি যথেষ্ট মমতা করিতেন ! তাঁহার একটা কবিতাতে তাঁহার স্বদেশানুরাগের অত্যাশ্চর্য পরিচয় প্রাপ্ত হওয়া যায় ! সে কবিতাটি তাঁহার রচিত ভারতবর্ষের একটি পুরাতন-আখ্যান-মূলক কাব্যের মুখবন্ধ ।

“ My country ! in thy days of glory past  
 A beauteous halo circled round thy brow,  
 And worshipped as a deity thou wast—  
 Where is that glory, where that reverence now ?  
 Thy eagle pinion is chained down at last  
 And grovelling in the lowly dust art thou :  
 Thy minstrel hath no wreath to weave for thee.  
 Save the sad story of thy misery !  
 Well—let me dive into the depths of time  
 And bring from out the ages that have rolled  
 A few small fragments of those wrecks sublime  
 Which human eye may never more behold ;  
 And let the guerdon of my labour be,  
 My fallen country ! one kind wish for thee”

“স্বদেশ আমার ! কিবা জ্যোতির মণ্ডলী  
 ভূষিতো ললাট তব ; অস্ত্রে গেছে চলি  
 সে দিন তোমার ; হায় ! সেই দিন যবে

দেবতা সমান পূজ্য ছিলে এই ভবে !  
 কোথায় সে বন্দ্যপদ ! মহিমা কোথায় !  
 গগণবিহারী পক্ষী ভূমিতে লুটায় !  
 বন্দীগণ বিরচিত গীত উপহার  
 দুঃখের কাহিনী বিনা কিবা আছে আর ?  
 দেখি দেখি কালার্ণবে হইয়া মগন  
 অশ্রুবিয়া পাই যদি বিলুপ্ত রতন !  
 কিছু যদি পাই তার ভগ্ন অবশেষ  
 আর কিছু পরে যার না রহিবে লেশ !  
 এ শ্রমের এই মাত্র পুরস্কার গণি,  
 তব শুভ ধ্যায় লোকে, অভাগা জননি !

দুঃখের বিষয় এই যে একজন ফিরিঙ্গী ভারতবর্ষকে এমন  
 প্রেমের চক্ষে দেখিতেন কিন্তু এক্ষণকার কোন কোন হিন্দু-  
 সম্ভ্রান্তকে সেরূপ করিতে দেখা যায় না ! ডিরোজিওর স্বদেশ-  
 নুরাগ, তাঁহার সনাশয়তা, তাঁহার প্রগাঢ় বিদ্যা ও জ্ঞান দেখিয়া  
 তাঁহার কতগুলি ছাত্র এমন মুগ্ধ হইয়াছিল যে তাহারা সর্বদাই  
 তাঁহার সহবাসে থাকিতে ভাল বাসিত ! তিনি কলেজে ধর্ম  
 ও সমাজ বিষয়ে উপদেশ দিতেন, তজ্জন্য কলেজের অধ্যক্ষেরা  
 তাঁহার প্রতি বিরক্ত হওয়াতে তিনি রাত্রিতে আপনার ইটালিস্থ  
 বাসায় উপদেশ দিবার নিয়ম করিলেন ! তাঁহার ছাত্রেরা  
 তাঁহাকে এমনি ভাল বাসিত যে অন্ধকার রাত্রি ঝড় বৃষ্টি

---

\* এই অনুবাদের জন্য শ্রীযুক্ত বাবু দ্বিজেন্দ্রনাথ ঠাকুর মহাশয়ের  
 নিকট আমি ঋণী আছি।

ছুর্যোগ হইলেও তাহাদিগের মধ্যে কেহ কেহ বাগবাজার হইতে ইটালী যাইতে সঙ্কোচ করিত না। ডিরোজিওর শিষ্যেরা তাঁহার নিকট হইতে যে পাশ্চাত্য আলোক প্রাপ্ত হইয়াছিল, তাহা তাহাদিগের মস্তক ঘূর্ণিত করিয়া দিয়াছিল। তাহারা হিন্দুসমাজের নিয়ম সকল অবহেলা করিতে লাগিল। ডিরোজিওর শিষ্যগণের আচরণ হেতু তাঁহার অত্যন্ত নিন্দা হইতে লাগিল এজন্য মহাবিদ্যালয়ের অধ্যক্ষেরা তাঁহাকে কর্ম্যচ্যুত করেন। হিন্দুকলেজ হইতে বহিষ্কৃত হইবার কিছুদিন পরে ডিরোজিও সাহেবের মৃত্যু হয়। যখন তাঁহার মৃত্যু হয় তখন তাঁহার বয়ঃক্রম তেইশ বৎসর মাত্র ছিল।

তখনকার সময়গুণে ডিরোজিওর যুবকশিষ্যদিগের এমনি সংস্কার হইয়াছিল যে, মদ খাওয়া ও খানা খাওয়া সুসংস্কৃত ও জ্ঞানালোকসম্পন্ন মনের কার্য্য। তাঁহারা মনে করিতেন, এক এক গ্লাস মদ খাওয়া কুসংস্কারের উপর জয়লাভ করা। কেহ কেহ উদ্ধত বেশে দোকানদারদের নিকটে গিয়া বলিতেন, “গোক খেতে পারিস্? গোক খেতে পারিস্?” এই রূপে প্রচলিত রীতি নীতির মস্তকে পদাঘাত করিয়া তাঁহারা মহা আশ্ফালন করিয়া বেড়াইতেন। একবার তাঁহাদের মন্ত্ৰণা হইল, মুসলমানের দোকানের বিস্কুট খেতে হবে। কয়েক দিন মন্ত্ৰণাই হয়, কাজে কেহ অগ্রসর হইতে পারেন না। একদিন, অদ্য এই কার্য্য সমাধা করিতেই হইবে, এইরূপ স্থিরপ্রতিজ্ঞ হইয়া তাঁহারা গৃহ হইতে বহির্গত হইলেন। মুসলমানের দোকানের সম্মুখে আইলেন কিন্তু তাহার ভিতর প্রবেশ না করিয়া পথের উপরে সর্ব্বলে দাঁড়াইয়া ভাবিতে লাগিলেন। এগিয়ে গিয়ে বিস্কুট

কিনিয়া লইয়া আইসেন, তা কাহারও সাহস হয় না। শেষে এক জন অপেক্ষাকৃত অধিক সাহসী পুরুষ এগুলেন। কিন্তু তাঁহার পা কাঁপিতে লাগিল। আন্তে আন্তে দোকানের ভিতরে গিয়া বিস্কুট নিয়ে যেমন তিনি বেরলেন অমনি তাঁহার সঙ্গিগণ তিন বার গগণভেদী স্বরে “Hip ! Hip ! Hurrah !” বলিয়া উঠিলেন। তাঁহারা ঐ কাজকে কুসংস্কারের উপর অসামান্য জয় মনে করিয়া এই রূপ করিয়াছিলেন। এক দিন চাঁদনী রাজি, কয়েক জন নব্য-সম্প্রদায়ের লোক ঠনঠনিয়ার সিদ্ধেশ্বরীতলায় দাঁড়াইয়া দূর হইতে কাহার আগমন নিরীক্ষণ করিতেছেন, দৃষ্ট হইল। কাছে আসিতে দেখা গেল সে একজন ক্ষৌরিত মস্তক শ্মশ্রুধারী ব্যক্তি মাথায় চেকারী করিয়া উইলসনের দোকান হইতে কুটী বিস্কুট কেহ লইয়া আসিয়াছে। যেমন সে মাথার বুড়িটা নামাইল, এবং তাহার কামান মাতা চাঁদনীতে চিক্ চিক্ করিতে লাগিল, অমনি সেই জগন্নাথের প্রসাদের জন্য কাড়াকাড়ি পড়িয়া গেল। সে দেখে হাঁ করে অবাক হয়ে দাঁড়িয়ে রহিল।

উপরে বর্ণিত আচরণ দ্বারা ডিরোজিওর ছাত্রেরা জাতির বন্ধন শিথিল করেন। তাঁহারাই যে প্রথমতঃ তাহা শিথিল করেন এমন নহে। তাহার পূর্বে হইতে ঐ বন্ধন বিলক্ষণ শিথিল হইয়াছিল। ইহার প্রমাণ কালীপ্রসাদী হেঙ্গাম।

হাটখোলার বিখ্যাত দত্তবংশীয় কালীপ্রসাদ দত্ত সর্বস্বনীতি-বিরুদ্ধ বিশেষতঃ হিন্দুনীতিবিরুদ্ধ এক কার্য্য করেন তাহাতে তিনি জাত্যন্তরিত হয়েন ও তাঁহার পক্ষীয় লোকেরা তাঁহাকে সমন্বয় করিয়া জাতিতে তুলেন তাহাতেই কালীপ্রসাদী

হেঙ্গামের উৎপত্তি হয়। ঐ কার্য বিবী আনর নামক এক জন পরমা সুন্দরী মুসলমানীকে উপপত্নী রাখিয়া তাহার গৃহে কিছুদিন বাস করা। এই কার্যটি দ্বারা হিন্দুধর্মবিহিত জাতির নিয়ম বিলক্ষণ ভঙ্গ করা হয়। এই হেঙ্গামাতে হিন্দুসমাজ তয়ানক আন্দোলিত হইয়াছিল। এক পক্ষে শোভাবাজারস্থ রাজগণ, অপরপক্ষে মৃত রামদুলাল সরকার প্রভৃতি কলিকাতার তদানীন্তন অনেকগুলি সম্ভ্রান্ত লোক দণ্ডায়মান হইয়া ঐ আন্দোলন করিয়াছিলেন। এই ঘটনা উপলক্ষে রামদুলাল সরকার বলিয়াছিলেন, “জাতি আমার বাস্তব ভিতর” ও অকাতরে অর্থ ব্যয় করিয়াছিলেন। এই হেঙ্গাম সময়ে একটা গীত রচিত হইয়াছিল, তাহার প্রারম্ভে আছে,—“গেল গেল গেল হিন্দুয়ানী।” সেই প্রথম এই রব উদ্ভিত হয়, এখনও সেই রব শ্রুত হওয়া যাইতেছে। কিন্তু প্রকৃত হিন্দুয়ানী, অর্থাৎ ঈশ্বর-ভক্তি, ঈশ্বরের সহিত যোগ সাধন, সর্বভূতে দয়া এবং সর্ব ধর্মের প্রতি ঐদার্য্য ভাব কখন যাইবার নহে।)।

কালীপ্রসাদী হেঙ্গাম এবং হিন্দু কলেজের প্রথম ছাত্র-দিগের মদ খাওয়া ও খানা খাওয়া জাতির বন্ধন শিথিল করিয়া ঐ বিষয়ে বর্তমান সামাজিক পরিবর্তন অনেক পরিমাণে প্রবর্তিত করিয়াছে। কিন্তু এ সকল নিরুষ্ট প্রবৃত্তির কার্য্য। আমাদিগের দেশের ধর্ম ও সমাজ সংস্কারের প্রকৃত কারণ ইংরাজী শিক্ষার স্থির ও স্থায়ী কার্য্য ও ব্রাহ্মসমাজের উপদেশ। ইংরাজী শিক্ষা ও ব্রাহ্মসমাজের উপদেশ সাধারণ লোককে এখনও তত কার্য্যে প্রবৃত্ত করিতে পারে নাই,

যত মতের পরিবর্তন করিয়াছে ! যত পরিবর্তন যত শীঘ্র হয়, কার্যের পরিবর্তন তত শীঘ্র হয় না ! কিন্তু ডিরোজিওর শিষ্যদিগকে একটি বিষয়ে অত্যন্ত প্রশংসা করিতে হয়, তাঁহারা রাজকার্যে উৎকোচ গ্রহণ না করার প্রথম দৃষ্টান্ত প্রদর্শন করেন ।

এই রূপে হিন্দু সমাজে যে পরিবর্তন আরম্ভ হয়, তাহা এক্ষণে কতদূর আসিয়া দাঁড়াইয়াছে ! বিদ্যা শিক্ষার বিষয়ে দেখ,—তখন কলিকাতাতে একটি কি দুইটি বিদ্যালয় ছিল, এখন নগরে নগরে গ্রামে গ্রামে বিদ্যালয় প্রতিষ্ঠিত হইয়াছে ! সামাজিক সংস্কার বিষয়ে দেখ,—এক্ষণে স্ত্রীলোকদিগের শিক্ষা হইতেছে, তাহাদিগের অপেক্ষাকৃত অধিক বয়সে বিবাহ দেওয়া হইতেছে, লোক বিলাত যাইতেছে, বিধবার বিবাহ হইতেছে, অসবর্ণ বিবাহ হইতেছে, স্ত্রীলোকদিগকে বহির্গমন বিষয়ে স্বাধীনতা দেওয়া হইতেছে ! এক্ষণকার কালে চতুর্দিকে পরিবর্তন ; পরিবর্তন বই আর কথা নাই ! কিন্তু পরিবর্তন হইলেই যে উন্নতি তাহার নিশ্চয়তা নাই ! কোন্ কোন্ বিষয়ে প্রকৃত উন্নতি হইতেছে, কোন্ কোন্ বিষয়ে প্রকৃত অবনতি হইতেছে, তাহা বিচার করা আমাদের কর্তব্য ! )

এক্ষণে যে যে বিষয়ে বঙ্গ সমাজের প্রকৃত উন্নতি বা অবনতি হইতেছে, তাহা বলিতে প্রবৃত্ত হইলাম । আমি নিম্নে লিখিত বিষয় সম্বন্ধীয় উক্ত সমাজের উন্নতি ও অবনতির বিষয় বিবেচনা করিব ।

১। শরীর ।

২। বিদ্যা শিক্ষা ।

৩। উপজীবিকা।

৪। সমাজ।

৫। চরিত্র।

৬। রাজ্য।

৭। ধর্ম।

প্রথমতঃ। শারীরিক বলবীৰ্য্য।—এ বিষয়ে পূৰ্ণাপেক্ষা বল-  
ক্ষণ অবনতি দৃষ্ট হইতেছে। প্রত্যেক ব্যক্তিকে জিজ্ঞাসা কর,  
তিনি বলিবেন, আমার পিতা ও পিতামহ বড় বলবান্ ছিলেন।  
সে কালের লোকের সহিত তুলনা করিলে বর্তমান লোক-  
দিগের কিছুই বল নাই বলিলে হয়। আমি জানি, কলিকা-  
তার নিকটস্থ কোন গ্রামে একটা বাঘ আসিয়াছিল, সেই  
গ্রামের একজন ভদ্র ব্যক্তি তাহারই মত বলবান একজন নাপি-  
তকে সঙ্গে লইয়া লাঠি হাতে করিয়া বাঘ মারিতে বেকলেন।  
বিবেচনা ককন, লাঠি দ্বারা বাঘ মারা কত বড় সাহসের কৰ্ম্ম।  
তিনি তাহাতে কৃতকার্য্য হয়ে ঘরে ফিরে এলেন। ভূতপূৰ্ণ  
গবর্ণর জেনরেল সর্ জন্ লরেন্স উত্তর পাড়ার স্কুলের বালক-  
দিগকে দেখিয়া বলিয়াছিলেন, সে কালের বাঙ্গালীদের তুল-  
নায় এ কালের বাঙ্গালীরা নিতান্ত ক্ষীণ। চল্লিশ বৎসরে  
চালসে ধরে, এই সকলে জানেন, এক জনকে আমি দেখিলাম,  
তিনি ভাল দেখিতে পান না। আমি জিজ্ঞাসা করিলাম, মহা-  
শয়ের কি চালসে ধরেছে? তিনি বলিলেন, “না, পায়তারা  
ধরেছে।” অর্থাৎ পঁয়ত্রিশ বৎসর বয়স হইয়াছে। “এ বয়সে  
দৃষ্টির খর্ব্বতা হইলে, তাহাকে আর চালসে কেমন করে বলা যায়,  
পায়তারা বলিতে হয়।” কি আশ্চর্য্য! ইহার পর আমাদের

দেশের লোকেরা কি সত্য সত্য বেগুন গাছে আঁকুষি দিবে না কি ? এক শত বৎসর পূর্বে যে সকল লোক জীবিত ছিলেন, তাঁহারা যদি ফিরিয়া আইসেন, তাহা হইলে আমাদিগকে খর্ব-কায় দেখিয়া আশ্চর্য্য হইবেন, সন্দেহ নাই ! ছেলেবেলা সে কালের স্ত্রীলোক কর্তৃক ডাকাইত তাড়ানোর গম্প সকল শুনা গিয়াছিল । এক্ষণে স্ত্রীলোকের কথা দূরে থাকুক, পুরুষের একরূপ সাহসের কার্য্য শুনা যায় না ! এক্ষণকার পুরুষেরা একটা শিয়াল তাড়াইতেও সক্ষম নহে ! এই শারীরিক বলবীৰ্য্য হানির কয়েকটা কারণ নির্দেশ করিতে পারা যায় । সেই সকল কারণ নিম্নে উল্লিখিত হইতেছে । বাল্য বিবাহাদি যে সকল কারণ সে কাল এ কাল দুই কালে সাধারণ তাহা এখানে ধরা গেল না, কেবল এই কালে যে সকল কারণের উৎপত্তি হইয়াছে, তাহাই ধরা গেল ।

১। এ কালের লোকের বলবীৰ্য্য ক্ষয়ের ও অম্পায়ুর প্রথম কারণ, দেশের নৈসর্গিক প্রকৃতির পরিবর্তন বলিতে হইবে । এইরূপ পরিবর্তনের এক প্রধান প্রমাণ এই যে, পূর্বে শীতকালে যেরূপ শীত হইত, এক্ষণে সে রূপ হয় না ! পূর্বে সামান্য গৃহস্থকেও শীতকালের অধিকাংশ দিন আহারের পর গরম জলে আঁচাইতে হইত । কিন্তু এক্ষণে কেহ সে রূপ করে না । বাইট সোত্তর বৎসর বয়ঃক্রমের নবদ্বীপবাসী ব্যক্তিরা বলিতেন যে, তাঁহারা বাল্যকালে ঘরের চালের উপর খড়ি গুঁড়ার ন্যায় এক পদার্থ পড়িতে দেখিতেন, তাহাকে তাঁহারা পালা বলিতেন । সেই পদার্থকে ইংরাজীতে Frost বলে, তাহা অত্যন্ত শীতের চিহ্ন । পূর্বে লোকে কলিকাতা হইতে ত্রিবেণী,

শান্তিপুর প্রভৃতি গ্রামে জল বায়ু পরিবর্তন জন্য যাইত কিন্তু এক্ষণে ঐ সকল স্থান মেলেরিয়া অর্থাৎ দূষিত বাষ্প নিবন্ধন অস্বাস্থ্যকর হইয়া উঠিয়াছে। উত্তর পশ্চিম অঞ্চলে প্রয়াগ, কানপুর প্রভৃতি স্থান পূর্বে যেরূপ স্বাস্থ্যকর ছিল এক্ষণে সেরূপ দৃষ্ট হয় না। এই সকল স্থানে পূর্বে শীতকালে যেরূপ শীত হইত এক্ষণে সেরূপ হয় না। নানা কারণে বোধ হইতেছে যে ভারতবর্ষে একটি মহা নৈসর্গিক পরিবর্তন চলিতেছে। এরূপ পরিবর্তন লোকের শারীরিক বল বীর্যের প্রতি স্বীয় প্রভাব প্রদর্শন করিবে ইহার আশ্চর্য্য কি?

২। এক্ষণকার লোকের শারীরিক বল বীর্য হ্রাসের আর এক কারণ অতিশয় পরিশ্রম ও অকালে পরিশ্রম। এতদ্দেশে ইংরাজী সভ্যতা প্রবেশের সঙ্গে সঙ্গে যে পরিশ্রম অত্যন্ত বৃদ্ধি হইয়াছে তাহার আর সন্দেহ নাই। ইংরাজেরা যেরূপ পরিশ্রম করিতে পারেন আমরা সেরূপ কখনই পারি না। কিন্তু ইংরাজেরা চাহেন যে আমরা তাঁহাদের ন্যায় পরিশ্রম করি। ইংরাজী পরিশ্রম এ দেশের উপযুক্ত নহে। অতিশয় পরিশ্রম যেমন শারীরিক বল বীর্য ক্ষয়ের কারণ তেমনি অকালে পরিশ্রম তাহার আর এক কারণ। এখনকার রাজপুত্রবোঁরা যে দশটা হইতে চারিটা পর্য্যন্ত কৰ্ম্ম করিবার নিয়ম করিয়াছেন ইহা এদেশের পক্ষে কোন রূপে উপযোগী নহে। প্রথমে রৌদ্রের সময় কৰ্ম্ম করিলে শরীর শীত্র অবসন্ন হইয়া পড়ে। বিশেষতঃ বালকেরা যে আহারের পরেই তাড়াতাড়ি স্কুলে যায় এবং তথায় বন্ধি বায়ুতে এক গৃহে শত শত ব্যক্তি গলদুর্ঘর্ষ কলেবরে থাকে তাহাতে তাহাদের বিলক্ষণ স্বাস্থ্যভঙ্গ হয়। পাদরি লংসাৰেব

আমার একজন ভদ্র সাহেবকে লইয়া কোন স্কুল দেখিতে গিয়াছি  
ছিলেন। ঐ ভদ্র সাহেবটি স্কুলের ভিতরে ঢুকিয়া ছাত্রদিগের  
নিখাসের গরম বাতাস ও ঘর্ষের গন্ধ অনুভব করিয়া বলিয়া  
উঠিলেন “This is hell” অর্থাৎ নরক স্বরূপ।

৩। ব্যায়াম শিক্ষার অভাব।—পূর্বে গুলিদাওয়া কপাতি  
নামক যে সকল ক্রীড়া প্রচলিত ছিল, তাহাতে বিলক্ষণ অঙ্গ  
চালনা হইত। পূর্বে প্রত্যেক গ্রামে এক এক কুস্তির আড্ডা  
ছিল; ছেলে বুড়ো সকলে কুস্তি করিত। এখন বয়স্কদিগের কথা  
দূরে থাকুক, পোনের ষোল বৎসরের বালকেরা পর্য্যন্ত অঙ্গ চালনা  
করিতে বিমুখ। কোন জেলা স্কুলে দেখিলাম, নিম্ন শ্রেণীর  
ছেলেরা খেলা করিতেছে এবং প্রথম ও দ্বিতীয় শ্রেণীর বালকেরা  
স্থির হইয়া দাঁড়াইয়া আছে। আমি তাহাদিগকে জিজ্ঞাসা  
করিলাম, “তোমরা খেলিতেছ না কেন?” তাহারা কিছু উত্তর  
করিল না; আমি তাহাদিগকে বলিলাম, “তোমাদিগের খেলা  
করা কর্তব্য, এত সকাল সকাল বিজ্ঞ হইলে চলিবে না”। ছোট  
ছোট বালকেরা পর্য্যন্ত বাহাতে অঙ্গ চালনা না করে, তাহার  
জন্য আমাদিগের দেশীয় লোকেরা বিশিষ্ট উপায় অবলম্বন করিয়া  
থাকেন। এখন একটা ছেলে সমস্ত দিন গড গড করিয়া পড়া  
মুখস্থ করিলে তাহাকে শাস্ত ছেলে বলা হয়। এই যে শাস্ত নাম  
ইহা সর্বনাশের গোড়া। ইংরাজেরা ঠিক বলেন, “All work  
and no play makes Jack a bad boy”; কোন ক্রীড়া নাই,  
কেবল পরিশ্রম ইহাতে বালকের অপকার হয়। যে পরিমাণে  
মানসিক পরিশ্রমের আধিক্য, সেই পরিমাণে শারীরিক বলের  
হানি। স্কুলে গাদা গাদা বহি ধরিয়ে দেয়, ছেলেদিগকে ঐ অব

ইচ্ছা করিতে হয় তাহারা দিন রাত কেবল তাহা করে, শারীরিক উন্নতির প্রতি কিছুমাত্র মনোযোগ দেয় না। যাহারা বাঙালী ছাত্রবৃন্দের পরীক্ষা দেয় তাহাদের বয়ঃক্রম হক্কো দল এগার বৎসর। এই অল্প বয়স্ক বালকদিগকে এত পুস্তক পড়িতে হয় যে, ক্রীড়া ও আরাম করিবার অবকাশ পায় না। ঐ জন্য ফলও সেইরূপ ফলিতেছে। ছাত্রেরা কণ্ঠ ও অকর্মণ্য হইয়া পড়ে। এক্ষণকার ছাত্রেরা বিশ্ব-বিদ্যালয়ের যে সকল উপাধি পায়, আমি তাহা পাণ্ডবদিগের স্বর্গারোহণের সহিত তুলনা করিয়া থাকি। পাণ্ডবেরা পাঁচ ভাই ও দ্রৌপদী স্বর্গের পথে যাইতে যাইতে প্রথম দ্রৌপদী, পরে সহদেব, পরে নকুল, পরে অর্জুন, পরে ভীম, এক জনের পর এক জন পড়িয়া গেলেন। সর্বশেষে কেবল একা যুধিষ্ঠির স্বর্গারোহণ করিলেন। তেমনি যে সকল ছাত্র প্রথমতঃ এন্ট্রান্স কোর্স পড়ে তাহার মধ্যে কতকগুলি এন্ট্রান্স পরীক্ষা না দিতে দিতে পড়িয়া যায়। ফার্স্ট আর্টস পরীক্ষা না দিতে দিতে আর কতকগুলি পড়িয়া যায়। বি, এ, পরীক্ষা না দিতে দিতে আর কতকগুলি পড়িয়া যায়। এম, এ, উপাধি প্রাপ্তি অর্থাৎ স্বর্গারোহণ অতি অল্প লোকেরই ভাগ্যে ঘটে। এক হিসাবে বর্তমান ইংরাজি শিক্ষার প্রশালী মানুষ মারিবার কল বলিলেও অত্যুক্তি হয় না।

৪। অতিশয় পরিশ্রম, অসময়ে পরিশ্রম ও ব্যায়াম চর্চার হ্রাস নিবন্ধন এখনকার লোকের ভোজন শক্তির হ্রাস হইয়া আসিতেছে। এটি শারীরিক বল বীৰ্য্য ক্ষয়ের উত্তর কার্য ও কারণ। পূর্বকার লোকেরা বিলক্ষণ আহাৰ করিতে পারি-

তেন, ইহার ভূরি ভূরি দৃষ্টান্ত আমরা বাল্যকালে দেখিয়াছি ও শুনিয়াছি। এক্ষণকার লোকে সেরূপ পারে না। পূর্বকালে যখন কেবল ঐকমহাশয়ের পাঠশালায় শিক্ষা প্রদত্ত হইত, তখন বালকেরা তিনবার ভাত খাইত। পূর্বকালে ভদ্র লোকেই কতকগুলি ঝুনা নারিকেলের শাঁস ও চিড়েই চিবাইয়া খাইয়া ফেলিয়া হজম করিতেন। ইহা যে অত্যন্ত পুষ্তিকর আহার তাহার সন্দেহ নাই। কিন্তু এক্ষণকার অধিকাংশ লোকে এরূপ পুষ্তিকর আহার খাইয়া হজম করিতে পারে না। ইংরাজেরা যে পরিমাণে আহার করিতে পারেন, তাহার সঙ্গে তুলনা করিলে বাঙ্গালীদিগের আহার নাই বলিলেই হয়। অধিক আহার করিয়া অনায়াসে জীর্ণ করিতে পারা শারীরিক বলের একটি প্রধান কারণ।

৫। পুষ্তিকর দ্রব্য ভক্ষণের হ্রাসতা একালের লোকদিগের শারীরিক বল বীৰ্য্য ক্ষয় ও অস্পায়ুর আর এক কারণ। আমাদিগের বৈদ্য গ্রন্থে লিখিত আছে, “আরোগ্যং কটু-তিক্তেষু বলং মাংসপয়ঃসু চ” ; কটু ও তিক্ত দ্রব্য স্বাস্থ্যকর এবং মাংস ও দুগ্ধ বলকর। এক্ষণকার সম্পন্ন মনুষ্যদিগের মধ্যে মাংসাহার পূর্বাপেক্ষা অধিকতর প্রবল হইয়াছে বটে কিন্তু অধিকাংশ লোকের সম্বন্ধে মাংস জুটিয়া উঠা ভার। এক একটি জাতির এক একটি প্রধান আহার আছে। গোমাংস যেমন ইংরাজদিগের প্রধান আহার, গোল আলু যেমন আইরিশদিগের প্রধান আহার, দাল কটী যেমন হিন্দুস্থানীদিগের প্রধান আহার, তেমনি দাল, ভাত, দুদ, মাছ বাঙ্গালীদিগের প্রধান আহার। এই চারি দ্রব্যের মধ্যে দুগ্ধ

যেমন পুষ্টিকর এমন অন্য পদার্থ নহে! পূর্বে আপামর সাধারণ সকলেই যেমন দুধ খাইতে পাইত এক্ষণে দুধ মহার্ঘ্য হওয়াতে সেরূপ পায় না। কোন ব্যক্তির সঙ্গে কথোপকথনের সময় আমি বলিয়াছিলাম, যখন দুধ এত মহার্ঘ্য হইয়া উঠিল তখন আর দেশের কিসে উন্নতি হইবে? তিনি হাসিলেন। কিন্তু আমার কথার তাৎপর্য্য আছে। বস্তুতঃ দুধ বাঙ্গালীদিগের শরীর রক্ষা ও শারীরিক বল বিধান পক্ষে এরূপ উপযোগী যে তদভাবে আমাদের শারীরিক উন্নতির আশা নাই। এই দুধ কিরূপে সুলভ হইবে তাহার কোন উপায় দেখিতে পাই না। সাহেবেরা গোমাংস ভোজী; দুঃখের বিষয় এই যে বাঙ্গালীরাও তাহাদের সঙ্গে এবিষয়ে যোগ দেন। বাঙ্গালীরা গোমাংস ভোজী হইলে আরো ভয়ানক হইয়া উঠেন। এ বিষয়ে একটি গল্প আছে। একবার উইলসনের হোটেলে দুই বাঙ্গালী বাবু আহার করিতে গিয়াছিলেন। এক বাবুর গোক ভিন্ন চলে না, তিনি খানসামাকে জিজ্ঞাসা করিলেন, “ভীল \* হ্যায়?” খানসামা উত্তর করিল, “নহি হ্যায় খোদাওন্দ,” বাবু পুনরায় জিজ্ঞাসা করিলেন, “বীফষ্টিক † হ্যায়?” খানসামা উত্তর করিল “ওভি নহি হ্যায় খোদাওন্দ।” বাবু পুনরায় জিজ্ঞাসা করিলেন, “অক্সটং ‡ হ্যায়?” খানসামা উত্তর করিল, “ওভি নহি হ্যায় খোদাওন্দ।” বাবু পুনরায় জিজ্ঞাসা করিলেন “কাল্‌ফুট্‌জেলি §

\* Veal অর্থাৎ বাছুরের মাংস । † Beefsteak অর্থাৎ গোকর বড় বড় রংধা টুগরো। ‡ Oxtongue অর্থাৎ গোকর জিব। § Calf's foot jelly অর্থাৎ বাছুরের খুর দ্রব করিয়া যে খাদ্য প্রস্তুত হয়। ইংরাজেরা গোকর খুরটা পর্য্যন্ত ছাড়েন না, তাহা দ্রব করিয়া খাওয়া হয়।

হ্যায় ?” খানসামা উত্তর করিল “ওভি নহি হ্যায় খোদাওন্দ ?”  
 বাবু বলিলেন, “গোককা কুচ্ হ্যায় নহি ?” এই কথা শুনিয়া  
 দ্বিতীয় বাবু যিনি এত গোমাংস প্রিয় ছিলেন না, তিনি বিরক্ত  
 হইয়া বলিলেন “ওরে ! বাবুর জন্য গোকর আর কিছু না থাকে  
 ত খানিকটা গোবোর এনে দেনা ?” । এবিষয়ে বাহারা ইংরাজী  
 জানেন না, তাহারাও ইংরাজীওয়ালাদিগের অনুগামী হইলেন ।  
 একজন পাড়ারগৈয়ে জমিদার কিছু দিন কলিকাতায় বাস করিয়া  
 ছিলেন । তিনি ঠিক ইয়ং বেঙ্গালের মত পোষাগ পরিভোজ  
 ও উইলসনের দোকানে সর্বদা যাইতেন । আপাততঃ দেখিলে  
 কাহার সাধ্য যে বলে যে তিনি ইংরাজী জানেন না । কিন্তু  
 তাহার পক্ষে ইংরাজীর এ অক্ষর গোমাংস ছিল । কিন্তু প্রকৃত  
 গোমাংস গোমাংস ছিল না । হোটেলের নিয়ম এই, বাহারা  
 প্রত্যহ সেই খানে আহার করে তাহাদিগকে প্রত্যেক দিনের  
 আহারের খরচের এক হিসাব হোটেলওয়ালা দেয় । সেই  
 সকল হিসাব বিলের বোঁচরের কার্য্য করে । উল্লিখিত জমীদার  
 বিলের টাকা দিবার সময় হিসাব বুঝিবার সুবিধার নিমিত্ত  
 প্রত্যাহিক কর্দের পৃষ্ঠে, কি আহার করিলেন, তাহা প্রত্যাহ  
 লিখিবার সংকল্প করিয়া এক দিন সেই দিনের কর্দ আপনার  
 ইয়ং বেঙ্গাল সহচরের নিকট বুঝিয়া লইয়া তাহার পৃষ্ঠে “অর্ক-  
 সের গোমাংস” এই বাক্যটি বাক্সালায় লিখিয়া রাখিলেন ।  
 তাহাতে সেই সহচর তাহার প্রতি আপনার আন্তরিক হুণা  
 আর লুঙ্কায়িত রাখিতে না পারিয়া বলিলেন, “তোর সকল  
 মাক্ করিলাম, ইজের পেটেলুন পরিলি তাহা মাক্ করিলাম,  
 ক্যাপ মাতায় দিলি তাহাও মাক্ করিলাম, কেটিং টুড়িলি

তাঁহাও যাক্ করিলাম, ফের্ এর উপর আবার অর্ধসের  
 গোমাংস?" এদেশের লোকের পক্ষে গোমাংস অত্যন্ত উৎসাহিত  
 ও অস্বাস্থ্যকর জীব্য। একজন প্রসিদ্ধ ইয়ংবেঙ্গাল বলিতেন যে  
 প্রত্যহ এবেলা অর্ধসের আর ওবেলা অর্ধসের গোমাংস ভক্ষণ  
 না করিলে বাঙ্গালী জাতি কখনই বলিষ্ঠ হইবে না এবং যাহা  
 বলিতেন কার্য্যে তাহাই করিতেন। কিন্তু পরিশেষে তাঁহার এক  
 ছাচ রোগ উপস্থিত হইয়া শরীর এমনি অসুস্থ হইয়া পড়িল যে  
 পাচক ত্রাণ রাখিয়া ভাত ডাইল ধরিতে বাধ্য হইলেন। কিন্তু  
 উপরে যে ভয়ানক গোখাদকদিগের কথা বলিলাম এরূপ ভয়ানক  
 গোখাদক দূরে থাকুক, সামান্য গোখাদকই বাঙ্গালীর মধ্যে  
 কয়জন আছে? অতি অল্পই আছে। প্রধান গোখাদক  
 আমাদিগের ইংরাজরাজপুত্রেরা ও মুসলমানেরা। তাঁহারা  
 গরু খাইয়া উজাড় করিয়া ফেলিলেন এই জন্য দুঃখ মহার্ঘ্য হইয়া  
 উঠিয়াছে। প্রাচীনতম হিন্দুরা গোমাংস ভক্ষণ করিতেন শাস্ত্রে  
 এমন উদাহরণ পাওয়া যায়। কিন্তু মধ্য সময়ের হিন্দুগণ  
 গোকর উপকারিত্ব ও এদেশে তাহার মাংস ভক্ষণের অস্বাস্থ্যকর  
 দোষ প্রতীতি করিয়া গোমাংসভক্ষণ শাস্ত্রে নিষেধ করিয়া  
 গিয়াছেন। গোক যেরূপ উপকারী জন্তু, তাহার সম্বন্ধে এই  
 রূপ ব্যবহারই নিতান্ত কর্তব্য। আকবর বাদশাহ তাঁহার রাজ্য  
 মধ্যে গোহত্যা নিবারণ করিয়াছিলেন। তাহাতে তিনি সমুদয়  
 হিন্দুবর্গের বিশেষ আক্লাভাজন হইয়াছিলেন। কিন্তু ঐ মহা  
 অনিষ্টকর ও নির্দয় প্রথা এক্ষণে নিবারণিত হইবার কিছুমাত্র  
 আশা নাই। দুঃখ মহার্ঘ্য হওয়াতে বাঙ্গালীরা ক্রমশঃ কীর্ণ  
 হইয়া শিডিতেছে। শরীরের অসম্পূর্ণ পোষণ বর্তমান বাঙ্গালী

দিগের অসম্পাদ্যের কারণ বলিয়া একজন ইংরাজ সংবাদপত্র সম্পাদক স্থির করিয়াছেন \*। একে ইংরাজী সভ্যতা জনিত প্রভূত পরিশ্রমের চাপ তাহার উপর ভোজন শক্তির হ্রাস ও পুষ্তিকর দ্রব্য ভক্ষণের হ্রাসতা ইহাতে কি রক্ষা আছে ?

৬। কৃত্রিম খাদ্য দ্রব্যের ব্যবহার। আমরা বাল্য কালে ঘৃত দুগ্ধ তৈল প্রভৃতি দ্রব্য যেরূপ অকৃত্রিম পাইতাম, এখন আর সেরূপ পাই না। জিনিসের মূল্য বৃদ্ধির সঙ্গে সঙ্গে তাহার কৃত্রিমতা বাড়িয়াছে। এটি একটা সভ্যতার চিহ্ন। বিলাতে এরূপ কৃত্রিমতা বিলক্ষণ চলে। এখন খাদ্য দ্রব্যের সঙ্গে কি ছাইভস্ম মিশায়, পূর্বে যে সব জিনিশ স্বাদু লাগিত, তাহা আর সেরূপ স্বাদু লাগে না। কেবল ছাইভস্ম মিশায় এমন নহে, বিষবৎ দ্রব্য সকলও মিশায়, তাহা শরীরের পক্ষে অত্যন্ত অনিষ্টকর। সুতরাং সেই সকল দ্রব্য ব্যবহারে যে আয়ু ও বলের ক্ষয় হইবে তাহার আশ্চর্য্য কি? অকৃত্রিম খাদ্যদ্রব্য কিছু অসাধারণ পদার্থ নহে, ঈশ্বরের ইচ্ছা যে তাহা কি দরিদ্র কি ধনাঢ্য সকলেই ব্যবহার করিতে পায়। কিন্তু এখন এমনি হইয়া দাঁড়াইয়াছে যে অকৃত্রিম খাদ্য দ্রব্য অসাধারণ পদার্থ, কেবল ধনাঢ্য ব্যক্তির ব্যবহার করিতে পারেন। জিনিশ ভেজাল করা কেবল ইংরাজী আমলে দৃষ্ট হইতেছে। মুসলমানদিগের আমলে এরূপ ছিল না। আমাদিগের বর্তমান রাজপুত্রদিগের আমলে সকলেতেই ভেজাল, সকলেতেই খাদ, সকলই গিল্টি। মানুষে-তেও ভেজাল, মানুষেতেও খাদ, মানুষও গিল্টি।

৭। পানদোষের প্রবলতা। ত্রাণরূপ আগ্নেয় জলে এদে-

শৈর কত অনিষ্ট সাধন হইতেছে তাহা অনেকেই বোধগম্য করিতে পারিতেছেন। গত ত্রিশ বৎসরের মধ্যে এই অগ্নিতে কত ধনী মানী ও বিদ্বানের প্রাণ আত্মত্বরূপ নিক্ষিপ্ত হইল তাহার ইয়ত্তা করা যায় না। এত দিন তাঁহারা জীবিত থাকিলে লোকসমাজের কত মঙ্গল সাধিত হইত! স্বাস্থ্যের দৃষ্টিতে দেশীয় মদ্য বিলাতি মদ্য অপেক্ষা অল্প অনিষ্টকর, কিন্তু ধর্মের দৃষ্টিতে সকল প্রকার মদ্যপানই একেবারে পরিত্যাগ করা কর্তব্য। এ বিষয়ে আরো পশ্চাৎ বলিবার অতিলাষ রহিল।

৮। শরীর সম্বন্ধীয় ইংরাজী আচার ব্যবহার অবলম্বন শারীরিক বলবীৰ্য্য হানির এক প্রধান কারণ। আমরা ইংরাজী পড়িয়া শরীর রক্ষা সম্বন্ধীয় অনেক মঙ্গলকর পুরাতন প্রথা পরিত্যাগ করিতেছি ও এদেশের উপযুক্ত কি না তাহা না বিবেচনা করিয়া অনেক ইংরাজী রীতি অবলম্বন করিতেছি। ইংরাজী রীতি এদেশের পক্ষে উপযুক্ত নহে। ইংরাজী রীতি অবলম্বন ও দেশীয় রীতি পালন, এই দুয়ের ফলাফলের প্রভেদ দেখাইবার জন্য আমি প্রথম প্রথা অবলম্বনকারী বৃদ্ধ মনুষ্যের সহিত দ্বিতীয় প্রথা অবলম্বনকারী বৃদ্ধ মনুষ্যের তুলনা করিব। বাঙ্গালা ভাষায় ইংরাজী শব্দ মিশাইয়া কথা কহার আমি সম্পূর্ণ রূপে বিরোধী কিন্তু কেত্বকের অনুরোধে আমি বর্তমান উপলক্ষে দুইটি বিমিশ্র বাক্য ব্যবহার না করিয়া থাকিতে পারিলাম না। সে দুইটি বাক্য বর্ণ্যাকিউলর (Vernacular) বড়ো ও এংলিসাইজড (Anglicized) বড়ো। এংলিসাইজড বড়ো অপেক্ষা বর্ণ্যাকিউলর বড়োর ব্যয়ঃক্রম অধিক; কিন্তু এংলিসাইজড বড়ো অপেক্ষাকৃত অল্পবয়সেই বড়ো হইয়া পড়ি-

যাচ্ছেন। বর্ণ্যাকিউলর বুড়োর রাত্রি থাকিতে নিদ্রা ভঙ্গ হয়। নিদ্রা ভঙ্গ হইলে বিছানাতে শুইয়া শুইয়া ধর্ম সঙ্গীত গান করেন,—ইহা কেমন চিত্ত প্রফুল্লকর! তৎপরে শয্যা হইতে উঠিয়া প্রাতঃস্নান করেন—ইহাতে শরীর কেমন ভাল থাকে। তাহার পর স্নান করিয়া ফুলের বাগানে গিয়া ফুল তুলে জামেন—পোষের সুগন্ধ শরীরের পক্ষে কেমন হিতকর! ফুল

হারণ করিয়া দেব পূজা করেন, তাহা মনের প্রফুল্লতা সঞ্চার করিয়া শরীর মন উভয়ের বল সাধন করে। এক জন ইংরাজ সংশয়বাদী, সংশয়বাদী হইয়াও আমাকে বলিয়াছিলেন যে উপাসনা যেমন মনের টনিক্ অর্থাৎ বলকর ঔষধ এমন আর দ্বিতীয় নাই। এইত গেল বর্ণ্যাকিউলর বুড়োর কথা। আর যিনি এংলিসাইজ্‌ড বুডো, তিনি খানা খাইয়া ও ত্রাণ্ডি পান করিয়া অনেক বেলা পর্য্যন্ত নিদ্রা যান; হৃষ্যোদয় কেমন করে হয়, তা কখন দেখেন নাই ও প্রাতঃকালের সুস্বিদ্ধ বায়ু কখন সেবন করেন নাই। অনেক বেলায় ঘুম ভাঙলো, কিন্তু এমন সহজ কাজ যে, চক্ষু সম্পূর্ণ রূপে খোলা ইহাও তাঁহার পক্ষে দুষ্কর কার্য্য বোধ হয়। শারীরিক গ্লানি অত্যন্ত, খোঁমারি হইয়াছে, বিপদ উপস্থিত!! এইরূপে ইংরাজী আহার পানে ও অন্যান্য ইংরাজী রীতি পালনে এংলিসাইজ্‌ড বুড়োর শরীর নানা রোগের আধার হয়। আমি এই স্থলে দুই পক্ষের দুইটি একশেষ দৃষ্টান্ত প্রদর্শন করিলাম। সাধারণতঃ বলিতে গেলে, ইংরাজীওয়ালারা প্রাচীন-রীতি-পালনকারী ব্যক্তিদিগের ন্যায় ডাঁটো ও সুস্থকায় নহেন। ইহার কারণ তাঁহারা অনেক পরিমাণে ইংরাজী আচার ব্যবহারের অণুসরণ করিয়া থাকেন।

ইংরাজীওয়ালারা যত কষ্ট ও অস্পায়ু টোলের অধ্যাপকেরা সেরূপ নহেন, তাহার কারণ বোধ হয় এই যে, ইংরাজী-ওয়ালারা অনেক পরিমাণে ইংরাজী আচার ব্যবহার অনুসারে চলেন, টোলের অধ্যাপকেরা সেরূপ চলেন না। আমাদিগের দেশের প্রকৃতি বিবেচনা করিয়া আমাদিগের চরণ কর্তব্য।

৯। দুর্ভাবনা বৃদ্ধি। পূর্বকালের লোক এক্ষণকার লোকের ন্যায় সুখপ্রিয় ও বিলাসপরায়ণ ছিলেন না; তাঁহাদিগের অভাব অস্প ছিল, এই জন্য তাঁহারা সর্বদা আনন্দে থাকিতেন। এক্ষণে যেমন সকল লোকের মুখে দুর্ভাবনার চিহ্ন সকল পরিলক্ষিত হয়, সে কালের লোকদের সেরূপ লক্ষিত হইত না। তাঁহারা দিব্য করে প্রফুল্লচিত্তে পিড়ি চৈস দিয়ে চণ্ডীমণ্ডপে বসে থাকিতেন; যে কেহ আসিত, আপনি চক্ৰমকি ঠুকে তামাক খাওয়াইতেন ও তাহার সঙ্গে মিষ্টালাপ করিতেন। তাঁহারা আমাদিগের অপেক্ষা মনের সুখ অধিক ভোগ করিতেন সন্দেহ নাই। তাঁহারা অনায়াসে জীবিকা লাভ করিতেন ও অস্পে সন্তুষ্ট থাকিতেন। এক্ষণে দ্রব্যাদি মহাঘর্ষ হইয়াছে, জীবিকা লাভ করা কঠিন হইয়া উঠিয়াছে ও সস্ত্রম রক্ষার জন্য লোকে অস্পে সন্তুষ্ট হইতে পারে না। লোকের ভাবিতে ভাবিতে অস্থি পর্য্যন্ত শুষ্ক হইয়া যাইতেছে। এক্ষণে ইউরোপীয় সভ্যতা আমাদের দেশে এসে ঢুকেছে, সেই সভ্যতার সঙ্গে সঙ্গে ইউরোপীয় অভাব, ইউরোপীয় প্রয়োজন ও ইউরোপীয় বিলাসিতা এসে ঢুকেছে, অথচ সেই সকল অভাব ও বিলাসেচ্ছা পূরণের ইউরোপীয় উপায় অর্থাৎ শিম্প ও বাণিজ্য বিশিষ্ট রূপে অবলম্বিত হইতেছে

না। লোকের দুর্ভাবনা বৃদ্ধি যে তাহাদের আয়ু ও শারীরিক বলবীৰ্য্য ক্ষয়ের এক প্রধান কারণ তাহার আর সন্দেহ নাই।

১০। বায়ুগিরির বৃদ্ধি। সেকালে এতদ্দেশে দু'একটি বায়ু ছিল; এক্ষণে সকলেই বায়ু। পূর্বে মোটা চালচলন সাধারণ ছিল; এক্ষণে বায়ুমান চালচলন সাধারণ ও মোটা চালচলন বিরল। এক্ষণে কি ভদ্র কি ইতর লোক উপার্জনশীল হইলেই গাড়ী পাল্কি ব্যতীত এক পাও চলিতে পারে না। পূর্বকার অধিকাংশ ভদ্র লোকও এরূপ শারীরিক-পরিশ্রম-বিমুখ ছিলেন না। ইহাতে তাঁহারা এক্ষণকার লোক অপেক্ষা সুস্থ ও বলিষ্ঠকায় হইতেন।

উপরোক্ত কারণ সকলে এদেশের লোকে বিশেষতঃ ভদ্র-লোকে ক্রমে ক্ষীণ, কণু ও অস্পায়ু হইয়া পড়িতেছে। পল্লি-গ্রামের রীতি, ভদ্র লোক সকল নিজে বাজার করিয়া থাকে। কিন্তু এক্ষণে পল্লিগ্রামের বাজারে ভদ্র লোক বৃদ্ধ অধিক দেখা যায় না। ছোট লোক বৃদ্ধই অধিক দেখা যায়। ইহাতে প্রমাণ হইতেছে যে, ভদ্র লোক অস্পায়ু হইয়া পড়িতেছে।

শারীরিক বলবীৰ্য্যের বিষয়ে এই পর্য্যন্ত বলা হইল। অতঃপর বিদ্যাশিক্ষা ও মানসিক উন্নতির বিষয়ে কিছু বলিতে প্রবৃত্ত হইতেছি। বিদ্যাশিক্ষার বিষয় বলিতে হইলে প্রথমতঃ আমাদের মাতৃভাষা শিক্ষা বিষয়ে বলা কর্তব্য। পূর্বাপেক্ষা এখন বাঙ্গালার আদর বেশী অবশ্যই বলিতে হইবে। আমরা যখন কলেজে পড়িতাম তখন বাঙ্গালা পড়ার প্রতি কাহারো মনোযোগ ছিল না। আমাদের যিনি পণ্ডিত ছিলেন তাঁহার সঙ্গে আমরা কেবল গল্প করে সময় কাটিয়ে দিতাম। সুতরাং যখন আমরা কলেজ থেকে বেরুলে তখন আমাদের বাঙ্গালা

ভাষায় কিছু ব্যুৎপত্তি জন্মে নাই। সে সময়কার ছাত্রদিগের পক্ষে বাঙ্গালা ভাষা অতি ভীষণ পদার্থ ছিল। আমরাদিগের সময়ের কলেজের প্রথম শ্রেণীর একটি ছাত্রকে এক দিন কলেজে যাইবার সময় রাস্তায় একজন সামান্য লোক একটি বাঙ্গালা লেখা পড়িয়া তাহার মর্ম তাহাকে বুঝাইতে অনুরোধ করে। তিনি সে লেখাটি বুঝিতে না পারিয়া তাহার এতদূর লজ্জা উপস্থিত হইল যে ললাটে শ্বেদ বিন্দু নিঃসৃত হইতে লাগিল। ইহাতে উল্লিখিত ব্যক্তি তাঁহার নিকট হইতে কাগজ ফিরাইয়া লইয়া বলিল “বাবু! এ ইডিরিডি করা নয়, বাঙ্গলার ঘানি।” একবার এই সময়ের শিক্ষিত আমার একটা বন্ধু বয়স্ক অবস্থায় আমার বাসায় একদিন আসিয়া বলিলেন “আজ একটা বড় শুভ সমাচার শুনিলাম।” আমরা আস্তে আস্তে জিজ্ঞাসা করিলাম, “কি সমাচার?” তিনি বলিলেন, “সোমপ্রকাশাদি সম্বাদ পত্রে না কি আন্দোলন হচ্ছে যে তিনটা ‘স’ উঠে গিয়ে একটা ‘স’ হবে তা হলেই আমার বাঙ্গালা লেখার সুবিধা হবে।” তিনি একবার এক সভায় “অভিনন্দন পত্র” শব্দের পরিবর্তে “রঘুনন্দন পত্র” বলে ফেলেছিলেন। ঐ সময়ে কলেজে শিক্ষিত কোন ব্যক্তি কোন প্রধান বিদ্যালয়ের বাঙ্গালা ভাষার অধ্যাপকের পদে নিযুক্ত হইয়াছিলেন। তিনি তাঁহার সহকারী পণ্ডিতকে ব্যাত্র শব্দ সম্বন্ধে জিজ্ঞাসা করিয়াছিলেন, “পণ্ডিত মহাশয়! এই শব্দের উচ্চারণ ত্র্যাঘ্ঘ না?” পণ্ডিত মহাশয় বলিলেন “উহার উচ্চারণ ব্যাত্র।” অধ্যাপক মহাশয় বলিলেন “আমি তাইত বলছি—ত্র্যাঘ্ঘ, ত্র্যাঘ্ঘ।” উল্লিখিত সময়ের আর এক কৃত্তিকে কোন প্রয়োজন উপলক্ষে বক্সু খানসামা নামক কোন

খানসামার নাম লিখিবার প্রয়োজন হইয়াছিল ; তিনি “বক্‌মু” শব্দ কি প্রকারে লিখিবেন ভাবিয়া আকুল ! যদি “বক্‌মু” লিখেন তাহা হইলে লোকে মনে করিবে যে কি মূর্খ ! “কষ” এইরূপ না লিখিয়া “ক্‌” লিখিলেই হইত আর যদি “বক্‌মু” লিখেন তাহাহইলে লোকে “বক্‌খু” উচ্চারণ করিবার সম্ভাবনা এইরূপ সাত পাঁচ ভাবিয়া তিনি ইংরাজী অক্ষর X এর সাহায্য লইয়া “বক্‌” এইরূপ লিখিলেন ! প্রথম প্রথম যাহাঁরা কলেজে পড়িতেন তাঁহাদিগের বাঙ্গালা বিছা এইরূপ ছিল ! এখন সে দিন গিয়াছে ! বাঙ্গালা ভাষার অনেক জীবদ্ধি হইয়াছে ! কিন্তু এ বড় দুঃখের বিষয় যে সংস্কৃতের চর্চা তদ্রূপ হইতেছে না ! বাগ্‌দেবী সরস্বতী গঙ্গাতীর পরিত্যাগ করিয়া রাইন নদীর তীরে আশ্রয় লইয়াছেন ! বাগ্‌দেবীর এরূপ অন্তর্দগ্‌নের জাজ্বল্যমান প্রমাণ, ভট্টাচার্য্যদের দুর্দশা ! তাঁহাদের দুরবস্থার প্রতি দৃষ্টিপাত করুন ! তাঁহাদের স্ত্রীর ছিন্ন বস্ত্র, চালে খড় নাই, বাড়ে মাটী নাই ; এক এক লোকের হয়ত অনেকগুলি ছেলে ; কি করিয়া তাহাদিগকে মানুষ করিবেন, ভাবিয়া অস্থির ! এই উৎকট দণ্ড তাঁহারা কেন প্রাপ্ত হইতেছেন ? কেবল সংস্কৃত চর্চা করেন বলিয়া ! জগতের মধ্যে সংস্কৃত ভাষা অদ্বিতীয় ভাষা ! সর্‌উইলিয়ম্‌ জোন্স বলিয়া গিয়াছেন, যে সংস্কৃত ভাষা “More copious than the Latin, more perfect than the Greek and more exquisitely refined than either.” —এই সর্বোৎকৃষ্ট ভাষা শিক্ষা করান বলিয়া ভট্টাচার্য্য মহাশয়েরা আমাদিগের নিকট হইতে এই ঘোরতর শাস্তি প্রাপ্ত হইতেছেন । সর্বাপেক্ষা ইংরাজী ভাষা শিক্ষার জীবদ্ধি বটেন !

কিন্তু আমি বলিতে বাধ্য হইতেছি যে ইহার দ্বারা যথার্থ বিদ্যা উপার্জন যাহাকে বলে তাহা হইতেছে না। শিক্ষা প্রণালীর দোষ ইহার প্রধান কারণ। যে রূপে ছাত্রদিগকে শিক্ষা দেওয়া হয়, তাহাতে এ অপেক্ষা উৎকৃষ্ট ফল হইতে পারে না। আমি স্বয়ং কোন স্কুলের হেডমাস্টার ছিলাম। আমি করিতাম কি, না, নিজে বালকদিগকে পুস্তকের কোন স্থানের অর্থ একেবারে বলে দিতাম না, প্রশ্ন কোশলে সেই স্থানের প্রকৃত অর্থটি তাহা-দিগের মুখ দিয়া বাহির করাইতাম। আর কেবল এইরূপ করিয়া ক্ষান্ত হইতাম না। উপস্থিত পাঠ্য বিষয় সম্বন্ধীয় আনু-সঙ্গিক প্রসঙ্গ পাড়িয়া ছাত্রদিগের বহুজ্ঞতা যাহাতে জন্মে এমন চেষ্টা করিতাম। কিন্তু এরূপে পড়ানোতে পরীক্ষার ফল মন্দ হইতে আরম্ভ হইল। ইহাতে আমার নিন্দা হইতে লাগিল। আমার একটি বন্ধু, তিনিও নিজে একজন শিক্ষক ছিলেন; তিনি আমাকে দাদা দাদা করিতেন। তিনি আমাকে এক দিন বলিলেন, “দাদা! তুমি ভাল কচ্ছে না, তোমার ছুর্নাম হচ্ছে—ছেলেদের গেডিয়ে দেও,” (অর্থাৎ ক্রমিক মুখস্থ করাও) “আজকাল না গেডাইলে কোন মতে পরিত্রাণ নাই!” মানসিক বৃত্তি পরিচালনা না করিয়া পড়ার পক্ষে (Key) কী গুলি বড় সুবিধা জনক। এই কী মুখস্থ করা বহুল অনিষ্টের কারণ হইয়াছে। আমি বলি, বরং বিদ্যামন্দিরে সিঁদ কেটে ঢুকা ভাল তবু এইরূপ চাবি দিয়া তাহার দ্বার খোলা কর্তব্য নয়। ছেলেরা যাহা কীতে আছে, তাহাই অবিকল মুখস্থ করে। পরীক্ষা দিয়া আসিয়া দেখে, যাহা লিখিয়াছে তাহা কীর সহিত মিলিয়াছে কি না? একবার এক বালক এইরূপ মিলাইবার সময় দেখিল,

একটা “The” তুল গিয়াছে তাহার জন্য মহা দুঃখিত! ভূগোল গ্রন্থে অনেক সমান বর্ণনা থাকে বলিয়া Ditto শব্দ লিখিত থাকে। একবার প্রবেশিকা পরীক্ষার সময়, যাহার Ditto সে বিষয় লইয়া প্রশ্ন দেওয়া হয় নাই; কিন্তু যে বিশেষ তত্ত্বগীর পার্শ্বে Ditto লিখিত আছে কেবল সেই তত্ত্ব সম্বন্ধীয় প্রশ্ন দেওয়া হইয়াছিল। ইহাতে একটী বালক Ditto এই উত্তর লিখিয়াছিল। আমাদিগের দেশের একজন প্রধান ব্যক্তি বলেন যে, হেলেরা পরীক্ষা দিয়া আইসে না বমি করিয়া আইসে। কথাটি শুনিতে কিছু অশ্লীল কিন্তু বস্তুতঃ ঠিক। মেন্ সাহেব এই গেডানো রীতির পোষকতা করিতেন। মেন্ সাহেবের একটা চমৎকার গুণ ছিল। যাহা ত্রিজগতের লোক কেহই ভাল বলিত না, তিনি তাহার পক্ষ সমর্থন করিতেন। তিনি যাহা বলুন গেডানো রীতিতে অনেক অনিষ্ট হয়, সন্দেহ নাই। পূর্বে হিন্দুকলেজে কোন নির্দিষ্ট পুস্তক হইতে প্রশ্ন দেওয়া হইত না ও এ গ্রন্থের একটু ও গ্রন্থের একটু একরূপ করিয়া পড়ানো হইত না। ছাত্রদিগকে নিজে কতই পড়িতে হইত, তাহার সীমা নাই। তাঁহারা নিজে যাহা পাঠ করিতেন, তাহার সঙ্গে তুলনা করিলে শিক্ষক যাহা পড়াইতেন, তাহা অতি অপ বলিতে হইবে। এক্ষণকার এট্রাস কোর্স, ফার্স্ট আর্টস কোর্স ও বি এ কোর্স সমস্ত এত কর, কত বড় বই হইবে? ইহাতে ইংরাজী সাহিত্যে কি বিদ্যা হইতে পারে?

শিক্ষাবিষয়ক আর একটা অভাব আছে, সে অভাব নীতি শিক্ষার অভাব। কোন স্কুলে ভাল করিয়া নীতি শিক্ষা দেওয়া হয় না। হেলেরা দুর্নীতিপরায়ণ হইয়া উঠিতেছে। নীতি

শিক্ষা না হইলে, আমি বলি কোন শিক্ষাই হইল না। ঈশ্বরের প্রতি আমাদের কৰ্ত্তব্য কি, অন্য মনুষ্যের প্রতি আমাদের কৰ্ত্তব্য কি, জীবনের উদ্দেশ্য আমরা কিরূপে সম্পাদন করিতে পারি, কি প্রকারে পবিত্রমনা ও মহৎ হইয়া জীবনের সার্থকতা সম্পাদন করিতে পারি, ইহা জানা নীতিশিক্ষা ব্যতীত কি প্রকারে সম্ভবে? কলেজ ও স্কুলে বিশেষ করিয়া নীতিশিক্ষা দেওয়া হয় না ও বালকেরা সম্মীতি পালন করে কিনা এবিষয়ে তত তত্ত্বাবধান নাই, ইহা অত্যন্ত আক্ষেপের বিষয় বলিতে হইবে।

উপরে পুরুষদিগের শিক্ষার বিষয়ে বলিয়া স্ত্রীদিগের শিক্ষার বিষয়ে কিছু না বলিয়া থাকিতে পারি না। স্ত্রীলোকেরা দশ বার বৎসর বয়স অবধি বালিকা বিদ্যালয়ে পড়ে, তাহাতে কেবল বর্ণ পরিচয় ও শব্দ পরিচয় মাত্র হয়, তাহার পর আর লেখা পড়ার কোন চৰ্চাই থাকে না। “স্ত্রীশিক্ষা বিধায়ক” গ্রন্থের রচয়িতা রাজা সর্ রাধাকান্ত দেব আমাদের দেশে স্ত্রীশিক্ষার প্রথম প্রচারক কিন্তু তাঁহার ঐ গ্রন্থে তিনি যে সকল বিদ্যাবতী স্ত্রীর উদাহরণ দিয়াছেন, আমাদের কোন স্ত্রীলোক অদ্যাপি সেরূপ বিদ্যাবতী হইতে পারেন নাই। আপনাদিগের অবশ্য সে দিবস বেশ স্মরণ হয়, যে দিবস পূর্ণকুন্ত স্থাপন ও অশোকবৃক্ষ রোপন পূর্বক মহামহোৎসবের সহিত বীটন বালিকাবিদ্যালয় স্থাপন করা হয় এবং ‘কন্যাপেবং পালনীয়া শিক্ষনীয়াতিষত্তঃ’ মহানিৰ্ব্বাণতন্ত্রের এই শ্লোক দ্বারা আনিখিত বান সকল স্কুলে বালিকা লইয়া ষাইবার জন্য দ্বারে দ্বারে ভ্রমণ করিত। মহাত্মা বীটন সাত্বে

যে অভিপ্রায়ে ঐ বিদ্যালয় স্থাপন করেন এত দিনে এত যত্নে তাহা সিদ্ধ হইল না। স্ত্রীলোকেরা এতদিনে উত্তম শিক্ষা লাভ করিতে পারিল না। আমাদিগের স্ত্রীলোকেরা উচ্চতর বিদ্যায় পারদর্শিতা লাভ করিতে সক্ষম তাহা হটী বিদ্যালয়কারের \* দৃষ্টান্ত দ্বারা বিলক্ষণ প্রমাণিত হইতেছে। স্ত্রীলোকদিগের অল্প বিদ্যা হওয়া অপেক্ষা আদোবে বিদ্যা না হওয়া ভাল। ইংরাজ কবি পোপ বলিয়াছেন “Little learning is a dangerous thing”। এক্ষণে স্ত্রীলোকদিগকে যেরূপ শিক্ষা দেওয়া হইতেছে তাহা তাহাদিগকে কেবল অশ্লীল গল্প ও নাটক পাঠে পারগ করে। আমি বলি, হয় স্ত্রীদিগের রীতিমত শিক্ষা দেও, নতুবা শিক্ষা দেওয়ায় কাজ নাই। বয়স্ক স্ত্রীলোকদিগকে - অস্ত্রপুরে বিশিষ্টরূপে শিক্ষা দিবার নিমিত্ত কোন উৎকৃষ্ট প্রণালী আমাদের দ্বারা অবলম্বিত হওয়া কর্তব্য, কিন্তু এবিষয়ে আমরা কোন চেষ্টা করি না। আমরা এবিষয়ে অন্য ধর্মাবলম্বীদিগের উপর নির্ভর করিয়া নিশ্চিন্ত আছি। স্ত্রীদিগের শিক্ষা শিক্ষা এক প্রধান শিক্ষা; তাহাও ভাল রূপে হইতেছে না। তাহার কেবল কার্পেটই বুন্ছে, কার্পেটই বুন্ছে। যদি তাহা না করিয়া পিরাগ শেলাই করিতে শিখে, তাহা হইলেও জানিলাম যে, কিছু উপকারে আইল। এক্ষণে স্ত্রীশিক্ষা কেবল বয়ে বাইবার একটা উপায় হইয়া উঠিয়াছে।

---

\* হটী বিদ্যালয়কার একজন বিদ্যাবতী বাঙ্গালী ব্রাহ্মণ কন্যা। ইষ্টার জন্মস্থান বর্ধমান জিলার সোণাই গ্রাম। ইনি বৈধব্য অবস্থায় যুগ্মবয়সে কাশীতে টোল করিয়া সভায় ন্যায়শাস্ত্রের বিচার করিতেন ও পুরুষ ভট্টাচার্যাদিগের ন্যায় বিদ্যায় লইতেন।

শ্রীশিক্ষার বিষয় এই যৎকিঞ্চিৎ বর্ণিয়া পুনরায় পুরুষদিগের শিক্ষার বিষয়ে বলিতে প্রবৃত্ত হইতেছি।

এক্ষণে স্কুল, কলেজে যে শিক্ষা প্রদত্ত হইতেছে, তাহাতে কি বিশেষ উপকার দর্শিতেছে? কই অগ্রাবধি দুই একটা লোক ব্যতীত সাহিত্য কিম্বা বিজ্ঞান বিষয়ে কেহ কিছু নুতন রকম লিখিতে অথবা নুতন আবিষ্কৃত্য করিতে সমর্থ হইলেন না। ইহার প্রধান কারণ এই যে, স্কুল কিম্বা কলেজ পরিত্যাগ করিয়া লেখা পড়ার চর্চা অধিকাংশ লোক ছাড়িয়া দেয়। আমি স্বীকার করি, জীবিকা উপার্জনের জন্য বাঁহা-দিগকে সমস্ত দিবস আফিসে কঠিন পরিশ্রম করিতে হয়, তাঁহারা সন্ধ্যার পরে আসিয়া যদি কিছু না করিতে পারেন, তাঁহাদিগের কতকটা ওজর আছে; কিন্তু বাঁহাদের সময় আছে, উপায় আছে, তাঁহারাও যে কলেজ পরিত্যাগ করিয়া পড়া শুনা একবারে ত্যাগ করিয়া বসেন, ইহা অতিশয় দুঃখের বিষয়। কোন নুতন বৈজ্ঞানিক আবিষ্কৃত্য কিম্বা কোন নুতন ভাবের কাব্য রচনা না হইবার বিশেষ কারণ এই। কলেজ অথবা স্কুল ছাড়িয়া লেখাপড়ার চর্চা একবারে পরিত্যাগ করিলে কি প্রকারে এই প্রকার আবিষ্কৃত্য বা কাব্য রচনা প্রত্যাশা করা যাইতে পারে? যে অল্প সংখ্যক ব্যক্তি লেখা পড়ার চর্চা রাখেন, তাঁহারা আবার কেবল হীন অনুকরণে রত। প্রাচীন কবি কবিকঙ্কণ, ভারতচন্দ্র, রামপ্রসাদ, রামবল্ল ইহাদের কবিতা যেন ঠিক স্বভাবের হস্ত হইতে বাহির হইয়াছে। এক্ষণকার অধিকাংশ কাব্যে সেরূপ সচ্ছন্দ্যতা দেখা যায় না। এক্ষণকার অধিকাংশ কাব্যে ইংরাজী ইংরাজী

গল্প কহে। একগুণকার কোন কোন কাব্যে পূর্বকার কাব্য অপেক্ষা কোন কোন বিষয়ে অধিক ক্ষমতা প্রকাশিত আছে বটে; কিন্তু জাতীয়তাব, সারল্য ও সহৃদয়তা বিষয়ে হীন বলিতে হইবে। এই ত গেল লেখার বিষয়, কথোপকথনে এই হীন অনুকরণ আরো স্পষ্ট দেখা যায়। তাহার প্রধান চিহ্ন ইংরাজী বাক্যলা শব্দ একত্র মিশাইয়া বলা। আমরা একগুণে যেরূপ কথা কহি, তাহা শুনিলে ইংরাজেরা কিম্বা অন্য কোন বিদেশীয় লোক হাস্য না করিয়া থাকিতে পারেন না। সে কালের লোক কোঁতুকের জন্য ইংরাজী বাক্যলা শব্দ মিশাইয়া ছড়া প্রস্তুত করিতেন। যথা :—

শ্যাম going মথুরায়, গোপীগণ পশ্চাৎ ধায়,  
বলে your Okroor uncle Is a great rascal.”

আমরা কোঁতুকের জন্য নহে, গভীর ভাবে ঐরূপ ভাষায় কথা কহি। কিন্তু আমরা নিজে বুঝিতে পারি না যে, তাহা কত হাস্যাম্পদ। “আমার father yesterday কিছু unwell হওয়াতে Doctorকে call করা গেল, তিনি একটা physic দিলেন। Physic বেস্ operate করেছিল, four five times motion হলো, অত কিছু better বোধ কচ্চেন।” এ বিড়ম্বনা কেন? সমস্তটা বাক্যলায় না বলিতে পার, কেবল ইংরাজীতে কেন বল না? তাহা অপেক্ষাকৃত ভাল। কোন কোন স্থলে ইংরাজী শব্দ ব্যবহার না করিলে চলে না, যথা ;—ডেস্ক, বেঞ্চ, টাউনহল, গবর্নর জেনারেল প্রভৃতি। কিন্তু যেস্থলে বাক্যলা শব্দ অনায়াসে ব্যবহার করা যাইতে পারে, সে স্থলে ইংরাজী শব্দ ব্যবহার করা অন্যায্য। যাহারা ইংরাজী কিছু জানেন না,

ইংরাজী ভাষাজ্ঞতা জানাইবার জন্য তাহারা বাক্সালার সঙ্গে আরো ইংরাজী শব্দ মিশাল করিয়া বলেন। কোন কোন ভট্টাচার্য এইরূপ করিয়া থাকেন, তাহাতে আরো হাসি পায়। ইংরাজী গ্রন্থকর্তা সদি (Southey) বলিয়াছেন, “আমাদিগের ভাষা অতি মহৎ ভাষা, অতি সুন্দর ভাষা। ইংরাজী ও জর্মান ভাষার পরস্পর জ্ঞাতিত্ব অনুরোধে জর্মান ভাষোৎপন্ন শব্দ ব্যবহার আমি ক্রমা করিতে পারি, কিন্তু যেখানে একটা খাঁটি ইংরাজী শব্দ ব্যবহার করা বাইতে পারে, সেখানে যে ব্যক্তি লাতিন অথবা ফ্রেন্স শব্দ ব্যবহার করে, মাতৃ-ভাষার প্রতি বিদ্বেষাচরণ জন্য তাহাকে ফাঁশি দিয়া তাহার শরীর খণ্ড বিখণ্ড করা উচিত।” যাহারা বাক্সালা কথোপকথনের সময় ইংরাজী শব্দ ব্যবহার করেন, তাঁহাদিগকে একবারে এরূপ উৎকট দণ্ড না করিয়া একটা ভদ্র উপায় প্রথম অবলম্বন করিলে ভাল হয়। যদি দেখা গেল, ভদ্রতায় কিছু হইল না, শেষে সদি-বিহিত-দণ্ড আছে। সে ভদ্র উপায় এই,—যখন কেহ ইংরাজী মিশিয়ে কথা কহিবেন তখনই বলা যাইবে, “ভাষায় আজ্ঞা ইউক”। এ বিষয়ে একটা গল্প আছে। এক ব্রাহ্মণের একটা শ্যামা ঠাকুরাণী ছিল, সেই শ্যামা ঠাকুরাণীটা তাঁহার উপজীবিকার একমাত্র উপায় ছিল। লোকে সেই ঠাকুরাণীর পূজা দিত; তাহাতে তাঁহার গুজরান হইত। এক দিন সন্ধ্যার সময় তিনি গাঁজাটা টেনে দেবালয়ের দ্বারে বসিয়া আছেন, মনে হইল, দেবী ঘরের ভিতর হইতে তাঁহার সঙ্গে কথা কহিতেছেন। দেবতারা কখনই ভাষায় কথা কহেন না, দেববাণী সংস্কৃততেই কথা কহিয়া থাকেন। তিনি ত

সংস্কৃত জানেন না, অতএব দেবীকে বলা হইল, “মা ! আমি অতি মুঢ়, ভাষায় আজ্ঞা হউক !” এই “ভাষায় আজ্ঞা হউক” কথাটা আমাদের শিখে রাখিতে হবে ; ইংরাজী শব্দ মিশাইয়া কেহ বাদ্গলা বলিলেই ঐ কথা বলিতে হইবে ।

শুদ্ধ গ্রন্থ লেখা ও কথোপকথনে হীন অনুকরণ দৃষ্ট হয়, এমন নহে ; সকল বিষয়েই ঐ হীন অনুকরণ দৃষ্ট হয় । একটা সামান্য পত্র লিখিতে হইলে- তাহা ইংরাজীতে লেখা হয় । কোন্ ইংরাজ, ফ্রেঞ্চ অথবা জার্মান ভাষায় স্বদেশীয় লোককে পত্র লিখে ? যে সকল ছাত্রেরা ইংরাজী লিখিতে শিখিতেছেন, তাঁহারা ঐ ভাষায় লেখা অভ্যাস করিবার জন্য ইংরাজীতে পত্রাদি লিখিতে পারেন, কিন্তু বয়স্ক লোকে এরূপ করেন কেন ? বাদ্গালীর সভায় ইংরাজীতে বক্তৃতা করা হয় কেন ? ইহার মানে কি ? যে সভার সভ্যেরা বাদ্গালী, সে সভার কার্য্য বিবরণ ইংরাজীতে রাখা হয় কেন ? ডিবেটিং ক্লাব, জুবিনাইল ক্লাব প্রভৃতি সভা, বাহার উদ্দেশ্য ইংরাজী চর্চা এবং ইংরাজী শিক্ষার্থী বালকেরা বাহার সভ্য, সে সকল সভার সভ্যেরা ইংরাজী ভাষা আয়ত্ত করিবার জন্য সভার কার্য্য বিবরণ ইংরাজী ভাষাতে রাখিতে পারেন, কিন্তু প্রবীন লোকের সভা বাহা অন্য উদ্দেশ্যে সংস্থাপিত হইয়াছে, তাহার সভ্যেরা তাহার কার্য্য বিবরণ ইংরাজীতে রাখিয়া মাতৃভাষার কেন অবমাননা করেন, ইহার অর্থ কিছুই বুঝিতে পারি না । যদি জিজ্ঞাসা করেন যে, এই সকল অকিঞ্চিৎকর বিষয়ে এত বাক্যব্যয় কেন ? তাহার উত্তর এই যে, বাহাতে জাতীয় গৌরবেচ্ছা সঞ্চারিত হয়, তাহা

কখন অকিঞ্চিৎকর হইতে পারে না ! এই সকল ক্ষুদ্র ক্ষুদ্র বিষয়ে জাতীয় গৌরবেচ্ছা সঞ্চারিত হইতে হইতে মহৎ বিষয়ে জাতীয় গৌরবেচ্ছা সঞ্চারিত হইবে ! আর এক কথা এই, যাহা মাতৃভাষা সম্বন্ধীয়, তাহা আমরা আদোবেই অকিঞ্চিৎকর জ্ঞান করি কেন ?

উপজীবিকা সম্বন্ধে এই বলা আবশ্যিক, যে এক্ষণে যেমন ইউরোপীয় অভাব সকল দিন দিন বাড়িতেছে, তেমনি তাহা মোচনের ইউরোপীয় উপায় অর্থাৎ শিম্প ও বাগিজ্য বিশিষ্ট রূপে অবলম্বিত হইতেছে না ! ইউরোপে এত শিম্প বাগিজ্যের উন্নতি, এখানে কেবল মাত্র এক চাকরী দ্বারা কি এত ভদ্র-লোকের জীবিকা নির্বাহিত হইতে পারে ? হাইকোর্টের একজন উকীল সম্প্রতি শ্রীমতী মাথায় দিয়ে প্রত্যহ হাইকোর্টে বেরিয়ে কিছু হয় না দেখে শেষে বলিতে বাধ্য হইয়াছিলেন, যে ধোপার কাজের এক কারখানা খুলিলে ইহা অপেক্ষা অধিক লাভ হয় ! বস্তুতঃ জগৎশুদ্ধ লোক কি কখন কেরাণী অথবা স্কুল-মাস্টার অথবা উকীল হইতে পারে ? শিম্প বাগিজ্যের দিক দিয়া কেহ পথ চলে না ! অনেকে বারিস্টার অথবা সিভিলিয়ান হইবার জন্য বিলাতে যাইতেছেন, কিন্তু কয় জন সেখানে শিম্প অথবা যন্ত্রবিদ্যা শিখিতে যান ? শিম্প ও বাগিজ্যের প্রতি অমনোযোগ জন্য দিন দিন আমরা দীন হইয়া পড়িতেছি ! ইংলণ্ডের উপর আমাদিগের নির্ভর দিন দিন বাড়িতেছে ! কাপড় পরিতে হইবে, ইংলণ্ড হইতে কাপড় না আইলে আমরা পরিতে পাই না ! ছুরি কাঁচি ব্যবহার করিতে হইবে, বিলাত হইতে প্রস্তুত না হইয়া আসিলে আমরা

তাহা ব্যবহার করিতে পাই না। এমন কি, বিলাত হইতে লবণ না আসিলে আমরা আহাৰ করিতে পাই না, দেশলাইটী পর্য্যন্ত বিলাত হইতে প্রস্তুত হইয়া না আসিলে, আমরা আশু জ্বালিতে পাই না। দেশ হইতে কিছুই হইতেছে না। বাহিরে শেক্সপীয়ার, মিল্টন ও ডিফরেন্সিয়াল কেলকুলসের চাক্চিকা, ভিতরে সব ভুগিয়া। আমাদের সকল বিষয়েই সাহেবদের উপর নির্ভর, তাহাদের সাহায্য ভিন্ন কিছুই করিতে পারি না। শেষকালে ইংরাজেরা আমাদের মুখে অন্ন তুলে দিবেন, তবে কি আমরা আহাৰ করিব? তাঁহারা বিদেশীয় লোক, তাঁহারা আমাদের জন্য যতটুকু করেন, আমাদের ততটুকুই ভাল। তাঁহাদের উপর আমাদের জোর কি? এই সকল ভারি গভীর বিষয়, এ সকল বিষয়ে অতি প্রগাঢ় চিন্তা আবশ্যক। কিসে আমাদের জাতিত্ব থাকে, কিসে যায়, তাহার প্রতি দৃষ্টি রাখিয়া আমাদের চলা আবশ্যক, নতুবা অত্যন্ত অনিষ্ট হইবার সম্ভাবনা।

উপজীবিকার বিষয় বলিয়া এক্ষণে আমাদিগের সমাজের বিষয় বলিতে প্রবৃত্ত হইতেছি। আমাদিগের সমাজ এখনও প্রকৃতরূপে সংগঠিত হয় নাই। তাহার একটা সামান্য প্রমাণ দিতেছি। প্রত্যেক জাতিরই একটা নির্দিষ্ট পরিচ্ছদ আছে; সেইরূপ পরিচ্ছদ সেই জাতীয় সকল ব্যক্তিই পরিধান করিয়া থাকেন, কিন্তু আমাদিগের বাদ্বালী জাতির একটা নির্দিষ্ট পরিচ্ছদ নাই। কোন মজলিসে যাউন এক শত প্রকার পরিচ্ছদ দেখিবেন, পরিচ্ছদের কিছুমাত্র সমানতা নাই। ইহাতে এক একবার বোধ হয়, আমাদিগের কিছুমাত্র

জাতিত্ব নাই। বস্তুতঃ ঐক্য না থাকিলে প্রকৃত জাতিত্ব  
 কিরূপে সংগঠিত হইবে? আমাদিগের কোন বিষয়ে ঐক্য  
 নাই। ইহার উপর আমরা আবার অনুকরণ-প্রিয়।  
 বাঙ্গালী জাতি অত্যন্ত অনুকরণ-প্রিয়; আমরা সকল  
 বিষয়েই সাহেবদের অনুকরণ করিতে ভাল বাসি। কিন্তু  
 বিবেচনা করি না যে সে অনুকরণ আমাদের দেশের উপ-  
 যোগী কি না, আর তদ্বারা আমাদিগের দেশের প্রকৃত  
 উপকার সাধিত হইবে কি না? সাহেবেরা পর্য্যন্ত যে  
 সাহেবী-প্রথা এদেশের উপযোগী নহে মনে করেন, তাহাও  
 আমরা অবলম্বন করিতে সঙ্কুচিত হই না। সাহেবেরা নিজে  
 বলিয়া থাকেন, সাহেবী পোশাগ এ দেশের কোনমতে উপযুক্ত  
 নয়, কিন্তু আমাদিগের দেশের কোন কোন ব্যক্তি ঐ পোশাগ  
 ব্যবহার করিতে সঙ্কুচিত হয়েন না। আমাদিগের দেশের  
 কোন বিখ্যাত ব্যক্তি ভূতপূর্ব লেফটেনেন্ট গবর্নর বিডন সাহে-  
 বের সহিত ধুতি চাদর পরিয়া দেখা করিতে যাইতেন,  
 তাহাতে গবর্নর সাহেব বিরক্তি প্রকাশ করিতেন। একবার  
 গ্রীষ্মের সময় দেখা করিতে গিয়াছেন, গিয়া দেখেন যে, গব-  
 র্নর সাহেব টিলে পাজামা ও পাতলা কামিজ পরিয়া  
 বসিয়া আছেন। আমাদিগের বন্ধুকে দেখিবামাত্র তিনি  
 বলিলেন,—“তোমাকে দেখিয়া আমার হিংসা হচ্ছে, ইচ্ছা  
 করে তোমাদিগের ন্যায় পরিচ্ছদ পরিয়া থাকি।” আমাদি-  
 গের বন্ধু উত্তর করিলেন,—“তাই কেন কখন না?” বিডন  
 সাহেব বলিলেন,—“ওরূপ পরিচ্ছদ পরিধান করা আমা-  
 দিগের দেশাচার বিকৃত, সুতরাং কেমন করে করি?” আমা-

দিগের বন্ধু উত্তর করিলেন,—“আপনাদিগের বেলা দেশাচার বলবৎ, আর আমাদিগের বেলা তাহা কিছুই নহে, আপনারা এক্রপ বিবেচনা করেন কেন?” চতুর্দিকে হীন অনুকরণের প্রবলতা দৃষ্ট হইতেছে। প্রতি পদেই অনুকরণ, ইহাতে আন্তরিক সারবত্তার হানি হইতেছে, বীর্যের হানি হইতেছে, আমরা অন্য সমাজীয়দের ক্রীতদাস হইয়া পড়িতেছি। কি আশ্চর্য্য! সাহেবেরা যাহা করিবেন, তাহাই ভাল, আর সব মন্দ। এ উপলক্ষে একটা গম্প মনে পড়িল। কতকগুলি লোক এক বাসায় থাকিত। তাহারা এক দিন একটা কাঁঠাল ক্রয় করিল। তাহাদের মধ্যে একজন বড় ইংরাজ-ভক্ত এবং কাঁঠালভক্তও ছিলেন; আর আর সঙ্গীদিগের ইচ্ছা হইল যে তাঁহাকে কাঁঠালের ভাগ ফাঁকি দেয়। একজন উহার মধ্যে বলিয়া উঠিল, “ইংরাজেরা কাঁঠাল খায় না।” তিনি অমনি কাঁঠাল ভঞ্জে বিরত হইলেন, আর আর বন্ধুরা সমুদয় কাঁঠাল খাইয়া ফেলিল। ইংরাজেরা না থাকিলে কোন সভা জাঁকে না। ইংরাজেরা ভাল না বলিলে কোন কার্যের মূল্য হয় না। সকল কাজেই রাস্তামুখের বার্নিষ চাই। এ বিষয়ে আর একটা গম্প মনে হইল। একবার এক ব্যক্তি আর একজনকে বলিতেছিল, “ওদের বাটীতে পূজার বড় ধুম, গোরায় লুচি ভাজছে।” যে কার্য্য গোরায় করে তাহার ভারি মূল্য। এখন আমাদের সকল কার্য্যেই গোরার দ্বারা লুচি ভাজান চাই। সমাজিক বিষয়েতেও সাহেবদিগের সাহায্য চাই। সাহেবেরা হিন্দুসমাজ সম্বন্ধীয় বিষয়ে যেরূপ বিজ্ঞতা ফলান্, তাহা দেখিলে আমার হাসি

উপস্থিত হয়। কয়েক বৎসর পূর্বে বঙ্গদূত নামক এক খানি সম্বাদ পত্র ছিল। তাহার সহিত সংবাদ প্রভাকরের ঝগড়া হইয়াছিল। আপনারা জানেন, সংবাদপত্র সম্পাদকেরা কিরূপ বিবাদপ্রিয়। তাঁহাদের ঝগড়া দেখিয়া কেও অব ইণ্ডিয়া সম্পাদক তাহার মধ্যস্থতা করিতে গেলেন। বঙ্গদূত বলিল, “হচ্ছিল ভোলাময়রা ও নীলু রামপ্রসাদে, এ আবার আণ্টুনি ফিরিস্কী কোথা থেকে এল?” সেই অবধি দুর্ধর্ষ কেও একেবারে চুপ্। এইরূপ অনেক সময় হিন্দুসমাজের ঐক্যোলনে সাহেবদিগের বিজ্ঞতা ফলান দেখিয়া আমরাও বলিতে বাধ্য হই যে, “হচ্ছিল ভোলাময়রা ও নীলুরাম প্রসাদে, আবার আণ্টুনি ফিরিস্কী কোথা হতে এলো?” আমাদের অর্থ সম্বন্ধীয় মোকদ্দমায় বিলাতে আপীল হয়, এখন সামাজিক বিষয়েতেও বিলাত আপাল হইতেছে! সম্প্রতি এক বাঙ্গালী ধর্মসম্প্রদায়ের লোকের মধ্যে সমাজিক কোন বিষয় লইয়া বিবাদ হইতেছিল। দুই পক্ষ বিলাতের লোকদিগের নিকট আপীল করিলেন, তাঁহারা এক পক্ষে ডিক্রী দিলেন। যে পক্ষ জিতিলেন, তাঁহাদের কতই বা আনন্দ! যে পক্ষ হারিলেন, তাঁহাদের কতই বা বিবাদ! যাঁহারা বিলাতে যান নাই, তাঁহারা বিলাতের এইরূপ পক্ষপাতী। যাঁহারা বিলাতে গিয়া-ছিলেন, তাঁহাদের ত কথাই নাই। বাঙ্গালীরা এখন ক্রমাগত বিলাতে যাইতেছে। যেমন কাশীতে ও প্রয়াগে বাঙ্গালী পাড়া হইয়াছে, তেমনি লগুনে এক বাঙ্গালী পাড়া না হইয়া উঠে। লোকে যেমন কাশীতে মরিলে আপনাকে কৃতার্থ মনে করে, তেমনি সম্প্রতি বিলাতের ফেরত একজন যুবক ডাক্তার অভ্যস্ত

পীড়িত হইয়া লওনে মরিবার ইচ্ছা করিয়া বিলাতে গিয়াছিলেন। তাঁহার মনস্কামনা সিদ্ধ হইয়াছিল ; তিনি যেমন কালীধামে পৌঁছিলেন, অমনি তাঁহার প্রাণত্যাগ হইল। পূর্বে যেমন যুবকেরা পশ্চিমে পলাইত, এক্ষণে তেমনি তাহারা বিলাতে পলাইতে আরম্ভ করিয়াছে। যে সকল যুবক কোমল-স্বভাব এবং এক্রপ ভীক যে, অন্ধকারে এ ঘর হইতে ও ঘরে একেলা যাইতে অক্ষম, তাহারা পর্যাস্ত বিলাতে যাইতেছে। যেমন কুলকামিনীদিগের উপর জগন্নাথের ডোর নামিলে তাহারা পুরী যাইতে কোন বাধা বিঘ্ন মানে না, ইহারাও সেইরূপ বিলাতে যাইতে কোন বাধা বিঘ্ন মানেন না ; এঁদের উপর বোধ হয়, বলরামের ডোর নামে। বলরামের সহিত ইংরাজদিগের তিন বিষয়ে সাদৃশ্য আছে। প্রথম,—বর্ণ বিষয়ে, দ্বিতীয়,—বল বিষয়ে, তৃতীয়,—মদ্যপান বিষয়ে। মহাভারতে উক্ত আছে, অর্জুন অস্ত্রবিদ্যা শিক্ষার নিমিত্ত দেবলোকে গিয়াছিলেন। এক্ষণে আমরাদিগের দেবলোক বিলাত। এক্ষণে বাঙ্গালীরা বিলাতে বিদ্যাশিক্ষা করিতে যান। শ্রুত হওয়া যায়, এই দেবলোকে দেবকন্যারা নাকি মোহিনীমন্ত্র জানেন। তাঁহারা বাঙ্গালীদের ভুলাইয়া রাখেন। এই জন্য পিতার সর্বদা ভয়, পাছে দেবকন্যাদিগের অনুরাগ প্রভাবে পুত্রের মন হইতে মানব কন্যার প্রতি অনুরাগ তিরোহিত হইয়া যায়। আমি বিলাতে যাইবার প্রতিপক্ষ নহি। বিলাতে যাইলে অনেক উপকার আছে ; কিন্তু দুঃখের বিষয় এই যে, যাঁহারা বিলাত হইতে ফিরিয়া আইসেন, তাঁহারা হিন্দুসমাজের সহিত একবারে সম্বন্ধ পরিত্যাগ করেন। যাঁহারা এক্ষণে বিলাত হইতে ফিরিয়া

আইসেন, হিন্দুসমাজ তাঁহাদিগকে নোকসানের খাতায় লিখিতে বাধ্য করেন। বাবু বিলাত হইতে সাহেব সাজিয়া ফিরিয়া আসিলেন, না কাহারো সঙ্গে পোশাগে মিলে, না কাহারো সঙ্গে ব্যবহারে মিলে। কোথায় তাঁহারা যে জ্ঞানো-পার্জন করিয়া আইলেন, সেই জ্ঞানালোকে স্বদেশীয়দিগকে বিভূষিত করিবেন, না একবারে সমাজ ছাড়া হয়ে বসলেন। তাঁহারা উভয় দলের ত্যজ্য হয়েন। বাঙ্গালীদিগের সঙ্গে তো তাঁহাদিগের মিলে না, ইংরাজেরাও তাঁহাদিগকে অনুকরণ-কারী শাখামৃগ বলিয়া ঘৃণা করে। কেন যে আমাদের দেশের লোক ইংরাজদিগের এত গোঁড়া হয়েন, কিছু বুঝিতে পারা যায় না। কৃষ্ণনগর কলেজের অধ্যক্ষ বিজ্ঞবর লব সাহেব বলেন, “আমাদের রীতি নীতি এমন দোষাশ্রিত যে, দিন দিন তাহার পরিবর্তন ও সংশোধন আবশ্যক হইতেছে। বাঙ্গালীরা কেন সে সকল নির্দোষ মনে করিয়া নির্দিকার চিত্তে তাহার অনুকরণ করে, বুঝিতে পারি না।” এই ইংরাজী অনুকরণের দক্ষ সমাজ সংস্কারের গতি বিপথগামী হইতেছে।

• প্রকৃত গতিতে যদি সমাজসংস্কারের স্রোত প্রবাহিত হইত, তাহা হইলে সমাজসংস্কার কার্য্য এতদিন যে কত অগ্রসর হইত, তাহা বলা যায় না। আমাদের দেশের সমাজসংস্কারকেরা যদি স্বদেশীয় ভাবে পত্তনভূমি করিয়া সমাজ সংস্কারে প্রবৃত্ত হয়েন, তাহা হইলে কৃতকার্য্য হইতে পারেন সন্দেহ নাই। মহাত্মা রামমোহন রায়, শ্রীযুক্ত বাবু দেবেন্দ্র নাথ ঠাকুর ও শ্রীযুক্ত ঈশ্বরচন্দ্র বিদ্যাসাগর মহাশয় ইহারা এই ভাবে সমাজ সংস্কার আরম্ভ করিয়া ক্রয়পরিমাণে কৃতকার্য্য

হইয়াছেন। বিজাতীয় ভাষা, বিজাতীয় ভাব, বিজাতীয় ধর্ম, কখন এ দেশে স্থায়ী হইবে না, এ বিষয়ে ত্রিযুক্ত বাবু চন্দ্রশেখর বসু মহাশয় একখানি উৎকৃষ্ট পুস্তক প্রকাশ করিয়াছেন, তাহার নাম “অধিকারতত্ত্ব।” সেই গ্রন্থ হইতে কিয়দংশ উদ্ধৃত করিয়া পাঠ করিতেছি।

“ইংরাজদিগের রীতি, নীতি, ভাবভঙ্গী, অনুকরণ করার ইচ্ছা। আমাদিগের যুবকগণের মনে বলবতী হইয়া উঠিয়াছে। কিন্তু অনর্থক কতিপয় ভাবভঙ্গী রীতি নীতির অনুকরণ করা কেবল হীনতা মাত্র। তাহাকে উদ্ধার বলে না, তাহা হীন অনুকরণ শব্দের বাচ্য। ইংরাজী বিচার যোগে এ দেশে যাহা আসিতেছে, অনেকে তাহাই অনুকরণ করিতেছেন। ইংরাজেরা শিক্ষা দিলেন, ভূত প্রেত নাই, তাহারাও ভূত প্রেত মানিলেন না; পশ্চাৎ ইংরাজী পুস্তকে লিখিল, ভূত প্রেত আছে, আবার মানিলেন। এদেশের লোক মছপায়ী ছিল না, যুবাপুরুষেরা ইংরাজদিগের অনুকরণে পান করিতে শিখিলেন; পশ্চাৎ ইংরাজেরা সুরাপাননিবারণী সভা করিতেছেন, দেখিয়া তাঁহারাও সভা করিলেন। একেশ্বরবাদী খৃষ্টানগণ কহিলেন যে, যীশুকে মানব ধর্মের আদর্শ স্বরূপ গ্রহণ না করিলে মুক্তি নাই; তাঁহারাও যীশুকে অবলম্বন করিলেন। আবার যদি ইংরাজেরা কহেন, যীশুকে ধর্মের মধ্যে রাখা উচিত নহে, তখন তাহারাও যীশুকে ত্যাগ করিবেন। হিন্দুশাসন কালে আমাদের দেশের স্ত্রীগণ এখনকার ন্যায় গৃহে বদ্ধ থাকিতেন না। মুসলমানদিগের অনুকরণে বা ভয়ে আমাদের বর্তমান অস্তঃপুর নির্মিত হইল। এখন

ইংরাজের রাজ্য, অতএব আমাদের যুবাগণ আপনাপন স্ত্রীদিগকে বিবীদিগের ন্যায় সভা মজলিশে লইয়া বাইতে আরম্ভ করিয়াছেন। পশ্চাৎ যদি ইংরাজেরা অতিরিক্ত স্ত্রীস্বাধীনতার প্রতিকূলে দণ্ডায়মান হন, তখন এদেশের লোকেরা আপনাদের স্ত্রীদিগকে গৃহে প্রবেশ করাইতে পথ পাইবেন না।\* দেশীয় লোকেরা শাস্ত্রকথা শুনিবার বা শাস্ত্র পড়িবার অনুরোধ করিলে কেহ তাহা গ্রাহ্য করেন না। কিন্তু ইংরাজেরা হিন্দুশাস্ত্র পড়েন, দেখিয়া অনেকে পাড়িতে যান। বাঙ্গালা সম্বাদ পত্র বা পুস্তক পড়িতে ভাল লাগে না, কেবল ইংরাজী পুস্তক ও সম্বাদ পত্র পড়িতেই ভাল লাগে। ইংরাজী ঔষধ ভাল, বাঙ্গালা ঔষধ মন্দ ; ইংরাজী খাদ্য ভাল, বাঙ্গালা খাদ্য মন্দ ; ইংরাজী পাদরী ভাল, বাঙ্গালা পাদরী মন্দ ; ইংরাজী বাইবেল ভাল, হিন্দু শাস্ত্র মন্দ ; ইংরাজী সব ভাল, দেশীয় সব মন্দ।

“কিন্তু হেঁ স্বদেশ হিতৈষি ! তুমি এমন মনে করিও না যে, সমুদায় ভারতবর্ষ এরূপ ইংরাজী ভাবে অনুবাদিত হইয়াছে। \* \* \* স্বজাতীয় ভাবে মানবের স্বাভাবিক অধিকার। সে অধিকার হইতে স্বভাবতঃ কেহই ভ্রষ্ট হইবেক না। যদি ইংরাজেরা স্বর্ণকৃত স্বজাতীয় ধর্ম্মাধিকার হইতে ভ্রষ্ট না হন, তবে আমরাই কি এত হীন হইয়াছি যে, ভারতমৃত্তিকার উৎপন্ন ধর্ম্মভাব

---

“\* এই বর্ত্তমান সময়েই সাহেবেরা তাঁহাদের অতিরিক্ত স্ত্রী-স্বাধীনতায় বিরক্ত হইয়া প্রাচীন কালের শাসন প্রণালীর পুনরাগমন প্রার্থনা করিতেছেন।

‘Saturday Review, vide Englishman, 6th May, 1871.’

হইতে পরিভ্রষ্ট হইব, যদি ইংরাজেরা মূলধর্ম প্রতিপাদক বাইবেল ত্যাগ না করেন, তবে আমরাই কি এত ঘৃণা হইয়াছি যে, ভারতমৃত্তিকার মঙ্গলপ্রস্থানস্বরূপ ব্রহ্মপ্রতিপাদক বেদ বেদান্ত উপনিষদাদি শাস্ত্র ত্যাগ করিব? এই সকল ধর্মভাব, এই সকল ব্রহ্মজ্ঞান শাস্ত্র, যাহার গুরুভারের সহিত শত-কোটি বাইবেল, ইঞ্জিল, তত্ত্বরেং, জবুর, কোরাণ ও আবেস্তা এবং পার্কার, নিউম্যান, কাণ্ট, কুজিন প্রভৃতির স্তূপায়মান গ্রন্থ সমূহ সমতুল্য হয় না, তাহাতে আমাদের যে আত্মীয় ও স্বজাতীয় এই দ্বিবিধ অধিকার যুগপৎ আছে, তাহা মনে করিলেও পিতামহ পুরাণ পরমেশ্বরকে শতশত ধন্যবাদ প্রদান করিতে হয়।”

উল্লিখিত মহাশাস্ত্র সকলকে মূল করিয়া ধর্মসংস্কার কার্যে আমাদের প্রবৃত্ত হওয়া কর্তব্য। ধর্ম ও সমাজসংস্কারের এমন একটি কার্য নাই, উহা সম্বন্ধীয় এমন একটি বিশুদ্ধ মত নাই যাহার প্রমাণ আমাদের শাস্ত্রে না পাওয়া যায়। ধর্ম-বিষয়ে এমন একটি সঙ্গুপদেশ নাই যাহা আমাদের ধর্ম গ্রন্থে পাওয়া যায় না; সমাজসম্বন্ধে এমন একটি সুরীতি নাই, যাহা প্রাচীন ভারতবর্ষে প্রচলিত ছিল না এবং যাহা এক্ষণে হিন্দুভাবে প্রচার না করা যাইতে পারে। হিন্দুভাব রক্ষা করিয়া আমরা ধর্ম ও সমাজসংস্কার কার্যে প্রবৃত্ত হইলে, আমরা ঐ কার্যে সুসিদ্ধ হইতে পারি।

চরিত্র বিষয়ে একালে দুইটি বিষয়ে উন্নতি দেখা যাইতেছে। এক উৎকোচ গ্রহণে বিরতি আর এক স্বদেশপ্রিয়তা। সেকালে ঘুষ লওয়া একটা বড় দোষ বলিয়া গণ্য হইত না।

কারণ বড় ছোট প্রায় সকল লোকেই উহাতে কিছু না কিছু লিপ্ত থাকিতেন। এখন সুশিক্ষিতদের মধ্যে ঘৃণা লওয়া বিশেষ নিন্দনীয় বলিয়া পরিগণিত হইতেছে। সে কালের লোকদিগের স্বদেশের প্রতি একটা কর্তব্য বোধ ছিল না; এখন ক্রমে ক্রমে লোকের মনে সে কর্তব্য বোধ জন্মিতেছে, বলিতে হইবে। চরিত্র সম্বন্ধে যেমন দুই একটা বিষয়ে উন্নতি দৃষ্ট হইতেছে, তেমনি তৎসম্বন্ধে অনেক দোষ জন্মিতেছে, তাহা অতি শোচনীয়।

চরিত্র সম্বন্ধে এক্ষণকার লোকের প্রথম দোষ, পিতৃভক্তির হ্রাস। নিজ কর্মস্থলে বৃদ্ধ পিতা আসিলে তাঁহাকে পিতা বলিয়া লোকের নিকট পরিচয় দিতে বাবু লজ্জিত হয়েন ও কোন কোন বাবু বাবার পরিবার অর্থাৎ মাকে খেতে দিতে হয় বলিয়া আক্ষেপ প্রকাশ করেন এইরূপ গম্প সকল শুনিতে পাওয়া যায়। এই সকল গম্প সম্পূর্ণরূপে সত্য না হউক, তথাপি এই সকল গম্প উঠা এইক্ষণকার লোকের মনের ভাবের পরিচয় প্রদান করে। আমি স্বচক্ষে দেখিয়াছি, বৃদ্ধ পিতা ক্ষুধিত্তে তাঁহার এক বৃদ্ধ বন্ধুকে উপযুক্ত কীৰ্ত্তিমান পুত্রের সঙ্গে আলাপ করাইয়া দিবার জন্য লইয়া গেলেন; পিতা ও তাঁহার বন্ধু গদির নীচে বসিলেন, আর পুত্র গদির উপর বসিয়া রহিলেন। চানক্য শ্লোকে উক্ত আছে যে,—“পুত্র ষোড়শ বৎসর প্রাপ্ত হইলে তাহার সঙ্গে বন্ধুবৎ ব্যবহার করিবে।” উপযুক্ত পুত্রের সহিত পিতার এইরূপ ব্যবহার করা কর্তব্য; কিন্তু পুত্রের উচিত হয় না যে, পিতার প্রতি কোন অসম্মানের চিহ্ন প্রদর্শন করেন। কিন্তু পিতার প্রতি অসম্মানের চিহ্ন প্রকাশ করিতে এক্ষণে অনেক যুবককে দৃষ্টি করা যায়।

এক্ষণকার লোক পান ও পূর্বাপেক্ষা অধিকতর বেশ্যাসক্ত । মত্তপান যে আমাদের বর্তমান সমাজে অতি ভীষণ অনিষ্টপাতের কারণ হইয়াছে, তাহার সন্দেহ নাই । অনেকে বলেন, পরিমিত মত্তপানে দোষ নাই । কিন্তু ইহা যে কুদৃষ্টান্ত স্বরূপ হইয়া কত অনিষ্ট সাধন করে, তাহার অন্ত নাই । পিতা কিম্বা শিক্ষক পরিমিত মত্তপায়ী হইলেও বাবা কিম্বা মাস্টার মদ খান ত আমি খাব না কেন, এইরূপ বিবেচনা করিয়া যুবকেরা মত্তপানে প্রবৃত্ত হয় । কিন্তু তিনি যে পরিমিতরূপ পান করেন, তাহা বিবেচনা না করিয়া আশু অপরিমিত পানে প্রবৃত্ত হয় । এ বিষয়ে বাবা ও মাস্টারেরও অধিক দিন সাবধান থাকা কঠিন । তাঁহারাও অধিক দিন মিতপায়ী থাকিতে পারেন না । পরিমিত মত্তপান কেমন, না,—বাঁধে একটি ছিদ্র রাখা । সেই ছিদ্র দিয়া জল প্রবেশ করিয়া ক্রমে বাঁধ যেমন নষ্ট করে, সেইরূপ পানদোষ পরিমিত পানরূপ ছিদ্র দিয়া প্রবেশ করিয়া ক্রমশঃ বৃদ্ধি হইয়া পরিশেষে মনুষ্যের সর্বনাশ করে । আমি শুনিয়া আত্মলাদিত হইলাম, যে পূর্বে কলেজের ছাত্রেরা এই দোষে যেরূপ লিপ্ত ছিলেন এক্ষণকার ছাত্রেরা সেরূপ লিপ্ত নহেন । যেমন পানদোষ বৃদ্ধি পাইতেছে তেমনি বেশ্যাগমনও বৃদ্ধি হইতেছে । সে কালে লোকে প্রকাশ্যরূপে বেশ্যা রাখিত । বেশ্যা রাখা বাবুগিরির অঙ্গ বলিয়া পরিগণিত হইত ; এক্ষণে তাহা প্রচ্ছন্নভাবে ধারণ করিয়াছে, কিন্তু সেই প্রচ্ছন্নভাবে তাহা বিলক্ষণ বৃদ্ধি পাইতেছে । বেশ্যাগমন বৃদ্ধি পাইতেছে, তাহার প্রমাণ বেশ্যাসংখ্যার বৃদ্ধি । পূর্বে গ্রামের গ্রাণ্ডে দুই এক ঘর বেশ্যা দৃষ্ট হইত ; এক্ষণে পল্লিগ্রামে বেশ্যার সংখ্যা বিলক্ষণ বৃদ্ধি পাইতেছে ।

এমন কি, স্কুলের বালকদিগের মধ্যেও এই পাপ প্রবলাকার ধারণ করিয়াছে! যেমন পানদোষ বৃদ্ধি পাইতেছে, তেমন বেশ্যাগমনও বৃদ্ধি হইতেছে! ইহা কিন্তু সভ্যতার চিহ্ন! যতই সভ্যতা বৃদ্ধি হয়, ততই পানদোষ, লাম্পাট্য ও প্রবঞ্চনা তাহার সঙ্গে সঙ্গে বৃদ্ধি হইতে থাকে। \*

এক্ষণকার লোকেরা পূর্বকার লোক অপেক্ষা অধিক অস-  
রল! এখন পদে পদে খলতা, অসরলতা; এখন লোকের  
সঙ্গে কথা কহিয়া শীঘ্র বুঝিবার যো নাই যে তাহার মনের ভাব  
কি? এখন বাহিরে, “আসিতে আজ্ঞা হউক,” “ভাল আছেন”  
“মহাশয়” ইত্যাদি দাঁতবাহির করা সভ্যতা কিন্তু ভিতরে  
ভিতরে পরস্পর এমনি কোঁশল চলিতেছে যে, তুমি যদি “বেড়াও  
ডালে ডালে, আমি বেড়াই পাতায় পাতায়!” এক্ষণে ছদ্ম  
ব্যবহার অতিশয় প্রবল! এ বিষয়ে বহরমপুর নিবাসী সুকবি  
রামদাস সেন এক্ষণকার লোকদিগের প্রতি লক্ষ্য কবিয়া যাহা  
লিখিয়াছেন, তাহা খুব সত্য।

“কত ভাবে ভ্রম তুমি কত সাজ পর।

বঙ্গরঙ্গআগারেতে অভিনয় কর ॥

দেশের হিতের জন্য করি প্রাণপণ।

এখানে সেখানে ফের মহাব্যস্ত মন ॥

পৌষ্যবর্ষণ মুখে হৃদে ক্ষুরধার।

মরি কি বঙ্গের স্নাত চরিত্র তোমার! ॥”

এক্ষণে প্রতারণা অত্যন্ত বৃদ্ধি হইয়াছে! পূর্বে এক ধর্ম-

\* প্রকৃত সভ্যতা কাহাকে বলে তজ্জন্য আমার প্রণীত “হিন্দু  
ধর্মের শ্রেষ্ঠতার” ৩৫ ও ৩৬ পৃষ্ঠা দেখ।

সাক্ষী অথবা সূর্য্যসাক্ষী তমঃসুকে কাজ চলিত, বোধ হয় কোন কোন পুরাতন বাড়ীর পুরাতন কাগজ পত্র খুঁজিলে তাহার মধ্যে এরূপ তমঃসুক এখনো পাওয়া যাইতে পারে। কিন্তু এক্ষণে চারিদিকে আঁটাআঁটি করিলেও লোকের প্রতারণা নিবারিত হয় না।

এখনকার লোকদিগের স্বার্থপরতা বড় প্রবল। একাল অপেক্ষা সকালে পল্লির লোকদিগের মধ্যে পরস্পর সহানুভূতি অধিক ছিল। পূর্বে গ্রামসম্পর্ক পাতান হইত ও যাহার সহিত যেরূপ সম্পর্ক পাতান হইত তাহার প্রতি লোকে তদনুরূপ ব্যবহার করিত; তাঁহারা “দেহ সম্বন্ধ হতে গ্রাম সম্বন্ধ সাঁচা”\* জ্ঞান করিতেন। বাটীতে কোন কার্য উপস্থিত হইলে পাড়ার লোকে আসিয়া সমস্ত কার্য নির্বাহ করিত; এমন কি, গৃহমার্জনী পর্য্যন্ত লইয়া গৃহমার্জন করিত। পূর্ব্বকার লোকেরা আপদ বিপদে পাড়ার লোক সকলের বিশেষ সহায়তা করিতেন, এখন তেমন দেখা যায় না। দূরস্থ পল্লিগ্রামে সে কালের ভাব এখনও দৃষ্ট হয়। সকালে কলিকাতার নিকটস্থ কোন গ্রামে একটা সম্পন্ন ব্যক্তি ছিলেন। তিনি প্রত্যহ প্রাতে ছাতি হাতে করিয়া বাড়ী বাড়ী ভ্রমণ করিয়া কে কেমন আছে, কাহার কি হইয়াছে, এই সব তত্ত্ব লইতেন। সে গ্রামের যে সকল চাকুরে লোকদিগকে সর্বদা বিদেশে থাকিতে হইত, তাঁহার উপরে তাহার অগৃহের আবশ্যক কর্মের ভার দিয়া নিশ্চিন্ত থাকিত। তিনি তাহা সুন্দর রূপে নির্বাহ করিতেন। এমন কি, কাহারো বাড়ীতে পুষ্করিণী খনন হইতেছে, বাড়ীর কর্ত্তা বিদেশে, তিনি

রৌদ্রের সময় ছাতী ঘাড়ে করিয়া বসিয়া খনন কার্যের তত্ত্বাবধান করিতেছেন। তাঁহার বাড়ীতে এক স্বপ্নাত্ত ঔষধ ছিল ; দেশবিদেশ হইতে রোগী সকল তাহা লইতে আসিত। তিনি কখন কখন তাহাদের মলমূত্র পর্য্যন্ত স্বহস্তে পরিষ্কার করিতেন। এমন পরহিতৈষিতা এখন কোথায় দেখা যায় ? এক্ষণে আতিথেয় ধর্মেরও হ্রাস হইয়া আসিতেছে। সে কালের এমন সকল গম্প শুনা আছে যে, এক এক লোকের বাড়ীতে রাশীকৃত অন্ন পাক হইত ; সেই রাশীকৃত অন্নের উপর ঘি ঢালিয়া দেওয়া হইত। কেবল বাড়ীর কর্তা যিনি তিনিই ঘি খাবেন, এ বড় খারাব কথা, সেই সম্বৃত অন্ন অতিথি অভ্যাগত সমুদায় লোককে ভোজন করান হইত। এখন এমনি হইয়া উঠিয়াছে, বাগান হইতে আত্র আইলে তাহার মধ্যে হিসাব মত কয়েকটা রেখে বাকী বাজারে বিক্রয় করিতে দেওয়া হয়। পূর্বে বাটীতে লোক আইলে তিনি যাহাতে অধিক দিন থাকেন, লোকে এমন আগ্রহ প্রকাশ করিত, পূর্বে ঘটি বাঁধা দিয়া লোকে অতিথি-সেবার ব্যয় নিষ্পাহ করিত, এক্ষণে অতিথি বাটী হইতে বেরতে পারিলে বাঁচে। এখনও কলিকাতা অপেক্ষা পল্লিগ্রামে অধিক আতিথেয় আছে। যেমন অন্য দেশীয় লোক অপেক্ষা স্বদেশীয় লোক নিকটতর, তেমনি অন্য স্বদেশীয় লোক অপেক্ষা আত্মীয় কুটুম্ব নিকটতর। এই নিকটতর সম্পর্কবোধ ক্রমে হ্রাস হইতেছে। পূর্বকার লোকেরা আত্মীয় স্বজনের যেমন সম্বাদ লইতেন, এক্ষণকার লোকে তেমন লয় না। বদান্যতা বিষয়েও একালের লোকদিগের হীনতা দৃষ্ট হয়। এক্ষণকার বদান্যতা চাঁদাপুস্তকগত বদান্যতা,

আন্তরিক বদান্যতা নহে। পূর্বকার বদান্যতা আড়ম্বরশূন্য ছিল ; এক্ষণকার বদান্যতা সাড়ম্বর। এখনও পল্লিগ্রামে অনেক আড়ম্বরশূন্য বদান্যতার কার্য্য হইয়া থাকে ; তাহা সাহেবদের গোচর হয় না। তাঁহারা অনুমান করেন যে বাঙ্গালীদিগের বদান্যতা নাই। যাহা হউক, গড়ে একালে স্বার্থপরতার অতি-শয় বৃদ্ধি হইতেছে সন্দেহ নাই। বর্তমান সভ্যতার অপর নাম স্বার্থপরতা বলিলে অতু্যক্তি হয় না। পূর্বে যে ব্যক্তি পোনের টাকা মাসে উপার্জন করিত, সে আট টাকা পরিবার প্রতি-পালনে ব্যয় করিয়া বাকি সাত টাকা পরোপকারে ব্যয় করিতে সক্ষম হইত, এক্ষণে সেই সাত টাকা সভ্যতার অনুরোধে বিলা-সের দ্রব্যে ব্যয় করিতে বাধ্য হয়।

কৃতজ্ঞতাধর্মেও এক্ষণকার লোকদিগকে পূর্বকার লোক অপেক্ষা হীন দেখা যায়। পূর্বকার লোকে যেমন সরলতা পূর্বক উপকার স্বীকার করিতেন, এক্ষণকার লোকে সেরূপ করে না। স্বকীয় গৌরব নাশের আশঙ্কায় তাহারা তাহা গোপন করিতে চেষ্টা করে। এক্ষণকার একজন সুবিখ্যাত ব্যক্তি বলেন, যে তিনি যাহার যত উপকার করিয়াছেন, তিনি তাহা হইতে তত অনিষ্ট প্রাপ্ত হইয়াছেন ; এক্ষণে তিনি স্বদেশীয় ব্যক্তিদিগের উপর একবারে এমনি চটিয়া গিয়াছেন যে, কাহারও উপকার করিতে ইচ্ছুক নহেন। এরূপ চটিয়া বসিয়া থাকা অন্যায় কিন্তু এরূপ চটিবার বিশেষ কারণ আছে, তাহাও অস্বীকার করা যাইতে পারে না। আমরা যে বিখ্যাত ব্যক্তির কথা বলিতেছি, তিনি বস্তুতঃ চটিয়া বসিয়া থাকেন না, তাঁহার হৃদয় তাঁহাকে চটিয়া থাকিতে দেয় না।

এক্ষণে সুখপ্রিয়তা, বিলাসপরায়ণতা ও বাবুগিরির অত্যন্ত প্রাদুর্ভাব হইয়াছে। এমন শুনাগিয়াছে, পূর্বকালের কোন দেওয়ান নৌকা হইতে উঠিয়া বাড়ী যাইবেন; যেখানে নৌকা হইতে নামিলেন, সেখান হইতে তাঁহার বাটী ১০। ১২ ক্রোশ দূর। পালকী আসিয়া পৌঁছে নাই; তিনি হাঁটিয়াই চলিয়াই গেলেন। এখন দুপা হাঁটিতে হইলে সম্পন্ন লোকে বিপদ জ্ঞান করে। সেতুবন্ধ রামেশ্বরের লোকেরা বাবুকে “জবড়জঙ্গ” বলিয়া ডাকে; বাবুর এমন উপযুক্ত আখ্যা আর কোন খানে শুনি নাই। দেওয়ান বাটীতে গিয়া দেখিলেন তাঁহার ভ্রাতৃবধূর প্রসববেদনা উপস্থিত হইয়াছে; স্মৃতিকা গৃহের জন্য কাষ্ঠ চাই। কিন্তু দেখেন ভৃত্যেরা কোন কারণ বশতঃ কেহ উপস্থিত নাই; কি করেন, নিজেই কাষ্ঠ চুলা করিতে আরম্ভ করিলেন। এক্ষণকার লোকে এরূপ শারীরিক পরিশ্রম করিতে অত্যন্ত বিমুখ। এখন লেখাপড়া শিখিলেই কেবল বাবু হইবার চেষ্টা। কোন বিখ্যাত ব্যক্তির নিকট শুনিয়াছি, তিনি স্বীয় গ্রামের কৃষকদিগের নিমিত্ত রাজনিক বিদ্যালয় স্থাপন করিয়াছিলেন, কিন্তু দেখিলেন, তাহাতে উন্টা ফল উৎপত্তি হইতে লাগিল। ছেলের পিতারা সকলে বলিতে লাগিল, “মহাশয়! আমার ছেলেকে আর পড়িতে দেওয়া হবে না। আমাদের বাপ পিতামহের প্রথা চাসবাস করা, ছেলেরা তাহাতে সাহায্য করিয়া থাকে। এখন স্কুলে দেওয়া অবধি আমার ছেলে এমনি বাবু হয়ে পড়েছে যে, কেবল মোজা আর ইংরাজী জুতা পরিবার জন্য ব্যগ্র; আমার কোন কর্মেই সে সাহায্য করে না।” এই কথা অনেক স্কুলের নাইটস্কুলের ছাত্রদিগের পক্ষেই খাটে।

চরিত্র বিষয়ে বর্তমান বঙ্গসমাজের আর এক অবনতির চিহ্ন, যুবকদিগের অশিষ্ট ব্যবহার। সে কালে যেমন প্রবীন ব্যক্তির সম্মান ছিল, যেমন প্রত্যেক পাড়ায় এক জন করিয়া কর্তা থাকিতেন সকলেই তাঁহাকে সম্মান করিত, সকলেই তাহার বশব্দ থাকিত, সেরূপ ভাব এখন দৃষ্ট হয় না। এখন সকলেই স্ব স্ব প্রধান, কেহ কাহাকে মানে না, কেহ কাহার তোয়াক্কা রাখে না। স্বাধীনতার ভাব ভাল ভাব, কিন্তু বয়সের প্রতি, বিজ্ঞতার প্রতি উপযুক্ত সম্মান করা কর্তব্য। ঔদ্ধত্যের ভাব কখনই প্রশংসনীয় হইতে পারে না। যুবকেরা অত্যন্ত মান্য ব্যক্তির বিষয়েও কথোপকথনের সময়—“তিনি” শব্দ ব্যবহার হুনা করিয়া “সে” শব্দ ব্যবহার করিয়া থাকে; “করিয়াছেন” শব্দ ব্যবহার না করিয়া “করিয়াছে” শব্দ ব্যবহার করিয়া থাকে। নিউটন ও বেকনও এই অশিষ্টাচার হইতে অব্যাহতি পান না। কিন্তু আপনার স্ত্রীর প্রতি তাহাদিগকে এরূপ অসম্মান প্রকাশ করিতে কখন দৃষ্ট হয় না। পায়ে পা ঠেকিয়াছে, হয় ইংরাজী শিষ্টাচার অনুসারে “বেগ ইওর পার্ডন” বল, অথবা বাঙ্গালী প্রথা অনুসারে “নমস্কার” কর, ইহার কিছুই করে না। রাস্তায় মান্যব্যক্তির সহিত দেখা হইলে, হয় ইংরাজী প্রথা অনুসারে মাথা নোয়াও অথবা বাঙ্গালী প্রথানুসারে নমস্কার কর, কিন্তু কিছুই করা হয় না। তাহার প্রতি এমনি ব্যবহার করা হয়, যেন তাঁহার সঙ্গে কোন কালে আলাপ নাই। কোন কোন যুবককে শুকতর ব্যক্তি যে কেদারায় বসিয়া আছেন, তাহার উপর ইংরাজী কেতা অনুসারে পা রাখিতে দৃষ্ট হয়। অশিষ্টতা ইহা অপেক্ষা অধিক গমন করিতে পারে না।

এই ত পুরুষদিগের কথা গেল। এক্ষণে একালের স্ত্রীলোকদিগের কথা কিছু বলিতে চাই। সেকালের স্ত্রীলোকেরা একালের স্ত্রীলোক অপেক্ষা অধিক শ্রমশীলা ছিলেন। এক্ষণে সম্পন্ন মানুষের বাটীতে স্ত্রীলোকেরা যেমন দাস দাসী ও পাচক পাচিকার প্রতি সম্পূর্ণ নির্ভর করেন, স্বহস্তে গৃহকার্য করিতে বিমুখ, সেকালের স্ত্রীলোকেরা সেরূপ ছিলেন না। সেকালের বড় বাড়ীর স্ত্রীলোকেরা পর্য্যন্ত অনেক পরিমাণে গৃহকার্য নিজ হস্তে সম্পাদন করিতেন। বর্তমান সময়ে আমাদের দেশের শিক্ষিত স্ত্রীলোকেরা গৃহকার্য করিতে, শারীরিক পরিশ্রম করিতে অনিচ্ছুক। এ বিষয়ে বিলাতের শিক্ষিত স্ত্রীলোকদিগের নিকট উপদেশ গ্রহণ করা তাঁহাদিগের কর্তব্য। তাঁহারা এরূপ বাবু নহেন।\* এক্ষণকার ধনাঢ্য ব্যক্তিদিগের স্ত্রীদিগের ন্যায় সেকালের ধনাঢ্য ব্যক্তিদিগের স্ত্রীরা স্বহস্তে পাক করা অসম্মানের কার্য মনে করিতেন না। বিলাতে মধ্যে সম্পন্ন লোকের স্ত্রীরা পাক ক্রিয়ার প্রতি অত্যন্ত অমনোযোগী হইয়াছিলেন; এক্ষণে তাঁহারা তজ্জন্য অনুতাপ করিতেছেন। এক্ষণে মহা প্রদর্শনের স্ফাটিক গৃহে একজন সুপশাস্ত্র-বিশারদ ব্যক্তি ঐ শাস্ত্র বিষয়ে উপদেশ দিতেছেন; অনেক বিবি তাহা

---

\* “বুদ্ধিমান ব্যক্তি জানেন, নৈসর্গিক নিয়ম কখন কাল মহাশোকে পরিবর্তিত হয় না। যদি আধুনিক বাঙ্গালিরা বহুরোগী এবং অস্পায় হইয়া থাকে, তবে তাহার অবশ্য নৈসর্গিক কারণ আছে, সন্দেহ নাই। আধুনিক প্রস্রুতিগণের শ্রমবিরতিই সেই সকল নৈসর্গিক কারণের মধ্যে অগ্রগণ্য।”

বঙ্গদর্শন, বৈশাখ, ১২৮১।

শুনিতো যান। এক্ষণে পাক ক্রিয়ার উন্নতি সাধন জন্য স্ত্রীলোকদিগের একটি সভা সংস্থাপিত হইয়াছে, সেই সভার কর্তৃ রাণীর এক কন্যা। আমাদিগের দেশ এক্ষণে সকল বিষয়ে বিলাতের অনুবর্তী। যখন বিলাতে এবিষয়ে মনোযোগ প্রদত্ত হইতেছে, তখন ভরসা হইতেছে, এখানেও ঐ বিষয়ে মনোযোগ প্রদত্ত হইবে। সম্প্রতি বিলাতের একটি বিবি বান্ধালি দ্বারা সম্পাদিত কোন ইংরাজী সম্বাদপত্রের সম্পাদককে লিখিয়া পাঠাইয়াছেন, যে ভারতবর্ষীয় স্ত্রীলোকেরা চিরকাল পাক-ক্রিয়ার প্রতি মনোযোগ জন্য বিখ্যাত, এ বিষয়ে তাঁহাদিগের মনোযোগ যেন ন্যূন না হয়, তাহা হইলে তজ্জন্য বিলাতের বিবিরা এক্ষণে যেমন অনুতাপ করিতেছেন, সেইরূপ অনুতাপ করিতে হইবে। সে কালের স্ত্রীলোকেরা এক্ষণকার স্ত্রীলোক অপেক্ষা আত্মনির্ভরশালিনী ছিলেন। তাঁহারা শিশু সন্তানের সামান্য সামান্য রোগে চিকিৎসকের উপর এত নির্ভর করিতেন না, নিজে চিকিৎসা করিতেন। এ বিষয়ে সে কালের স্ত্রীলোকদিগের যে জ্ঞান ছিল, তাহা অবজ্ঞা করা আমাদের উচিত হয় না। এখনও সে কালের যে সকল গিন্নিবান্নি জীবিত-বান আছেন, তাঁহাদিগের নিকট হইতে ঐ সকল ঔষধ জানিয়া লইয়া তদ্বিষয়ে একখানি পুস্তক প্রকাশ করা কৰ্ত্তব্য। শিশু-সন্তানদিগকে তেজস্বর বিদেশীয় ঔষধ প্রয়োগ তাহাদিগের কণু প্রকৃতি ও দৌৰ্ব্বল্যের প্রধান কারণ। সে কালের স্ত্রীলোকেরা এক্ষণকার স্ত্রীলোক অপেক্ষা স্নেহশীলা ও দয়াশীলা ছিলেন। স্বামীর ও পুত্রের প্রতি, স্ত্রীলোকের ত স্বভাবতঃ স্নেহ হইয়া থাকে। স্বামী ও পুত্র ব্যতীত অপরের প্রতি দয়া ও স্নেহ করাই

ধর্ম। সে কালের ধনাঢ্য ব্যক্তিদিগের স্ত্রীরা বাটীস্থ আত্মীয়  
পরিজন ভৃত্য সকলের ভাল করিয়া আহার হইল কি না, তাহা  
নিজে সম্পূর্ণ মনোযোগ পূর্বক দেখিতেন। এক্ষণে ধনাঢ্য  
ব্যক্তিদিগের স্ত্রীরা সেরূপ দেখেন না। পতিভক্তি ও পতিনিষ্ঠা  
আমাদিগের হিন্দু স্ত্রীদিগের প্রধান গৌরব স্থল। এ বিষয়েও  
এ কালের স্ত্রীলোকদিগের হীনতা দৃষ্ট হইতেছে।

উপরে ভদ্র স্ত্রীপুরুষদিগের চিত্র প্রদর্শিত হইল। যখন  
ভদ্রলোকেরা এরূপ, তখন ছোটলোকেরা ভাল থাকিবে ইহা  
বিকল্পে প্রত্যাশা করা যাইতে পারে? আমাদিগের দেশের  
ছোটলোকেরা অন্যত্র দেশের ছোটলোক অপেক্ষা দীর, সম, ১ম,  
বিশ্বাসী ও ধর্মভীরু। ইউরোপ খণ্ডের ছোটলোকেরা কাওজান-  
শূন্য পণ্ডিতবিশেষ বলিলে হয়, ইহার প্রমাণ জাহাজী ও মৈনিক  
গোরাদিগের আচরণ; আমাদিগের দেশের ছোটলোকেরা একপা  
নহে। ইহার প্রধান কারণ পুরুষের ভদ্রলোকদিগের দৃষ্টান্ত এবং  
রামায়ণ ও মহাভারতের নীতিগত কথা সঙ্গত শ্রবণ। কিন্তু এক্ষণে  
কার ভদ্রলোকদিগের দৃষ্টান্ত অনুসারে ছোটলোকদিগের মধ্যে  
পানদোষ ও অসৎ ব্যবহার ক্রমে প্রবল হইয়া উঠিতেছে। তাহা-  
দিগের মধ্যে এক্ষণে সেরূপ গভীর ও ধর্মভীরু দৃষ্ট হয় না।  
পূর্বে প্রভু ভূতির মধ্যে বেকুপ একটা স্নেহ ভাব দৃষ্ট হইত,  
এক্কে তাহারও হ্রাস হইয়া গিয়াছে। প্রভুদিগের ব্যবহার  
ইহার একটা প্রধান কারণ বলিতে হইবে। তাহার ভূতিদিগের  
প্রতি সে কালের লোকের মত সদয় ব্যবহার করেন না। ইংরাজী  
চলনে চলেন। ইংরাজেরা ভারতবর্ষে ভূতাদিগের প্রতি যেকুপ  
ব্যবহার করিয়া থাকেন ইহারাও সেইরূপ করিয়া থাকেন।

উপরে প্রদর্শিত চিত্র অবলোকন করিলে প্রতীতি হইবেক যে, চরিত্র বিষয়ে আমাদিগের সমাজ ক্রমে অবনতি প্রাপ্ত হইতেছে। আমরা আনাদের পুরাতন গুণগুলি হারাইতেছি, অথচ ইংরাজদিগের সকাণ্ণ সকল অনুকরণ করিতেছি না। বিলাতের অনেক ভদ্র ইংরাজেরা চরিত্র বিষয়ে আমাদিগের অনুকরণ স্থল হইতে পারেন। এমন শুনা গিয়াছে, তাঁহারা ত্রাণ্ডি পান করেন না, তাঁহারা ত্রাণ্ডির নাম পর্য্যন্ত ভদ্রলোকের নিকট উচ্চারণ করা অশিষ্টাচার জ্ঞান করেন। তাঁহাদের স্বার্থপরতা অস্প, আতিথেয়তা বিলক্ষণ আছে সরলতা বিলক্ষণ আছে, ক্লান্ততাও বিলক্ষণ আছে। কৈ বিলাতের ভদ্র ইংরাজদিগের এই সকল ভদ্রগুণ ত আমরা অনুকরণ করি না? কৈ সাধারণ ইংরাজবর্গের সাহস, অধাবসায়, দৃঢ় প্রতিজ্ঞতা ও শ্রমশীলতা ত আমরা অনুকরণ করি না? তাঁহাদের যত মন্দগুণ, তাই অনুকরণ করি। এদিকে এই অধম প্রবৃত্তি, ওদিকে সমস্ত হিন্দু আচার ব্যবহারের প্রতি সম্পূর্ণ অনাস্থা, এই দুইটী একত্র মিলিত হইয়া যে কি অনিষ্ট সম্পাদন করিতেছে, তাহার ইয়ত্তা করা যায় না। তালরস রন্ধের অভাস্তুরে থাকিয়া নৈসর্গিক নিয়মানুসারে পরিমিত সূর্য্যকিরণ সেবনে মধুর গুণ প্রাপ্ত হয়, কিন্তু তাহা বহির্গত করাষ্টয়া অনৈসর্গিক রূপে অপরিমিত সূর্য্যকিরণ সেবন করাইলে, তাড়িতে পরিণত হয়, সেইরূপ যদি হিন্দুসমাজ আপনাতে আপনি থাকিয়া অর্থাৎ আপনার মর্য্যাদা না হারাইয়া স্ত্রীয় আচার ব্যবহার সকলকে পাশ্চাত্য আলোক স্বাভাবিক ক্রমে সেবন করায়, তাহা হইলে তাহা উৎকর্ষ লাভ করিতে পারে। কিন্তু তাহা না করিয়া

উহা আপনাতে আপনি না থাকিয়া ঐ সকল আচার ব্যবহারকে ঐ আলোক অস্বাভাবিক আতিশয্যের সহিত সেবন করাইতেছে ; ইহাতে কেবল এই ফল হইতেছে, যে উক্ত সমাজ গাঁজিয়া উঠিয়া অর্কচাচার রূপ জঘন্য তাড়ি উৎপন্ন করিতেছে । আবার যাঁহারা এই জঘন্য তাড়ি পান করেন, তাঁহাদের মত্ততাই বা কত ?

চরিত্র বিষয়ে দেশস্থ লোকের অবনতির কারণ তাহাদিগের ধর্ম বিষয়ে অবনতি । ধর্মের প্রধান উপাদান ঈশ্বরের প্রতি ভক্তি ও পরকালের ভয় । সে কালের লোকের বিশ্বাস যেরূপ থাকুক না কেন, ঈশ্বরের প্রতি বিলক্ষণ শ্রদ্ধা ও ভক্তি ও পরকালের ভয় ছিল ; এক্ষণকার লোকদিগের সেরূপ দৃষ্ট হয় না । 'বিদ্যানুশীলনের প্রাদুর্ভাব বশতঃ ধর্ম বিষয়ে সত্যজ্ঞান প্রচারিত হইতেছে বটে, কিন্তু ধর্মের প্রধান উপাদান শ্রদ্ধা, ভক্তি ও পরকালের ভয়, সে সকল ক্রমে তিরোহিত হইতেছে ।' এক্ষণকার সাকার উপাসকদিগের আপনাদিগের উপাসিত দেব দেবীতে তত বিশ্বাস নাই ; তাঁহাদিগের মধ্যে ধর্ম এক্ষণে কেবল তামসিক ব্যাপার হইয়া উঠিয়াছে । এক্ষণকার নিরাকার উপাসকদিগকে জিজ্ঞাস্য এই যে, সরলচিত্ত বিশ্বাসী সাকার উপাসকেরা যেমন তাঁহাদের দেবতাকে সাক্ষাৎ দেখেন, তাঁহারা কি নিরাকার ঈশ্বরকে সেইরূপ সাক্ষাৎ দেখিয়া তাঁহার উপাসনা থাকেন ? সে কালের পৌত্তলিকেরা যেরূপ তাঁহাদিগের ধর্মের নিয়ম সকল পালন করিতেন, তাঁহারা কি তাঁহাদের ধর্মের নিয়ম, বিশেষতঃ উপাসনার নিয়ম সেইরূপ পালন করিয়া থাকেন ? পূর্বকালের লোকেরা যেমন সকল কার্যে পরকালের ভয় করিতেন, তাঁহারা কি সেইরূপ করিয়া থাকেন ? সে কালের লোকেরা যেরূপ ধর্ম-

ভীক, সরল, স্নেহশীল, দয়াশীল ছিলেন, তাঁহারা কি সেইরূপ ধর্মভীক, স্নেহশীল ও দয়াশীল? এক্ষণে সভা, বক্তৃতা, উৎসব রূপ ধর্মোপদেশের প্রতি লোকের অধিক দৃষ্টি কিন্তু ধর্ম সাধনের প্রতি তত দৃষ্টি নাই। এক্ষণে ধর্মবিষয়ে উপদেশের আলা-  
 কারিক সৌন্দর্য্যের প্রতি লোকের অধিক দৃষ্টি, কিন্তু সেই উপদেশানুসারে কার্যের প্রতি তত দৃষ্টি নাই। লোকে ধর্মোপদেশ শুনিয়া বলে, “বেস বক্তৃতা করিয়াছে,—বেস বক্তৃতা করিয়াছে!” কিন্তু যে উপদেশ শুনা হয়, তাহা কার্যে পরিণত করিতে, অতি অল্প লোকেই চেষ্টিত হয়। এই অবস্থায় যে এক্ষণে এই দেশে কেবল ধর্মোদাসীনের দল,—কেবল ধর্মশূন্য লোকের দল বাড়িবে তাহার সন্দেহ কি? ধর্ম সমাজ রক্ষার পত্তনভূমি! যে সমাজে ধর্মের প্রতি শ্রদ্ধা নাই, সে সমাজের কি উন্নতির আশা করা যাইতে পারে? নাস্তিকতা ও তজ্জনিত পাপাচরণ জন্য অত বড় ক্রান্তির কি দুর্দশাই না হইল? যেখানে ধর্ম নাই, সেখানে ঐরূপ দুর্দশাই ঘটে।

বর্তমান বঙ্গসমাজের রাজ্য বিষয়ক অবস্থা ও সন্তোষজনক নহে। আমরা নিশ্চয় জানি যে, আমরা আব্রাহামনে অক্ষম। আমাদিগকে এক্ষণে অনেক দিন পরাধীন হইয়া থাকিতে হইবে। এক প্রভু গিয়া আর এক প্রভু হইতে পারে, কিন্তু হয়ত সেই প্রভু, আমাদিগের বর্তমান প্রভুরা যত ভাল, তত ভাল না হইতেও পারেন। অতএব এতদ্দেশে ইংরাজদিগের রাজত্ব স্থায়ী হয়, আমরা দৈবের নিকট কায়মনোবাক্যে প্রার্থনা করিয়া থাকি। কিন্তু দুঃখের বিষয় এই যে, আমাদি-

গের ইংরাজ রাজপুরুষেরা আমাদিগের নানান আশা পূর করেন না। পূর্বে সাহেবেরা এতদেশীয়দিগের প্রতি যেরূপ সদয় ব্যবহার করিতেন, এক্ষণে প্রায় সেরূপ ব্যবহার করেন না। এক্ষণে ইংলণ্ড গমনের সুবিধা হওয়াতে এ দেশের প্রতি সাহেবদিগের পূর্ণাপেক্ষা যত্ন কমিয়া গিয়াছে, আর সেরূপ বাঙ্গালী কর্মচারীর বাড়ীতে গিয়া কোন সাহেব তাহার কুশল জিজ্ঞাসা করেন না এবং তাহার সম্মানদিগকে আদর করেন না। সে কালের বাঙ্গালীরা তাঁহাদিগের রাজ্য সম্বন্ধীয় অবস্থায় সম্বন্ধ ছিলেন। তাঁহারা তত ইংরাজী শিক্ষা লাভ করিতেন না, তাঁহারা রাজ্যতত্ত্ব তত স্বক্ষরূপে বুঝিতেন না, আর সাহেবেরাও তাঁহাদিগের প্রতি সদয় ব্যবহার করিতেন। এই সকল কারণে তাঁহারা তাঁহাদিগের রাজ্য সম্বন্ধীয় অবস্থায় সম্বন্ধ থাকিতেন। এক্ষণে নানা কারণে চতুর্দিকে অসন্তোষ বৃদ্ধি হইতেছে। ইংরাজী শিক্ষার দ্বারা আমাদিগের হৃদয়ে উচ্চ উচ্চ বাসনার উদ্রেক হইতেছে, কিন্তু রাজপুরুষেরা আমাদিগের সেই সকল বাসনা পূর্ণ করিতেছেন না। আমরা গবর্নমেন্টের দোষ সকল বিলক্ষণ বুঝিতে পারিতেছি, কিন্তু আমাদিগের হাত পা বাঁধা, সে সকল দোষ সংশোধন বিষয়ে আমাদিগের কোন কথাই চলে না। গ্রীক পুরাণে লিখিত আছে যে, ট্যান্টেলস্ নামক এক ব্যক্তি নরকে একটি অভূত শাস্তি প্রাপ্ত হইয়াছিল। পিপাসায় আকুল, কিন্তু যেমন সে স্রোতের জল পান করিতে যায়, তেমনি জ্বল তার ওষ্ঠদ্বয় হইতে পলায়ন করে, আমাদিগের দশা সেইরূপ হইয়াছে। আমরা যখন মনে করি যে, রাজ্য সম্বন্ধীয় কোন সুখ লাভ করিলাম,

অমনি সেই সুখ আমাদিগের নিকট হইতে পলায়ন করে। আমরা ইংরাজী শিক্ষা না করিতাম, এ বিড়ম্বনা অপেক্ষা সে বরং ভাল ছিল। কোন ইংরাজী কবি বলিয়াছেন :——

“When ignorance is bliss,

’Tis folly to be wise.”

“যখন অজ্ঞতায় সুখ, তখন বিজ্ঞ হওয়া অজ্ঞতার কৰ্ম।”  
এ বিষয়ে আরো অনেক বলা যাইতে পারে। কিন্তু বক্তৃতা আরো দীর্ঘ হইবে বলিয়া তাহা হইতে বিরত হইলাম।

এক্ষণে সকলে বিবেচনা ককন, — যখন আমরা শারীরিক বলবীর্য হারাইতেছি,—যখন দেশীয় সুমহৎ সংস্কৃত ভাষা ও শাস্ত্রের চর্চা হ্রাস হইতেছে,—যখন দেশীয় সাহিত্য ইংরেজী অনুকরণে পরিপূর্ণ,—যখন দেশের শিক্ষা প্রণালী এত অপকৃষ্ট যে, তদ্বারা বুদ্ধি বৃদ্ধির বিকাশ না হইয়া কেবল স্মৃতি শক্তির বিকাশ হইতেছে,—যখন বিদ্যালয়ে নীতি শিক্ষা প্রদত্ত হইতেছে না,—যখন স্ত্রীশিক্ষার অবস্থা অত্যন্ত অনুন্নত,—যখন উপজীবিকার আহরণের বিশিষ্ট উপায় সকল অবলম্বিত হইতেছে না,—যখন সমাজ সংস্কারে আমরা যথোচিত কৃতকার্য হইতে পারিতেছি না,—যখন চতুর্দিকে পানদোষ, অসরলতা, স্বার্থপরতা ও সুখপ্রিয়তা প্রবল,—যখন আমাদিগের রাজ্য সম্বন্ধীয় অবস্থা শোচনীয়,—বিশেষতঃ যখন ধর্মের অবস্থা অত্যন্ত হীন,—তখন গড়ে আমাদিগের উন্নতি কি অবনতি হইতেছে, তাহা মহাশয়েরা বিবেচনা ককন।

কিন্তু আমাদিগের নিরাশ হওয়া কৰ্তব্য নহে। আশা অবলম্বন করিয়া থাকিতেই হইরে, যে হেতু আশাই সকল উন্ন-

তিরমূল। যখন বাঙ্গালী দ্বারা কোন কালে অনেক কার্য সাধিত হইয়াছিল, তখন এমন আশা করা যাইতে পারে যে, সেই বাঙ্গালী দ্বারা পুনরায় অনেক কার্য সাধিত হইবে। সমুদ্র সেন, চন্দ্র সেন, প্রভৃতি রাজারা যাহারা পাণ্ডবদিগের সঙ্গে ঘোরতর সংগ্রাম করিয়াছিলেন, তাঁহারা বাঙ্গালী ছিলেন। রাজকুমার বিজয়সিংহ যিনি পিতা কর্তৃক স্বদেশ হইতে বহিষ্কৃত হইয়া কতকগুলি অনুচরের সহিত সমুদ্রপোতে আরোহণ পূর্বক সিংহলে গমন করিয়া উক্ত উপদ্বীপ জয় করিয়াছিলেন এবং যাহারা সিংহ উপাধি হইতে ঐ উপদ্বীপ সিংহল নামে আখ্যাত হইয়াছে, তিনি এক জন বাঙ্গালী ছিলেন। দৈব, ধনপতি ও শ্রীমন্ত সওদাগরেরা, যাহারা সমুদ্রে গমনাগমন পূর্বক বাণিজ্য কার্য সমাধা করিতেন, তাঁহারা বাঙ্গালী ছিলেন। দেবপাল, ভূপাল, মহীপাল প্রভৃতি সার্বভৌম নৈমিট, যাহারা কর্ণাট হইতে তিব্বত পর্যন্ত দেশ সকলকে করপ্রদ করিয়াছিলেন, তাঁহারা বাঙ্গালী ছিলেন।

“যশোর নগর ধাম, প্রতাপ আদিত্য নাম,

মহারাজা বঙ্গজ কারন্তু”

যিনি জাহাঙ্গীর পাদশাহ সেনাপতিদিগকে হিম্মত খাওয়াইয়াছিলেন, তিনি এক জন বাঙ্গালী ছিলেন। বাঙ্গালীদিগের বর্তমান অবস্থা অত্যন্ত হীন : কিন্তু যখন এই বর্তমান হীন অবস্থাতেও তাহারা কিছু কিছু কার্য করিতে সক্ষম হইতেছে, তখন এমন আশা করা যাইতে পারে যে, ভবিষ্যতে তাহারা অধিক কার্য করিতে সক্ষম হইবে। বর্তমান কালের এক জন বাঙ্গালী সাহেবদিগের মধ্যে “Fighting Moonsiff” অর্থাৎ

যুদ্ধপ্রিয় মুস্লেফ উপাধি লাভ করিয়াছিলেন এবং সিপাহীদিগের বিদ্রোহের সময় ইংরাজ রাজপুরুষদিগের পক্ষে যুদ্ধ করাতে গবর্ণমেন্ট হইতে জায়গির প্রাপ্ত হইয়াছিলেন। বাঙ্গালীরা এক্ষণে ভীষণ সমুদ্র-তরঙ্গ পার হইয়া ইংলণ্ডে গমন পূর্বক তথায় মহা সম্মান প্রাপ্ত হইতেছে। বাঙ্গালীরা এক্ষণে সিবিল সার্ভিসের পরীক্ষা দিয়া কলির ব্রাহ্মণ মণ্ডলীর মধ্যে স্থান লাভ করিতে সক্ষম হইতেছে। ভারতবর্ষে যেখানে বাঙ্গালীরা বসন করিতেছে, সেইখানে একটা কারখানা করিয়া তুলিতেছে। যথা,—অযোধ্যায়, জয়পুরে, কাশ্মীরে। বাঙ্গালীরা এক্ষণে ধর্ম ও রাজ্য বিষয়ক আন্দোলনে ভারতবর্ষে অগ্রবর্তী স্থান অধিকার করিতেছে। অতএব বাঙ্গালী দ্বারা যখন এতটুকু হইয়াছে, তখন যে অধিক হইবে না, ইহা কি প্রকারে বলা যাইতে পারে? ঈশ্বরের অসাম্য কিছুই নাই। তিনি নীচকে উচ্চ করিতে পারেন ও উচ্চকে নীচ করিতে পারেন। এই বাঙ্গালী জাতি এক্ষণে সকলের নিকট ঘণিত; কিন্তু হয়ত এই বাঙ্গালী জাতি যাহা করিবে, ভারতবর্ষের আর কোন জাতি তাহা করিতে সক্ষম হইবে না। হয়ত এই দুর্বল বাঙ্গালী জাতি ভবিষ্যতে পৃথিবীর মধ্যে এক প্রধান জাতি হইয়া উঠিবে। ঈশ্বর সেই দিন শীঘ্র আনয়ন করুন!

---

সমাপ্ত।







